

庫文有萬

種百七集二第

編主五雲王

宋紀詩事

(九)

輯瑄曰馬鵠厲

商務印書館發行



事紀詩宋

(九)

輯琯曰馬鵞厲

書叢本基學國

庫文有萬

種百七集二第

者 瑞 德  
五 雲 王

行發館書印務商

# 宋詩紀事卷五十四

錢唐厲鶚緝  
許梓勘定

胡朝穎

朝穎字達卿淳安人乾道八年進士官提刑有靜軒集

風鈴

風不能調碎玉聲宮商濫奏竟難名誰家稚女敲方響一曲從頭學不成

旅夜書懷

十日春光九日陰故關千里未歸心遙憐兒女寒窗底指點燈花語夜深以上前賢小集拾遺

小金山

天光雲影碧相涵百頃玻璃一望閒綠水遶門迷客渡白雲終日伴僧閑疎鐘破曉潛虯動老木成陰倦鳥還喚取頭陀磨石壁爲渠題作小金山淳安縣志

王孝巖

孝巖吳興人乾道八年進士淳熙閒處州推官

舫齋孝巖建

我本湖濱一漫郎。生來住處波茫茫。時尋畫舸破烟水。菰蒲滿路荷花香。一川窈窕詫紅蓼。兩岸蘆葦明秋霜。船頭鷗鳥日來往。溪上風月相迎將。一行作吏便相失。合眼靈運春池塘。紛紛雁鷺實可厭。紙尾姓字隨低昂。簿書終是俗人甚。江湖到了難相忘。公餘賴有數椽在。疎櫺兩行如船裝。不知風波世路險。穩著萬斛隨風檣。人生短篷何日近。向來苦晝今括蒼。江山轉柁千萬里。故人兩地遙相望。誰能爲我幻竹葉。頃刻泛宅歸滄浪。祇憑平生氣湖海。隨所寓處爲舲艎。夜寒滿載明月窗。北風打頭人不忙。動來況自不如靜。悔吝不到虛舟傍。胸襟五湖與三江。是中莫測誰望洋。直須喚取李郭輩。相與共泛無何鄉。威州府志

陳傳良

傅良字君舉。溫州瑞安人。乾道八年進士。寧宗朝累遷中書舍人。除寶謨閣待制。卒謚文節。有止齋集。

止齋卽事

教子時開卷。逢人強整襟。最貧看晚節。多病得初心。地僻菱蓮好。山低竹樹深。寄聲同燕社。明日又秋砧。

題仙巖梅雨潭

衰衰羣山俱入海。堂堂背水若重闡。怒號懸瀑從天下。傑立蒼崖夾道陳。晉宋至今堪屈指。東南如此豈無人。結廬作對吾何敢。聊向漁樵寄此身。

癸丑冬車駕過宮留相還朝

一聲警蹕接天齊。馳道無塵馬不嘶。月御順行隨日轂。乾端和氣布坤倪。三槐相繼歸公袞。細柳還須聽將鼙。老矣尙能歌二聖。不應專美在浯溪。以上止齋集

劉 燮

燮字晦伯。建陽人。受學晦翁東萊之門。乾道八年第進士。寧宗朝累遷國子司業。奏乞罷僞學之禁。擢權工部尙書兼太子右庶子。卒贈光祿大夫。謚文簡。有雲莊外集。

金國賀正旦使人到闕紫宸殿宴

榆關玉塞靜無塵。嘉定于今第四春。兩國交馳通好使。八方同作太平人。翠靉鼓奏娛嘉客。白獸樽浮賞諫臣。聖歷欲茲天共遠。年年玉帛會楓宸。

瑞慶聖節集英殿宴

皇家卜世過周唐。天啓真人應運翔。抱日預占恭邸夢。飛龍曾報皖山祥。翠雲影外來金母。紅霧香中擁玉皇。樂府賦工無以祝。願將金鑑代珠囊。

東宮

鶴駕通宵入問安。龍墀清曉狎朝班。天顏喜見重輪月。春色先回萬歲山。

皇帝閣春帖子

東風昨夜入簾帷。便覺深宮漏影遲。一曲涼州花盡放。不須更作報春詩。以上雲莊外集

李大異

大異，字伯珍，隆興府新建人。乾道八年進士，仕至諫議大夫，知建康府。

曾兄惠然見臨，篤敍世契，示以先哲遺墨，稽首敬觀，因題其後。嘉泰壬戌七夕前三日

家傳文獻六經香袖有驪珠，日月光喬木陰陰人已遠。祇應故笏在甘棠。鐵網珊瑚

姚宋佐

宋佐，字輔之，郴州人。乾道八年進士，爲靜江府教授。

梅月吟

梅花得月太清生，月到梅花越樣明。梅月蕭疎兩奇絕，有人踏月繞花行。詩人玉屑

丁逢

逢晉陵人。乾道進士，官至寶謨閣待制，知郴州。

次袁尚書巫山十二峯二十五韻

半雨半晴山弄姿，溼雲吹風不成凝。蘿蕪漸徧楚宮碧，蒲萄未漲巴江遲。西南大尹初涉境，山川效職加。  
瑰奇翠屏窺窗故娟妙，松巒映柁相參差。浮雲擊汰睨青壁，靈君一去今安之。吟情浩蕩隘宇宙，萬景敢。  
云驕莫隨當年楚，境半天下辱。王醉夢方昏，疲珊瑚玉佩赤帝女。星鬢羽蓋蜺旌旗，錫符賜策豈無意。侍  
臣託諷褰轡帷，尹今文采繼騷雅。夢得詩魂羞竹枝，吾行一百八盤上鑽天。但覺雲天低，荒荒野驛虎豹  
怒。陰陰嶺樹猿猱嬉，危登險陟倦三伏。口咷背浹嗟胡爲，豈知舟行有奇觀。山靈祕惜留歸時，青簾白舫  
夙已具。芒鞶布韁將從茲，胷中丘壑未塵土。頭上歲月從驅馳，雖無勝具逐支許。尚有樂趣同周施，何當

投効便歸去。登船打鼓清江浦。更催尺一喚公覲。同看二六浮脩眉。常山蛇陣想魚復。建溪龍焙傾蟆頤。攤錢畫浪看三老。杖藜晚岸尋名縑。昔人汶嶺寄書帖。更歌蜀道先吁嘻。未若尹外岳牧中丞。疑愛春江之赴滄海。清明秋月之挂峨嵋。盡驅三峽波濤筆。第入思齊訪落詩。全蜀藝文

到郴

眼界山遙碧。腰輿步轉高。未疑禦魑魅。自笑尹鼯狫。末路成三折。衰年感二毛。次山雖漫仕。安敢遽辭勞。

郴州文志

蔡幼學

幼學字行之。瑞安人。乾道進士。寧宗朝累官權兵部尙書兼太子詹事。卒謚文懿。有育德堂集。

田園

野水萍無主。晴風草自香。庭陰新似染。物色去如忙。岸樹魚依綠。畦花蝶鬪黃。家園向來夢。靜數四年強。

東甌詩集

寥德明

德明字子晦。南劍人。受業朱子之門。登乾道進士。歷官吏部左選郎。官奉祠。有槎溪集。

鬱林郡城

荒烟漠漠雙江上。往事悠悠野戍孤。春到偏臨青草渡。夢中猶記白鷗湖。粵西詩載

石孝友

宋詩紀事

卷五十四

一四〇一

孝友字次仲南昌人乾道進士以詞名有金谷遺音

釣臺

桐江波上一羊裘釣得聲名隘九州天子曷嘗遺故舊先生不肯事王侯

釣臺集

張貴謨

貴謨字子智遂昌人乾道中進士光宗朝除吏部郎中使金轉朝散大夫嘉泰中直敷文閣知靜

江府

題睢陽五老圖

駟馬鮮能容白髮萬釘終不潤黃爐烏韃席帽紅塵裏幻出睢陽五老圖

鐵網珊瑚

王炎

炎字晦叔婺源人乾道進士始令臨湘慶元中官著作佐郎出守湖州有雙溪集

題徐參議所藏唐人浴兒圖

右相嘗慚呼畫師技癢仍復拈毛錐逼真誰作此贋本亦有妙意生妍姿中庭燕坐必主婦綠雲高髻香羅衣嫣然嬪妾左右侍前浴能言丹鳳雛娉婷及笄女公子素腕擁項相攜扶兩兩爲朋四鬢亂乳盧隨逐爲諧嬉掌中看珠二少艾捧頸卻立鴉鬟奴屏閒擁膝袖玉筍疑是夢闌顰翠眉側身背面按箏者冰肌綽約不自持牀前跪起各姝麗爲兒理髮挾淚湊有犬爛斑受摩撫與人習熟無猜疑梳妝淡薄服製古如見永徽貞觀時若非侯家及主第人物無此美且都荆釵布襦小家子生子不如山下麌

題姜堯章舊遊詩卷

出郭栽花涉小園。歸調琴譜輯詩編。少年豪健今摶斂。休羨騎鯨李謫仙。以上雙溪集

林淳

淳三山人。乾道八年以嘉議郎爲涇縣令。修復古塘。民多稱之。

琴溪

湛湛長溪水。飛橋遠近通。客喧墟市合。仙去釣臺空。欲辨磨崖字。忽聞遵渚鴻。僧無贊公趣。誰與論崖中。寧國府志

滕珂

珂南郡人。宣城縣丞。

謁梅都官墓

百年詩老臥空山。猶憶當時語帶酸。贏得兒童喚夫子。可憐名位祗都官。手編新史唐文備。骨立殘碑漢籍漫。落日牛羊上丘隴。草埋翁仲獨峩冠。宛陵集附

李石

石字知幾。資陽人。乾道中以薦任太學博士。出爲成都倅。有方舟集。

文獻通考。李石紹興末爲學官。乾道中爲郎。歷廳節以論罷。趙丞相雄其鄉人也。素不善石。石是以晚益困。其自序云。宋魁魯倉。今猶古也。

瞿唐峽

我行江南上峽來。繫舟夜泊雲雨臺。行到西川一萬里。杜鵑聲急桃花開。

到夔門呈王待制

手挈東風上水關。鳳書迎日看新班。五湖家世烏衣巷。三峽樓臺赤甲山。畫戟門開春晝永。臥龍帳穩海波閑。安危大計須公等。天定應知卽賜環。以上全蜀藝文志。

禮殿

漢人祀周公爲先師故鍾會記云周公禮殿范蜀公鎮云屋制甚古非近世所爲秦漢以來有也內翰王素云其屋制絕異

今制後之葺者惜其古不敢改作

蜀侯作頌錦水湄。先聖先師同此室。巍然夫子據此座。殿以周公名自昔。聖人兩兩如一家。均是周人先後出。東家想見中夜夢。猶與古孫同袞鳥。斯文授受乃關天。不爲漢唐加損益。我時來視俎豆事。重是漢人斤斧迹。漢宮制度九天上。散落人間此其一。多因豐屋起戎心。獨此數椽綿歲歷。規摹嶧嶢東魯似。氣象縹渺西岷敵。竹松猶是斯干詩。風雨方知隆棟吉。雖然漢獻來至今。閱時已多駒過隙。中閒豈無鳥鼠慮。妙斲不知難輒易。工師不揆亂如麻。敢向殿門言匠石。詩書譬彼尚闕文。後學如何補遺逸。祖龍非意竊。登牀科斗有心求壞壁。舊章僅在命如絲。誰勒吾詩勝丹浹。成都文類

句

留船買魚作寒節。元遺山詩注。

筭，字仲韶，端禮姪，乾道門直祕閣出守處州。

少微閣 在處州治後郡守關景暉建米芾書額

少微閣應少微星點點雲閒分外明過雨曉來添練水好山晴後見蓮城昔年人物不常有近世英豪多  
閒生顧我把塵慚坐隱落霞孤鶩看題名括蒼彙紀

林憲

憲，字景思，吳興人。乾道中特科監南嶽廟參政賀子忱愛其才以孫女妻之。因寓居天台。賀亡挈其孥居城西之蕭寺有雪巢小集。

梅磵詩話鄉人雪巢林憲景思紹淳中前輩後居天台少從侍郎徐敦立度游度得句法于魏昌世衍實後山陳公嫡派也。梁漢尤公延之序其詩言景思喜哦初不鍛鍊而落筆立就渾然天成無一語蹈襲唐人之精于詩者不是過楊公廷秀亦云景思之詩似唐人尤楊二公少所許可其論景思詩如出一口非溢美也近世三衢鄭景龍編宋百家詩續選摘出羣花飛盡楊花飛盡無可飛天空霜無影等句謂其超出詩人準繩之外亦非虛語。

文獻通考陳氏曰景思人高尚詩清  
澹五言四韻古句尤佳殆逼陶謝

讀陶詩作

吾觀淵明詩了不在言賦有如泰和氣周行不停駐時與春爲風融和物華布未嘗見用力萬物榮處處

時與秋爲月。浩然無點注。江山滋清絕。宇宙靡纖汚。乃知淵明詩。本不在詩故。邂逅吐所有。氣象隨所寓。  
乞食不爲拙。華軒不爲慕。歸來不爲高。折腰不爲沮。羲皇平步超。無懷真雅素。簡談豈能盡。學者謾馳步。  
獨有無弦琴。明明一斑露。

劉後村詩話

梅花

野梅空山中。正爲照人開。如何綠窗底。珠暎帶蒼苔。頗似古君子。無人自不諧。竹徑酒初醒。一信清香來。  
全芳備祖

寓天台水南

春雨暗前山。春雲行遠林。月落雞犬靜。誰聞梁父吟。巍巍兮高山。泠泠兮好音。誰聞梁父吟。唯恐山不深。

台州兜率寺

春江濶天明。蕭寺踞山塢。荒塔下鳥雀。古木颯風雨。徐行石苔花。徒倚望江渚。日暮山更寒。簷頭鈴自語。  
寺門闕南江。江勢浩相嚮。風雲互吞吐。山色豁林莽。潮頭捲飛烟。白雨挾春漲。中夜鵝鶩喧。誰家海船上。  
以上赤城詩集

句

柔櫓晚潮上。寒燈深樹中。汲水延晚花。推窗數新竹。天空霜無影。

誠齋詩話

王從

從字正夫。文正公五世孫。乾道中添差台州倅。知信州。有三近齋餘錄。

次韻張彥晉秋日

地迴高樓目天寒故國心江鷗無萬里雲木自千尋門掩斜陽下人歸落葉深風前悵何許入耳越鄉吟

前賢小集拾遺

句

涼風回遠笛暝色帶歸舟塵心依水淨歸鬢與山青一番風雨催寒食千里鶯花想故園身閑更得馮陵酒花早殊非愛惜春以上誠齋詩話

王素

素乾道中漢中郡守

重修山河堰

畫隼精明破曉暾恰逢寒食過江村輕烟飛絮漢中道白葦黃茅渭上屯人力萬工支水派天心兩邑溉川原柳營一飽源頭看夜雨新肥拍岸痕陝西通志

滕

膺

廡乾道閒人

桂林西湖再開呈張經略維

隱然重望壓邊城號令風行玉帳兵詩思江山真得助威聲草木盡知名要令萬頃窺黃憲不把千畊付麴生坐使勝遊還舊觀追隨那得勝公榮桂勝

梁 琦

題陸賈大夫廟

劉郎辛苦逐秦鹿。尙欲長鞭及馬腹。蠻夷大長夢不驚。海邊椎髻乘黃屋。江淮貔貅始閑暇。忍使驅令渡  
篁竹。陸生手持尺二組。喚起老子同分肉。詩書尙曉罵儒翁。豈憂傑鷺難拘束。築壇再拜受王印。雄辨冷  
泠聽不足。當時未有北人輔。留寓年深染汙俗。乍聞高論耳目清。如掩笙簧奏冰玉。境中勝處應更履。更  
泝餘皇到山麓。大夫何獨粵人重。漢廷公卿俱竦服。陳平奇計須深念。張子全身甘辟穀。此外侯王希識  
字。帶礪功存半誅戮。惟君坐使將相歡。燕喜優游劉氏福。年少終軍學高步。空有英稱命難續。乃知智者  
應世閒。妙似庖丁奏刀熟。往事浮雲變滅盡。越水悠悠浸山綠。荒祠寂寞傍僧居。日暮飢鴉噪喬木。我來  
三歎重遲留。爲酌寒泉薦秋菊。

夷堅志。乾道間。梁竑入都。檣舟廟下。夜夢一客。自稱陸大夫。云  
我抑鬱于此。千餘歲矣。君幸見過。願留一詩。遂題詩于壁而去。

單 瓔

夔。錢塘人。乾道中。以奉議郎。知湖州。官至侍從。

次楊咸亨江郊亭新成二十三韻

瞿塘一門江水傾。羣趨激射隨奔鯨。舟車冠蓋湊蜀道。孰問張丈連殷兄。相逢來往問地主。太守詎敢忘  
將迎。白崖候館久茅蘘。近卽野處披榛荆。屏修啓剔作廬舍。夙戒里旅遲留行。有如授館及郊勞。舉國定

制誰先鳴錢唐鄙人何所似抵掌自視鴻毛輕食焉抑畏墮偷懦汎觀彼已同虛盈山蹊水滸肆登賞靡  
嗜傑閣誇崢嶸朋從簪盍得衆雋塵譚冰釋欣初晴鼎新質我築斯館棟宇不貴朱連甍入門便足庇風  
雨揭榜卻借江郊名時哉蓮幕有嘉客落筆能令風雨驚聯篇累牘溢我目粲在麗藻舒我情人生悟合  
良快意胡爲四美嗟難并日光天際發豐蔀此去可並依離明直排闥闔出灑瀝肅肅東首歌胥征循崖  
履坦蕩無阻爲君留取能詩聲此榜與詩儻不朽此館想同江水清我來歲月媿銷縮整綬輯履圖歸程  
遺名肯復計身後謹慮第虞槃水擎始終感慨遇僚友遂事且喜相須成勉旃功業早期就發輒自是天  
衢亨四川總志

鄭

鑑

鑑字自明連江人淳熙元年太學釋褐授國子學正召試除校書郎累遷太子侍講終宣教郎知

台州

香爐山在連江縣

峙立交輝紫翠閒疎簾半卷鎮長閑神仙似有祈年術一縷青煙起博山淳熙三山志

詹

驥

驥會稽人淳熙二年進士第一

遊雲門

輕裘肥馬春三月到此經遊花正紅欲覓上方幽隱處老僧笑指白雲中雲門志略

陳孔碩

孔碩，字膚仲，號北山，侯官人。淳熙初進士。紹熙中，邵武宰。終祕閣修撰。知惠州。有北山集。絕句

臘雪逢春次第消，等閑著脚上溪橋。  
柳條畢竟如兒女，一夜東風眼便嬌。

全芳備祖  
寄題劉潛夫于薦于齋

聞昔子元子，愛歌于薦于。遺風今有繼，此意古爲徒。  
犧價踰刀劍，原飴變堇荼。聞弦知豈弟，聯袂此懽呼。  
近事先苞籜，何人問牧芻。聚星亭澗好容我，受塵無

後村詩話。余曩宰建安，扁便齋。  
曰于薦于北山陳公寄詩云云。

林夢英

夢英，字伯虎，閩清人。徙撫州。游陸象山之門。登淳熙二年進士。歷祕書丞。學者稱山房先生。

金石臺

雲作巖扉風自關，清陰半壑樹中閒。  
傍廂更著茅亭好，放入西南一面山。

江西通志  
碧澗書堂

臨川遇鄒君，示我銅陵辨。相邀游其閒，百聞須一踐。自從雙耳聾，已辦兩足繭。武夷乃招隱，仙都輒策蹇。  
遙睇麻源村，夢思勞輶轎。今披碧澗記，華岡訂訛舛。疑信吁莫論，是非爭之榦。但欣泉石奇，堂成書可翬。

晁侯雲夢胸妙處參墳典家有萬竹坡琳琅闕營翦徘徊康樂舊此興尤不淺人生貴自得假物非至善山川侈遭逢所託各偕顯嚴光釣越灘叔子登楚峴氣象不低摧吾徒志當勉相思邀未到烟霞自舒卷唯應原上月共照人孤狷

撫州府志

### 孫應時

應時字季和自號燭湖居士餘姚人從學朱子之門淳熙乙未第進士知常熟縣移判邵武軍未

上而卒有集

### 嚴子陵

簿書流汗走君房那得狂奴故意降努力諸公了臺閣不煩魚雁到桐江

因學紀聞

### 歸舟晚泊

日落風更起江頭船不行淒涼大夫宅蕭瑟故王城一醉重樓晚千秋萬古情愁邊寒角動夜久意難平

### 益昌僧寺靜境軒

落照久未夕斷雲低不飛孤舟上水急歸鳥度山微蕭颯天涯鬢淋浪醉後衣憑闌一笑去客夢轉頭非

### 武擔山

小飲不成醉清談多所欣秋聲搖落日野色盪寒雲心事長千里腰圍更幾分西風叢桂發倚檻得相聞

### 武擔西臺

西臺在何許秋草暮雲閒十畝有餘竹一窗無數山望遠足離思憂時多苦顏相看終惜醉更挈酒餅還

新灘見桃杏書事

今晨明客眼，桃杏照江紅。鳥哢蒼山曲，人聲翠竹中。獨遊空遠思，一笑負春風。便想荊州道，簪花醉渚宮。

陳仲弓

清濁無心陳仲弓。圓機聊救漢諸公。末流不料兒孫誤，千古黃初佐命功。以上吳禮部詩話。

登仙木在四明山。漢劉嫗妻樊夫人登此木上昇。

劉樊蟬蛻此登仙，老木當年已插天。玉骨半枯猶秀潤，蒼皮新長更榮鮮。蟠桃待熟三千歲，銅狄重摩五百年。化鶴未歸山寂寂，徘徊誰與問因緣。姚江逸詩。

呂定

定字仲安，新昌人。歷殿前都指麾、龍虎上將軍。有說劍集。

登彭城樓

項王臺上白雲秋，亞父墳前草樹稠。山色不隨人事改，水聲長近戍城流。空餘夜月龍神廟，無復春風燕子樓。楚漢興亡俱土壤，不須懷古重夷猶。

登越王臺

海上荒臺草樹平，登臨不盡古人情。白雲萬里懷親舍，紅日中天望帝京。百粵山川秋歷落，三城樓閣晚嶧嶧。醉來徒倚闌干曲，聽徹西風畫角聲。以上四朝詩。

項安世

安世字平父括蒼人徙家江陵淳熙二年進士除祕書正字遷校書郎寧宗朝以僞學黨罷開禧中以直龍圖閣爲湖廣轉運判官有平庵悔稿

永州

日日長沙岸看雲  
祗念家如何  
永州夢偏愛在長沙

欸乃曲

鬻迺出深樹湘山日落時  
若非堯女哭卽是楚臣啼

次韻羅郢州送別

江上相留不肯留  
渡江沿岸卻回頭  
漢江東去人西去  
不見高城始是愁

橘州路口小雨

三十年前過此時  
一雙青髻綰青絲  
如今舊雨猶相記  
祗傍星星白處吹

春日隄上

高高下下十五里  
白白紅紅千樹花  
總在疎籬斷垣裏  
背隄臨水小人家

吹帽臺

千山搖落萬林空  
數點黃花酒盞中  
半破接籬誰耐管  
已將身世付西風

拋毬

綵毬丹柱倚春風  
寒食清明罷繡工  
漠北將軍貪蹋鞠  
豈知兵法在吳宮

糟蟹和潘德父

大戴笑汝無穴空雙螯。小戴笑汝有筐如子臯。太元笑汝長郭索。入穴慚蟻升慚猱。知心但有畢吏部。臥起與汝同酒糟。後來愛者蘇長公。亦祇許汝中山醪。固知合向一丘老。安得上與三辰翹。長公貌喜心未敬。雖羨微生尤惡饗。我疑吳儂修稻怨。和秫醯汝償民膏。雖然因此得長醉。痛貶未必非深襄。又疑畢叟妒劉掾。曾以螟蛉輕二豪。故回左手就箕踞。持蟹藉糟成兩高。以上後村詩話

釣臺

竦關山頭破草亭。祇須此地了生平。崎嶇狹世纔伸足。又被劉郎賣作名。

君房足下竟成訛。祇是韓歆已破除。豈有江湖釣竿手。與君臺閣奉文書。方輿勝覽

雨夜

夜窗疎雨不堪聽。獨坐寒齋萬感生。今夜故人江上宿。如何禁得打篷聲。後村千家詩

羅點

點字春伯。撫州崇仁人。淳熙二年進士。光宗朝累遷試兵部尚書。寧宗朝拜端明殿學士。簽書樞密院事。卒贈太保。謚文恭。魏按宋史作淳熙三年誤。今訂正。

巴山喜雨

在崇仁縣南漢豫章守樂巴隱此唐改臨川山。

淑元不冠椎兩髻。繁青綰綠如堆鴉。鬢鬟遠望毛髮古。日日惟聞餐暮霞。吾家公遠更清絕。帶眼不穿衣不結。好風吹袂任飄飄。夜夜惟聞弄明月。餐霞弄月固不惡。不道農田布龜灼。令君盛服道民苦。假然袒

褐猶不怍敬持此意款浮丘。浮丘乃與合同憂急呼風馬駕雲車。二仙方覺裸裎羞。旋加冠巾更束帶。一見浮丘望塵拜。便將凶歲變豐年。談笑之間作霧靄油然。雖出南北峯。開端實自浮丘翁。浮丘詩家老仙伯。故知憂國願年豐。邦人一飽誰所賜。父應詔子兄詔弟。若還此雨後五日。將見索汝枯魚肆。撫州府志

陳造

造字唐卿。高郵人。淳熙二年進士。調繁昌尉。尋宰定海。倅房陵。至淮浙安撫使參議。晚號江湖長翁。有集。

百花樓

樓中香飄百和濃。樓上錦纈翻東風。玉樽美酒清若空。吳姬妝面相映紅。人生一笑不易得。是閒一醉千金直。元龍百尺君勿論。芳時且可金杯側。

都梁

淮汴朝宗地。孤埠祇眼前。譙樓西日淡。戍鼓北風傳。破竹非無計。澆瓜亦自賢。客愁渾幾許。撫劍倚吳天。關塞淒涼處。青徐指顧邊。如何漢正朔。不盡禹山川。將略輕三捷。天威重萬全。諸公不憚日老子。判留年。題趙秀才壁

日日危亭凭曲欄。幾層蒼翠擁烟鬟。連朝策馬衝雲去。盡是亭中望處山。

泛湖

荷面跳珠小濺衣。酒邊團扇已停揮。溼雲收盡人閒暑。卻度西山載雨歸。以上江湖長翁集

任希夷

希夷字伯起號斯庵伯雨四世孫家邵武淳熙二年進士寧宗朝累遷禮部尚書兼給事中進端明殿學士遷簽書樞密院兼參知政事提舉洞霄宮卒贈少師謚宣獻鶴按宋史作淳熙三年誤今訂正

郊壇齋宮

帝籍傍連繭館桑禁林喬木晝陰涼卻從射殿臨江閣中有通衢夾苑牆  
後省紫薇花

清曉開軒俯鳳池小山經雨石增輝琉璃葉底珊瑚幹立出池邊是紫薇  
檢院卽事

禁路風清飛早鴉官卑難望紫宸銜了無公事鉤簾坐一本冬青落細花  
左司史侍班

虎旅分行鐵作撾殿前拜舞一聲譁臣對罷無公事日照金鋪扇影斜  
德壽宮卽事

金爵觚棱曉色開三朝喜氣一時回聖人先御紅鸞扇天子龍輿萬騎來  
霜曉君王出問安寶香傳筆護朝寒五雲深處三宮宴九奏聲中二聖歡  
宴歸還駕七香車一夕天開六出花瑞色先凝紫宸殿春光重到玉皇家  
萬年觴舉慶重華百辟需雲始拜嘉壽宴開時先雪宴天花舞罷帶宮花

宗祀慶成

合宮三歲縟儀收。太室先期肇自周。玉瓊黃流躬禋鬯。大圭元冕薦嘉羞。靈臺畢舉三千禮。鑾路安行十二旛。導從郤歸齋殿去。詰朝牡璧對天休。

紫宸朝罷御端門。天宇澄清景氣溫。丹鳳樓中黃繖立。金雞竿上綵旗翻。萬人聳聽風雷號。四海均霑雨露恩。須信卑宮勤肆禮。君王雅意在元元。

宴玉津園江樓

風靜潮痕減。江空夕照多。星星波上艇。隱隱岸邊莎。風光連北闕。景物傍西湖。禁籞濤江上。茲樓天下無。虛齋留御榻。小徑近層崖。再拜觀奎畫。渾疑侍玉階。參天宮柏翠。布地禁花紅。臺沼如文囿。規摹有汴風。以上咸淳臨安志

海棠

紅妝翠袖一番新。又向園林作好春。卻笑華清誇睡足。至今羅韞久無塵。後村千家詩

題陳亞之集後

如彼流泉必有源。陳家詩律自專門。后山得法因鹽鐵。不減唐時杜審言。陳副使集

劉 裴

襄字伯寵。崇安人。淳熙五年進士。除司門郎中。官至朝請郎。知西全州。自號梅山老人。有梅山詩

集

題小漿

去日春蠶吐素絲，歸時秋菊剝金衣。  
沙鷗不入鴛鴦侶，依舊滄浪遶釣磯。

詩人玉屑伯龍武夷文士嘗宦于朝以  
臺評而歸有句云云怨而不怒之辭也

葉

適

適字正則號水心居士永嘉人淳熙五年進士寧宗朝歷權吏部侍郎寶文閣待制知建康府沿江制置使兼制江淮終寶文閣學士卒謚忠定有水心集

吳子良林下偶談水心詩早已精嚴晚尤高遠如驛梅吹凍藥枯雨送春聲綠園齊長柳紅梅半含桃聽雞催鶴立馬待紬書野影艮迷樹天文夜照城曠書天象切浴硯海光翻地深湘渚浪天遠桂陽城置杜集中何以辨乃若造臘冰千筋句春柳

一絲爍迷王弼宅萬長孟郊墳門邀

百客醉囊譁一錢存又特其細者

趙振文在城北廂兩月無日不游馬塍作歌美之請知振文者同賦

馬塍東西花百里錦雲繡霧參差起長安大車喧廣陌間以馬塍云未識酴醿縛離金沙牆薜荔樓閣山茶房高花何啻千金直著價不到宜深藏青鞶翩翩烏鵲袖嚴勞引前金蔣後隨園摘菜煎凍酥小分移

牀獻春酒陳通苗傅昔弄兵此地寂寞狐狸行聖人有道賚草木我輩栽花樂太平知君已于苕水住盡日櫓聲搖上渚無際滄波蓼自分有情碧落鷗偏聚追逐風光天漫許拋擲身世人應怒君不見南宮載寶回何如趙子穿花去

贈杜幼高

杜子五兄弟詞林俱上頭規模古樂府接續後春秋奇崛令誰賞羈棲浪自愁故園如鏡水日日抱村流送潘德久

每攜瘦竹身長隱忽引文藤令頗嚴聞道將軍如卻縠不妨幕府有陶潛江當闊處水新漲春到極頭花倍添未有羽書吟自好全提白下入詩儉

永嘉橘枝詞

蜜滿房中金作皮人家短日挂疎籬判霜翦露裝船去不唱楊枝唱橘枝以上水心集

前日入寺觀牡丹不覺已謝惜其穠豔故以詩悼之

珊瑚網牡丹乘春芳風雨苦相妒朝來小庭中零落已無數魂銷梓澤園腸斷馬嵬路盡日向欄干躊躇不能去

珊瑚網

趙振文

和葉水心馬塍歌

昔年家住長安里春風盡日香塵起紛紛車馬過綺陌買花人多少人識王侯第宅連苑牆粲若瓊華敷

丹房花窠近取馬塍本曲闌高檻深密藏。主歡對客小舉袖擊鼓吹簫滿前後真珠一斛聘國姝。琥珀千杯酌天酒。幾年農器不鑄兵雨耕雲穫歌且行種花土腴無水旱園稅十倍田租平。拏音來近菰蒲住。演漾迴溪通枉渚。霜晴沙淺橘林明。日暮水渾魚網聚。東門故侯應自許。霸陵醉尉寧須怒。何當學稼隨老農。荷鉏驅犢田中去。咸淳臨安志

白 異

東屯行

雨足稻畦春水滿。插秧未半青短短。馬塵追逐下關頭。北望東屯轉山坡。一川洗盡峽中想。遠浦疎林分氣象。溝塍漫漫堰源低。灘瀨泠泠石磯響。中田築場亦有廬。葦飛夏屋何渠渠。李氏之子今地主。少陵祠堂疑故居。

名勝志。陸務觀高齋記云。少陵居夔三徙居皆名高齋。其詩次水門者。白帝城之高齋也。依藥餌者。瀼西之高齋也。見一川者。東屯之高齋也。東屯李氏居已數世。上距少陵。纔三易主。大歷初。故券猶在。白異東屯行云云。

# 宋詩紀事卷五十五

錢唐厲鶚緝

滿洲舒瞻勘定

郭晞宗

晞宗字宗之仙居人淳熙五年進士仕終瓊管安撫有漫齋稿

白紵詞

遙夜迢迢夜未央井梧月白啼寒蟬感時念往誰不傷婕妤寵絕辭昭陽手中團扇篋中藏吳姬織紵秋  
蟬翼一絲往復千情積金粟尺量金斗熨爲君裁袍爲君惜同盛同衰莫相失

姑蘇臺

春花開秋雁來長風幾度姑蘇臺不見臺上人臺下月徘徊一樹梧桐生綠苔以上赤城詩集

楊濟

濟字濟道淳熙五年進士歷著作郎出知果州有鈍齋集

文獻通考陳氏曰京鐘帥蜀上已出遨濟爲樂語云三月三日豈無水邊麗人一觴一詠亦有山陰禊事又云良辰美景賞心樂事四者難并崇山峻嶺脩竹茂林羣賢畢至一時傳誦

雲安龍脊灘

洞庭老龍時出沒。萬斛舟航皆辟易。此龍脊背已鐵石。肯逐時好作人日。我呼邦人來踏磧。恍然如見河圖出。大巫雞卜占云吉。小巫竹枝歌轉激。飄石揚沙障江色。塵埃何處不相襲。摩挲石刻聊偃息。恐有老人來橫笛。四朝詩

章良能

良能字達之。麗水人居吳興。淳熙五年進士。除著作佐郎。寧宗朝官至參知政事。弁陽周公謹之外祖父也。有嘉林集。

題玲瓏山在吳興

短鋤長鐃出萬峯。鑿開混沌作玲瓏。市朝可是無巔嶮。更向山林巧用工。癸辛雜識

題李伯時飛騎習射圖

禁營貔虎天廕龍。技癢柰芻粟豐。聞道寶津嘗護駕。前期踴躍矜驍雄。紅綃低繫柳枝碧。滿滿彎弓研  
鬢射。偶然穿葉未爲奇。截下紅綃方破的。綵繩長曳綵毬輕。閃爍眩轉如奔星。弦頭霹靂起馬腳。回看一  
箭落梅槍。烏紗帽穩春衫薄。文韁煥爛青絲絡。千步場深隔九關。畢景馳驅有餘樂。李侯應奉隨春官。日  
晏歸穿衛士班。平生抵死憐神駿。絕藝那能不細看。不學閻公伏池側。倉皇丹粉供宣索。他年乘興試追尋。  
妙處祇須憑子墨。十六蹄翻意態真。罄控應節顧盼親。當時騎士盡應爾。尙想元豐兵制新。慨今多事困供餚。養兵殆且殲民力。未聞士歌馬騰槽。安得從容觀戲劇。

吳禮部詩話。李伯時畫飛騎習射圖。其手帖云。公麟元豐初點檢南宮試卷畢。陪預集英殿門應奉廷試。因得至衛士班見飛騎習射。托毬楊枝戲。人偉馬駿。妙天下選。時乘輿幸寶津有日。督課勝負。窮景不休。故頗遂縱觀。今追圖大概。以奉雌堂清玩。

若氣勢不至差俗。則丹青可屏。當蒙照恕也。元祐丁卯臘日謹題。又云。第一研鑿射最難弓。然多中者自帛而下。平截斷之。射毬鮮中以飛硯故。十發三四中爲精矣。尤延之楊廷秀樓大防皆有題詩。朱文公跋云。龍眠飛騎圖及讀延之廷秀大防三君子佳句。因思法雲秀公語尤物移人甚可畏也。後又有古體詩二首。其一云。奉題太丞丈龍眠騎射圖。下有叔簡字。不著姓。其一題嘉定庚午四月二十日。章良能考續通鑑長編。紹熙元年庚戌秋八月。校書郎王叔簡與禮部郎李讎著作郎鄧馯同檢視劉季榮所造新歷。叔簡必王叔簡也。

### 王叔簡

叔簡字敬文。渠江人。淳熙五年進士。紹熙中官校書郎。

### 題李伯時飛騎習射圖

飛毬飲羽柳如截。馬氣橫生人更傑。不作遊觀御寶津。騎戰還應一當百。天家行樂少人知。龍眠屬從天上歸。意象慘淡研精微。曹霸以來無此奇。壯夫披圖雙淚垂。時危那得生致之。吳禮部詩話。

### 曾躍麟

躍麟字子龍。南恩州人。淳熙五年進士。官監察御史。

聞西浦漁歌作

西浦鳴榔下釣磯。歌聲欸乃送斜暉。扣舷互答驚鷗夢。拍手歡呼看鷺飛。山接素琴仙子過。洲連青草使君歸。海天空闊家長在一任蘆花雪點衣。廣東通志

甘同叔

同叔字異。豐城人。淳熙五年進士。官桂州民曹。攝荔浦縣有節軒集。

題昌山聖姥廟

分宜古縣環清溪。重岡複嶺如奔馳。行逢山斷水流處。閱城廟枕山之西。我來落日在前嶺。摩挲一讀盧肇碑。嗟唐今去亦已久。尙餘文字光陸離。云昔秦人有天下。鏖戰六國愚黔黎。碣山雲氣望不見。神物乃降江之嫠。雷轟電合助光怪。蜿蜒墮地偕羣兒。赤鱣王鮪奉鼎俎。追逐甘旨憐姥慈。姥先仙去環佩冷。安能蟠蟄從兒嬉。劉累不出浮俗隘。況肯委質嬴與斯。珠宮貝闕世所希。銅鑕十二白玉屏。紝蘭作佩香披披。招搖手掉芙蓉旗。哀彈清瑟和宓妃。大川擊鼓勞馮夷。巨魚踊躍鼉鼈隨。蝦蟹瑣細不得追。廟門開闔風颺颺。千年萬載龍居之野巫。便伺薦酒卮。簫鼓坎坎來宮祠。五彩不辨虺與螭。聊以幻化驚羣迷。嗟我四海久望寬。無復空抱明月輝。好施膏澤雨六合。豈止但慰袁人思。歷階酌水致此辭。追以遺誼傳于詩。才慳語類論甚卑。龍兮謹勿相訶譏。袁州府志

張釜

釜字若量。綱之孫。淳熙五年進士。累遷端明殿學士。簽書樞密院事。

送鶴還齊雲

胎仙誰遣到塵寰。盡日清吟伴我閑。不作沖天支遁想。頗疑攜箭佐卿還。欲追鸞駕煙霞上。肯處雞羣伯仲閒。爲語齊雲好看取。他年我欲訪綠山。茅山志

閻蒼舒

蒼舒字才元。淳熙中以試吏部尙書使金賀正旦見金史交聘表。

皇宋書錄。蒼舒工正書。雄健而有楷則。尤工扁榜。今陳相堯佐家將相堂大字。乃其所書。

贈揚州郡帥郭侯

東南形勝惟揚州。介江負淮作襟喉。有國以來幾百戰。弔古千載空悠悠。哀哉荒王與蕩子。鈍盡鐵劍崇倡優。迷樓九曲爛如畫。珠簾十里半上鉤。當年二十四橋月。曾照三十六宮秋。平山堂上一長歎。但有衰草埋荒丘。歐仙蘇仙不可喚。江南江北無風流。何人復誦廣陵散。黯然悲恨不可收。祇今英主正用武。增五萬竈屯貔貅。金城堅築壯營壘。綺段細錯良田疇。神謨廟算萬全舉。天時既至須人謀。將軍山西名將種。家聲直到青海頭。男兒有死必報國。正當爲上分此憂。勉旃速辦古人事。貂蟬本自出兜鍪。揚州府志

席天祐

天祐樂平人。精醫。嘗從劉武忠軍。采用兵之勢。寓于某。遂成絕藝。

淳熙六年冬醉臥僧房作

霜侵古屋月侵窗。撥盡寒灰夜未央。仗劍起看吳楚分。將星今見幾分光。夷堅志

程端蒙

端蒙字正思。德興人。朱子門人。淳熙七年鄉貢補太學生。對策不合。罷歸。

絕句

滿城塵土汚人甚。出郭青山入眼多。拏取小舟烟霧裏。此生真箇老漁蓑。饒州府志

黃由

由字子由。長洲人。淳熙八年進士第一。寧宗時仕至刑部尚書。兼直學士院。自號盤隱居士。

歸來

歸來三閱月。無事一關心。刈草尋花徑。開池漾竹陰。江邊問明月。天際數歸禽。幸有高賓至。相逢似竹林。  
吳江縣志

莫若拙

若拙仁和人。寓家崇德。淳熙八年進士。

題資福院平綠軒

結屋地猶淺。鉤簾景盡還。嵐光烟樹外。野色酒杯間。別墅從渠樂。清吟屬我閑。狎鷗時點白。機事不相關。  
至元嘉禾志

吳柔勝

柔勝、字勝之、宣州人。淳熙八年進士。屢遷司農寺丞。出知隨州。除祕閣修撰。主管亳州明道官。卒。謚正肅。

春晝

深巷寂無人。鳥聲花塢春。草門長日掩。天地一閑身。宛雅

李廷忠

廷忠、號橘山。於潛人。淳熙八年進士。

游大滌

清溪路入武陵源。雞犬人家隔近村。拔地一峯危作柱。棲雲五洞窄開門。空庭有客掃松影。古徑無人踏。蘚痕我欲白雲巖畔宿。月明一夜聽啼猿。洞霄詩集

陳銘

銘、字日新、玉山人。淳熙八年進士。

春波漁市

瀕溪有居處。兩岸舟競檣。風含水氣腥。曉作漁人市。魚羹何處無。無錢買金鯉。嘉興府志

于革

革、字去非、號竹田。豐城人。淳熙八年進士。知房州。

春晚

舍南舍北草萋萋。原上行人路欲迷。已是春寒仍禁火。棟花風急子規啼。詩人玉屑

詠箋

七八葉蘆秋水裏。兩三箇雁夕陽邊。筆頭到處渾無礙。埽破寒潭一族烟。後村千家詩

清都觀

高崖雨洗月華清。白袷青藤曳復行。老檜不知仙馭遠。屋頭猶帶玉簫聲。南昌府志

俞烈

烈字若晦。臨安人。淳熙八年進士。累除中書舍人。嘉定初知鎮江府。權吏部侍郎。有盤隱詩編。

題清虛堂在臨安淨梵院

天清蠶麥餘綠結桃李實。老僧詩銜袖。過我語言質。懷山意先行。如病夢芝朮。去山才一舍。鞭策不終日。堂簷新結束。空洞無長物。風來舞翠杉。土煖榮病橘。欲行意先清。舌評曠不及。何由解鞍臥。夜枕雨蕭瑟。談元契參同酒旨妙真一懷新。辜雅趣意嬾□健筆亦如罷參僧。野禪縛枯律。咸淳臨安志

孫元卿

元卿樂清人。淳熙八年進士。仕至國子監丞。

與錢孝先游洞霄

元冥相我作山行。捲卻重陰放曉晴。但見峯巒互局鎖。不知宮闕隱崢嶸。雲根洞穴篝燈入。井底波瀾撫掌生。喚客入山還送客。淙琤猶有石泉聲。洞霄詩集

傅誠

誠字至叔，仙游人。嘗從朱文公游。淳熙八年第進士。調永春尉。從侍郎黃艾參政使北。張巖開督府于京口。奏辟幕僚。著述皆出其手。遷太常博士。子彥卿能文。以疾卒。誠哭之過哀。輪對閒卒于殿上。

妙庭觀

在富陽縣董雙成故宅

會宴瑤池阿母家。九霞光繞翠瓊車。坐中一曲山香舞。帽上看看有落花。杭州府志

朱師古

師古、蜀人。孝宗朝著作郎。

句

集英殿上初登第。神虎門前便挂冠。

集

建炎以來朝野雜記。淳熙辛丑孝宗策士。有昌元王昂應祥者。既賜第。調潼川府司戶參軍。自言年踰六十。不願出仕。上嘉之。特賜承務郎致仕。蜀人在朝者。皆以詩送之。著作郎朱師古一聯。最爲的切。

句昌泰

昌泰、蜀人。淳熙中浙東提刑。

題新繁句氏盤溪

客至輒命酌爲言花已開青山長委鬢白骨舊生苔不飲固癡絕能詩宜數來頗憂明日雨紅紫落成堆

成都文類

馮仲柔

仲柔山陰人

淳熙壬寅沿檄游大滌洞天

洞府深沈別有天。葦飛樓閣聳晴烟。詩傳玉局驚凡目。丹就金爐記昔年。翠湧千波橫絕壁。風吹萬籟入飛泉。他年待我功成後。卜室青山絕世緣。洞霄詩集

衛涇

涇字清叔號後樂居士崑山人淳熙十一年進士第一除祕書省正字累官參知政事寶慶二年卒追封秦國公謚文節有後樂集

游澱山湖

疎星殘月尚朦朧。閒入烟波滿棹風。始覺舟移楊柳岸。直疑身到水晶宮。烏鵲天際墨千點。白鷺灘頭玉一叢。欸乃數聲回首處。西山渾在有無中。松江府志

徐得之

得之字思叔夢莘弟淳熙十一年進士有靜安作具徐氏世有史學從子天麟譔西漢會要東漢會要皆行于世

試雙井茶

先生老作宜州鬼。誰與一甌同注湯。至今捧著雙井椀。猶帶是翁書。傳香方與勝覽。

句

迺翁畫灰教兒書。嬌兒赤軒玉雪膚。厥妻曝日補破襦。弊筐何有金十奴。

題晉樂圖 鶴林玉露

謝直

直元名希孟。避寧宗諱。改名直。字古民。台州黃巖人。伋之孫。從陸象山遊。淳熙十一年進士。歷太社令。嘉興府通判。

龐元英談藪。謝希孟與鄉人陳伯益好相調戲。伯益面狹多鬚。希孟見寫真掛壁上。題云。伯益之面大無兩指。髭鬚不仁。侵擾乎其旁而已。於是乎伯益之面所餘無幾。伯益病之。莫能報。希孟後改名直。伯益於是以兩句詠其名。炊餅擔頭挑取去。白衣鋪上喝將來。聞者絕倒。

遺懷寄致道

貧者士之常。富亦我所欲。得常詎可厭。遂欲何由足。荒哉化蠅翁。微歟監河粟。人生命如綫。日須不盈筭。俯仰天地閒。何由謝羈束。

前賢小集拾遺

俞應符

應符字德瑞。錢塘人。淳熙十一年進士。累官參知政事。

曹公疑冢

生前欺天絕漢統。死後欺人設疑冢。人生用智死卽休。何用餘機到丘壘。人言疑冢我不疑。我有一法君未知。直須掘盡疑冢七十二。必有一冢藏君屍。七修類稿

俞應奎

秦皇石在昌化縣百丈山

祖龍盛氣役神鞭。壁立無移只屹然。定是先朝陳寶化。陰靈寂寂笑求仙。杭州府志

高似孫

似孫字續古。餘姚人文虎子。淳熙十一年進士。歷官校書郎。守處州。有疎寮小集。

文獻通考。陳直齋云。似孫少有俊聲。登甲科。不自愛重。爲館職。上韓侂胄生日詩九首。皆暗用錫字。爲清議所不齒。晚知處州。尤貪酷。其讀書以隱僻爲博。其作文以怪澀爲奇。至有甚可笑者。就中詩猶可觀也。

癸辛雜識。高疏察守括日。有籍妓洪渠。慧黠過人。一日歌真珠簾詞。至病酒。情懷猶困姍。使之演其聲。若病酒而困姍者。疎寮極稱賞之。適有客云。卿自用卿法。高因祝洪云。吾亦愛吾渠。遂與落籍而去。以此得噴言者。

入餘杭縣

明發遵西陸。驅車月流光。佳山迎車來。知是古餘杭。危樹露如雨。平野日未陽。支流瀠清源。弱羽無高翔。人家叢灌下。世載山水鄉。扣門作午憩。白飯羞文鯈。邂逅有足歡。離合非其常。主人不予鄙。予留亦徜徉。憩呂化民家

晚程息勞轍。白日流西暉。水鳥得魚去。耘夫荷鉏歸。川原杳芊綿。林野雜依霏。一來叩竹館。相邀入荆扉。重巖吐清溜。澄陰布殘輝。曰予老此室。十世相因依。左右桑果足。歲日雞豚肥。豐猶未至裕。歉亦無能飢。予聞良自愜。欲謀北山薇。有田可同耕。有蠶當共衣。車夫猝無情。此志仍重違。

荅李才翁

素意杳難尋。殘醺屬晚陰。花知西洛事。雁叫北人心。客共艱難盡。詩隨老大深。金陵書不到。消息又沈沈。

荅宇文文學

無能應俗苦皇皇。詩不驚人筆事荒。天下無山如飯顆。人間有水自滄浪。左杯右蟹一舟足。早韭晚菘三  
畝強。莫謂覺來無可嗜。逢人皆自覓花忙。

燕文貴山水圖

道山堂上御府畫。展卷猶能記老燕。十日何由辦水石。千金那可分江天。楚湘兩岸風落木。海嶽三秋雁  
度川。大山小山俱好隱。江南夢去曲肱眠。

荅武昌吳廣文

平生不識武昌樓。官柳青青好在不。庾亮笛吹黃鶴月。簡棲碑駁碧苔秋。山橫赤壁含情斷。水出瞿唐快  
意流。何處叫君同一醉。並舟秦女擘箜篌。

琵琶引

人生聚散難爲別。何況忽忽作胡越。梅梢帶雪下昭陽。明朝便隔關山月。長城不戰四夷平。臣妾一死鴻

毛輕回憑漢使報天子爲妾奏此琵琶聲長安城中百萬戶家家競學琵琶譜酸聲苦調少人知食雪天山憶蘇武西風吹霜雁飛飛漢宮月照秋砧衣嫖姚已死甲兵老公主公主何時歸

銅雀硯歌

曹公夜讌凌雲臺一言契闊含餘哀分香老妓各雲雨歌舞不盡蘪蒿菜漠漠頽基鄰山下萬里烟塵無一瓦井幹尊酒自平生烏鵲飛南播遺雅老農翠雨開荒寒一碟千金苦未乾世人好奇不好近真比周簋仍商盤老璞渾渾殊質魯得水猶能發妍嫋更與人閒作瓌古月明夜盜西陵土

黃居中瀟湘圖歌

天暝而雨斷分作蒼梧九疑之高秋風行而川怒分洩瀟湘洞庭之奔流樹不知名兮山抱複嶺沙不計程兮水趨他洲波作止兮蛟舞蛟蟄雲晦明兮猿呼猿愁原不可作兮蘭亦塵土賈傅歸漢兮鵬其何尤誰呼魚兮北墅有酒誰鼓枻兮南津有舟懷斯人兮杳靄千里目悵望兮吾其歸休

騎鸞引

夜騎白鶴出琳闕千萬仙官鏘佩玦雲雷帖妥過剛風左推日丸右扶月一息瑤池翠水家阿母迎謁龍驅車青娥彈絲玉妃酒折盡蟠桃紅玉花九天丈人來問道太極之前天不老丹霞一氣玉虛宮寶笈金繩容探討井君沐浴波五色洞房光芒上奔日天上傳呼六丁直星斗離闌礙鸞翼以上疎寮小集

由校書郎授徵倅道出金陵投留守吳雲壑

四朝渥遇簪微絲多少恩榮世少知長樂花深春侍宴重華香暖夕論詩黃金籧滿無心愛古錦囊歸有

字奇，一笑難陪珠履客。看臨古帖對梅枝，四朝聞見錄。

絕句

白琯按東臯雜錄作陳天錫

舍南舍北雪猶存，山外斜陽不到門。一夜冷香吹入夢，野梅千樹月明村。

全芳備祖。  
延祥觀

水明一色抱神州，雨壓輕塵不敢浮。山北山南人喚酒，春前春後客憑樓。射熊館暗花扶展，下鵠池深柳拂舟。白髮都人能道舊，君王曾奉上皇遊。

### 聚景園

翠華不向苑中來，可是年年惜露臺。水際春風寒漠漠，官梅卻作野梅開。

武林舊事。聚景園在清波門外。孝宗致養之地。嘉泰間寧

臨幸。有章太后沈香四聖像。小蓬萊閣。瀛嶼堂。金沙井。六一泉。高疎察詩云云。

### 游九鎮

洞門金畫翠琅玕，杏不多花月溜寒。借得御書經自讀，松風淨洗石碁盤。

洞霄詩集。

蟹略。  
汪強中郎中送蟹

連日天街候駕歸，且呼酒對早梅飛。從來吏部高情別，右手分將老蟹肥。

水西

抱崖一水限僧居。空翠冥濛畫不如。落日遊人山窈窕。清風啼鳥竹蕭疎。

詩家鼎鬱

楊嗣勛惠茯苓

道是青神谷。元通白帝厓。有松如壯士。其魄化嬰兒。雲溼侵鴉觜。天寒翦兔絲。堯初香摘髓。秦後雪凝脂。穴動龍蛇窟。山空鳥獸悲。惟將千歲力。自了一生奇。

都下

柳生春思拂京華。不管閑人也憶家。添盡好香那睡得。月痕如水浸梨花。

荅辛幼安

青天不惜日。壯士偏知秋。自古有奇畫。如今空白頭。彼時當再來。吾老不可留。天推璧月上。星入銀河流。躣度若此急。人生與之浮。終夜自起舞。無人共登樓。典謨有陳言。河洛非故州。黃鶴呼不來。誰能理殘裘。  
以上後村詩話

別雲門

回首雲邊更看松。風流王謝舊行蹤。不知誰繼諸賢後。夜半來聽六寺鐘。  
雲門志略

石橋

一石上負崑崙柱。一水西奔牛女渚。玉榦鱗萬松。古夜夜神光干帝宇。石滑苔危水一縷。四海長依開闢雨。月落未落半規吐。雨足敲泉龍擺舞。

蔡山渡

江上人家破竹門。潮生水長浸籬根。鱉魚一尺枇杷小。放溜船來酒滿尊。以上甬上耆舊集

句

汾獻升雲鼎。秦遺蝕雪碑。買硯沙冷雁一二。天長帆有無。曹娥江白浪不侵魚復陣。青苔猶護劒關銘。送蜀客旋作池來分割曲。略教花處似蘇隴。池西後村詩話天差鶴管烹茶水。風夾花吹煮蟹烟。蟹略

莫若冲

若冲、字子謙、若拙弟、淳熙十一年進士、歷官至大理寺丞、丐外除知永州、不赴卒、有語溪集。

初春趙仁父寓資福院平綠軒見招

平綠題詩四十年。尋幽不厭水雲邊。一犁還又耕春後。三白重來醉臘前。自笑挂冠林下客。獲陪揮麈坐中賢。絕嫌幻色撩人思。快覩晴川接遠天。嘉興府志

過崇福院

在青鎮南

首歲融春卜有秋。曉行猶自索貂裘。身閑暫脫微官縛。市隱何如此地幽。一水相望三里近。十年重到片時留。買田擬作終焉計。直是飄然不繫舟。烏青文獻

程卓

卓、字從元、大昌從子、淳熙十一年進士、歷官同知樞密院事、封新安郡侯、贈特進資政殿大學士、謚正惠、有集。

遊金焦二山

揚子長江天際來。中流有山何壯哉。深根盤礴千萬丈。寸土不受雙崔嵬。金山屹據上流險。四面佛屋相環回。來帆去槳別艤舳。住僧過客煩追陪。排空傑閣揖滄海。海山亂點浮纖埃。龍潭列聳石峯巧。獨立野鶴慵啞悽。堂前回首指遺像。坡翁印老留青煤。其人已去詩尚在。唱酬風月相徘徊。再三瞻我二山去。縹渺又入雲濤堆。焦山一望二十里。舟師駕櫓如奔雷。行行滉蕩呼吸頃。繫纜確鑿登山隈。山中僧少竹木古。瘦根迸石穿莓苔。幽姿野態隨步出。勝處往往多樓臺。洪崖路轉尋瘞鶴。幾年浪打風雨摧。遺銘破碎石剝落。摩挲細讀心眸開。同行韻遠心未盡。飛仙亭上傾尊罍。酒酣我爲發絕唱。底須方外求蓬萊。金山志略

雲巖

石門一望路迢迢。五老峯高聳碧霄。泉挂珠簾當洞口。烟拖練帶束山腰。香爐捧出仙人掌。輦輶行過纖女橋。午夜月明天似水。鶴歸松頂聽吹簫。齊雲山志

輩 豐

豐字仲至，號栗齋。其先鄆州須城人。渡江爲婺州武義人。少游呂東萊之門。淳熙十一年進士。嘗知臨安縣。稍遷提轄左藏庫。卒有東平集。

葉水心墓誌云：仲至詩詞半牘，皆清朗，得音外趣。尤工爲詩，多至三千餘首。

曉起甘蔗洲

曉起東風惡。晴嵐忽變昏。船隨山共走。霧與水相吞。鉦鼓遙知寨。桑麻略辨村。雨來無準則。容易溼柴門。

湖嶺下十里是爲黯澹灘行者多至此捨舟

急流方了又高岡。日永周旋未覺忙。壁上字多知店老。嶺邊松茂喜車涼。叢叢亂篠承敲石。帖帖新荷戀小塘。黯澹惡灘應笑我。爲虞魚腹犯羊腸。以上瀛至律體

翠蛟亭泉出天柱之趾。將至洞霄門數折下墜。方盛時如蛟飲澗。亭當木石最奇處。舊取東坡詩語名以舞翠。客謂不若直名翠蛟爲不費答。知宮事王君思明欣然改之爲賦一首。

木石相因依。妙處在得水。遇其相合時。澗蹙水多止。巍巍天柱峯。雙洞空無底。怪石抱山迴。灌木參天起。青蛟走玉骨。元脈貫石髓。曲折暫得伸。掀舞如掉尾。亭成自何年。不陋亦不侈。秋深泉久縮。亭影照清泚。忽遇水飛流。亭入銀濤裏。怒蛟捲亭去。相距不盈咫。一落墜兩谼。力竭勢方已。終疑入江湖。赴海日千里。昨夜山雨號。梧竹盡風靡。轟雷與石鬪。蛟怒幾欲死。吾亭方宴然。清曉見窗兒。因攜一樽來。與客相料理。贋擬畫將歸。題詩卻留此。

翠微亭就亭舉杯落葉滿地知宮王君請和章蘇州落葉滿空山之句

行跡年來到處稀。獨于巖壑有深期。鵝溪道士能相屬。請和空山落木詩。

洞霄卽事

積蘚青踰一寸痕。山靈守護幾千春。長藤橫繫巖邊木。何日重來挂葛巾。以上洞霄詩集

炊熟日有愴松楸

小樓吹斷玉笙哀。春半餘寒去復來。五歲不澆墳上土。望鄉心折刺桐開。

濂洛風雅

楊安誠

安誠字道父蜀人

白帝廟并序

白帝廟神舊傳以爲公孫氏。以余考之非也。公孫氏享國日淺。輒迹未嘗至夔。獨遣田戎任滿戍江關。岑彭入江關。不復爲戍守。公孫氏無從廟食。按酈道元水經注。瞿塘灘上有神廟甚靈。刺史二千石過其下。不敢伐鼓鳴角。恐致風雨。舟人上水以布裹篙足。不令觸石有聲。蓋不謂其神爲公孫氏。瞿塘天下至險。必有神物司之。但有廟偶連白帝城。俗遂從而訛爾。余往來三峽。皆託神之庇。輒爲賦此。庶來者有所考云。淳熙十一年正月晦日。西蜀楊安誠道父書。

蜀江萬壑俱東奔。瞿塘喧豗爭一門。驚濤駭浪建瓴下。顚崖仆谷相呐呑。朋妖窟宅恃幽阻。正晝噴薄陰霾昏。靈宮奕奕鎮地險。衆瀆稟令川祇尊。赤甲後聳黃熊躍。灔澦前峙青猿蹲。舳艤銜尾下吳楚。約束蛟鰐如雞豚。舊傳鼓角致雨雹。裏篙不觸撐舟痕。綜理脈絡盡西徼。帝假之柄攸司存。子陽祚國十年近。此地未省東其轅。連江列炬鐵鎖斷。戎滿奔北無留屯。江關回首盡漢幟。遺黎何自知。公孫血食漢代定不爾。但有故壘山之樊。子美誤信齊東語。感慨勇略招英魂。山川之靈載望秩。僭僞詎可同時論。向來名實久淆溷。薦裸無乃瀆俎膾。請從酈元爲考證。神理昭昭斯可原。全蜀藝文志

謝牧

題洪陽洞石上

特特攜筇探洞房。中藏精氣凜寒芒。神仙久視知難學。乞取逍遙物外方。

淳熙乙巳冬書

遊名山記

馮端榮

端榮崇安令。

題武夷淳熙丙午。

花滿晴烟樹滿雲。我來寧是學仙人。願將九曲溪頭水。散作年年百里春。

武夷詩集

李持國

壽興國守九月三日。

縹緲黃堂擁瑞烟。神光照社記當年。風雲慶會千齡際。萸菊佳辰六日前。蕩節已嘗煩出使。輔藩聊復賴于宣廟堂參贊猶虛位。飛詔行看下九天。

聖宋名臣獻壽集

劉季裴

季裴字少度。福安人。孝宗朝終祕閣修撰。

壽朱守

康鼎談經世少雙。一時文物動虞庠。江湖雖隔金闈籍。衣袖仍聞玉案香。墨客幾年陪畫隼。板輿平日到  
謾堂。時清身健堪行樂。未見荆榛老鳳凰。

聖宋名臣獻壽集

李獻可

獻可、吉水人。

賦宮人午睡

御手指嬋娟。青春白晝眠。粉勻香汗溼。髻壓翠雲偏。柳妒眉閒綠。桃嫌臉上鮮。夢魂何處是。知繞帝王邊。

吉安府志：獻可六歲能詩。孝宗召入宮，時宮人正午睡。帝命爲詩。獻可

卽賦云：帝拊其背曰：何不作我家兒？命宮人繡御掌於背以賜歸。

王正己

正己，四明人。珩之子。淳熙中官太府卿。

題天開圖畫亭并序

姚伯愿使君築亭真州子城西北隅，盡得江山之勝。乞名于四明王正己，因誦山谷天開圖畫卽江山之句，遂以名亭，又爲賦此詩。

夜來殘暑磨西風，秋聲撼撼先井桐。纖雲四卷天開容，一碧萬里磨青銅。使君退食新涼逢，厭看凝寢香雲濃。領客欲送孤飛鴻，城隅高亭溼青紅。曠野四望開心胸，前瞻江山勝而雄。琉璃波光羣玉峯，水墨正爾難爲工。天開地闢今古中，此景自若無初終。天豈爲我施新功，我心得之眼相從。收入几席無遺蹤，錦囊得助防詩窮。李成郭熙將無同，撫掌一笑浮金鍾。儀真縣志

# 宋詩紀事卷五十六

錢唐厲鶚緝

錢唐張四科臨潼陳章勘定

裴萬頃

萬頃字元量新建人淳熙十四年進士嘉定初除吏部架閣遷大理司直力丐外任添差江西撫幹卒有竹齋詩集

歸興

新築書堂壁未乾馬蹄催我上長安兒時祇道爲官好老去方知行路難千里關山千里念一番風雨一番寒何如靜坐茅齋下翠竹蒼梧子細看

娛書堂詩話裴元量性恬退不樂仕以

薦者召爲司直在朝嘗賦歸興云云

閑居

閑居最與性相便勤卽繙書嬾卽眠終日閉門真省事有時面壁似耽禪大椿歲籥祈親壽斷簡生涯聽子傳待問洪崖覓丹訣白雲深處引寒泉以上竹齋詩集

危稹

稹字逢吉號巽齋又號驪塘撫州臨川人淳熙十四年進士歷屯田郎官出知潮州又知漳州忤部使者請祠歸有巽齋小集

借詩話于應祥弟有不許點抹之約作詩戲之

我有讀書癖每喜以筆界抹黃飾句眼施朱表事派此手定權衡衆理析畎澗歷歷粲可觀開卷如畫繪知君篤友于因從借詩話過手有約言不許一筆壞自語落我耳便覺意生械明朝試靜觀議論頗澎湃讀到會意處時時欲犯戒將舉手復止火側禁搔疥技癢無所施悶懷時一噫只可捲還君如此讀不快千駟容可輕君抱亦不隘昨問雞林人尙有此編賣典衣須一收吾炙當痛嘬

經從豐城謁于令侍姬歌舞進酒

蛾眉對酒舞涼伊舞身還逐歌聲齊卷花萬段忽進酒鬪高蝶蝶飛來低

春日卽事

麥風翻隴潑濃綠花露摘枝黏老紅小立樓頭檢春事一絲暖日墜青蟲

郭公

郭公郭公聞爾失國春秋時何事到此猶悲啼郭公前言亡國故當時祇緣臣子誤百年社稷不得歸而今家住柘岡西滿目春風都是恨聲聲說與齊侯知郭亡矣君勉之以上巽齋小集

送柴中行出守章貢

力爲君王乞得州補天未了石還收人才自係國輕重吾道亦關公去留殿角纔辭槐影日船頭便轉荻

花秋競誇祖帳東門外誰識眉攢杜甫愁豫章詩話

宋史本傳嘉定中番陽柴中行去國稹作詩送之。近宰相出知潮州。

### 王居安

居安字資道台州黃巖人淳熙十四年進士累遷右司諫兼崇政殿說書權工部侍郎帥隆興府升龍圖閣直學士卒贈少保有方巖集

吳子良序云公之文明白夷暢絕類其胸襟詩尤圓妥曠遠嘗有句云高下水痕元自定後先花信不須催公於出處去就此二語可以占矣

僧居簡北磵詩集云方巖王侍郎江西破賊歸小舟迫窄自笑曰今爲摺疊侍郎矣

### 送劉改之

不識劉郎莫便語酒酣耳熱未全疎士當窮困能無憚我自斟量媿不如橫槊賦詩俱有分輕裘緩帶特其餘當今四野無塵土宜有奇英在草廬瀛奎律髓

### 潘德久有龍眠三馬而失其一俾予賦詩

三馬往往皆龍駒精神肯與凡馬俱忽不見者其前驅定應飛上天之衢君得其二已有餘我欲與君分此圖驚才患多不患無四十萬疋將何如龍眠已往不可呼愈少愈貴宜寶儲赤城詩集

句

祇教人種菜。莫誤客看花。題園扉後村詩話。

郭

綽

綽、嵊縣人。淳熙十四年進士。

枕流軒

在安吉州嚴真觀。

招提避雨寄孤眠。夜靜溪聲到枕邊。引得五湖清入夢。拍天波浪一漁船。

西吳里語。

王

溉

溉官太府少卿。兼知臨安府。除權兵部侍郎。

淳熙丙午游大滌山

山谷羣峯路屈盤。溪行九折勢蜿蜒。雲根長伴仙人迹。元蓋潛通大滌天。玉殿香銷人寂寂。石壇花落草芊芊。黃冠解識尋幽興。爲洗寒鑄煮碧泉。洞霄詩集。

徐

僑

僑字崇甫。號毅齋。婺州義烏人。淳熙十四年進士。理宗朝仕至工部侍郎。寶謨閣待制奉祠。卒謚文清。有集。

毅齋卽事

白吾齋外付諸兒。除卻詩書總不知。苔色上侵閑坐處。鳥聲來和獨吟時。十分秋色重陽近。一味新涼老

者宜調得身心能自慊止吾所止復何疑濂洛風雅

陳 峴

峴字壽南溫州平陽人淳熙十四年中博學宏辭科賜進士出身官中書舍人直學士院依綠亭

脩林平治久荒埃招領春風一笑回淨掃莓苔分徑岸賸添桃李結亭臺

粵西詩載

林宗放

宗放字問禮宣城人淳熙丁未進士通判廣州乞祠歸

陪郡守游西園

倒影扶闌印碧溪玻璃盤上玉東西落紅那得愁如海舉白難逃醉似泥郎宿高明香霧起客星華耀燭花低波心夜半魚龍舞都轉天風入鼓鼙宛雅

鄭克己

克己字仁叔青田人淳熙中進士仕至福建提刑司幹官

水國

水國烟霞客春來始定居老逢人事嬾貧覺舊交疎隙影窺蟾滴芸香散篋書西湖風月好不到一年餘

送中書王舍人使北

細馬縷金鞍文星使可汗袖中天詔重帳外節旄寒烽火燕城急塵沙朔野寬安邊存大體何必斬樓蘭

### 浙江十六夜對月

急漿寒天闊，長江得月遲。最憐新缺後，全勝未圓時。

青衫

青衫著破禁中羅。楚澤吳江幾度過。仕宦宛如杯水淡。朝廷空有故人多。漁村疎竹明風旆。煙浦斜陽起暮歌。欲買田園歸海上。此身無柰客愁何。以上前賢小集拾遺

旅中遇故人

雲薄清溪水。天寒黃葉風。鄉關三載別。客路一尊同。舊事如昨日。問年俱老翁。相看今夕意。淚冷菊花叢。

詩家鼎臘

繆瑜

瑜字珍叟。龍南人。淳熙進士。官進賢令。有崆峒詩集。

遇災感應詩并序

辛酉歲錢唐火災延燒居民以七萬計。惟吳山上一老翁家獨全。翁平時誦經樂施。火起之夕。以老憊不能去。遣兒與婦令亟走。竟不忍相捨離。處烈焰之中。全家昏然熟寐。至于蒲萄架亦不焚灼。夫善積于平日之間。而孝感于一念之頃。其爲神物護持如此。行道之人。相與言者。必曰蒲萄架。因詩之。以爲世人好善者之勸云。

據故屬者潛炳灾蠱廉縱風相與偕林林生齒七萬戶連甍接棟燒成灰如何老翁一區宅閒不以寸獨

不疾。玉石俱焚，勢應爾。豈有幻術能然哉？聞之翁乃好善者，平時事佛經卷開有餘，必以濟貧乏，不以利欲縛其懷。倉卒遂蒙鬼神護。萬目注視，驚猜厥初，巨燄蒸天起。左顧右盼，如燔柴。翁知無地可脫免，委身甘作爐與煨。麾兒與婦，令亟走。誓死不去，無違乖。全家酣寢，越信宿。如聞大浪聲喧騰，及其夢覺，火亦息。依然一室，當崔嵬。微如蒲萄，不熏灼。而況梁棟與桷樑，蒼蒼表善。有如此餘，自作孽何足哀。作詩誌往，勸來者勿以斯語同優俳。咸淳臨安志

句

有客去遊丞相閣，無人來問孝廉船。

調官

後村詩話云：予初筮仕江西，有老選人繆瑜來訪，有句一聯云云。

李壁

壁字季章，灤子。用父任入官。後登進士第。寧宗朝累遷權禮部尚書、直學士院同知樞密院事。歷資政殿學士。致仕卒，謚文懿。有雁湖集。

使北作

天連海岱壓中州，煥翠浮嵐夜不收。如此山河落人手，西風殘照嬾回頭。

四朝聞見錄：開禧初，韓平原欲興兵，遣張嗣古覘敵。張還大拂韓旨，復遣李壁。壁還與張異辭。階是進政府，壁使北有詩云云。

玉堂留題

雲影沈沈玉一方。倚闌人意似濠梁。獨憐雪裏山茶樹。也向春風伴海棠。咸淳臨安志

酬曾景建

新有千絲明曉鏡。舊無一畫贊宵衣。閑吟此外唯須飲。老覺人間萬事非。後村詩話

青雲亭

平林野水帶孤城。倦客登臨太瘦生。過眼千花競紅紫。可憐霜鬢轉分明。撫州府志

句

一杯謾道愁能遣。幾度醒來錯喚君。悼亡憂時鐵石孤忠在。閱世風花老眼空。送楊子直知吉州 後村詩話

董居誼

居誼字仁夫。臨川人。淳熙進士。歷官四川制置使。奉祠歸。有集。

戚姑山

重上危樓意豁然。倚闌檢點舊山川。身離城郭塵囂裏。眼到雲天杏鶯邊。祇恐老松添歲月。長教脩竹障風烟。回思燈火書窗下。僂指如今六十年。撫州府志

盛璲

璲字溫如。豐城人。領淳熙中鄉薦。以平山寇功授奉節郎。創書院于盛家洲。朱文公嘗過訪。贈以詩。

朱元晦過訪

蒼松翠竹映斜暉。野菊菊花開過客稀。  
葉底黃蟲作寒繭。雨餘蝴蝶滿園飛。  
梅花樹下三閒屋。挂壁枯桐盡日閑。  
有客過門彈一曲。斷雲殘雪滿空山。

皇華紀聞

李 沐

沐字子永，號蘭澤廬陵人。淳熙中嘗爲溧水令，又爲防治司幹官。與兄洪子大、漳子清、弟浙子秀、

沴子召，著《李氏華萼集》。

題甘將軍廟卷雪樓

卷雪樓前萬里江。亂峯卓立森旗槍。  
上有甘公古祠宇。節制洪流掌風雨。  
甘公一去踰千年。至今忠氣猶凜然。  
我來再拜攬塵跡。斜陽白鳥橫蒼烟。

夷堅志：大江富池縣有甘寧將軍廟。殿宇雄偉，行舟過之者必具牲醴，謁李子永嘗自西下舟，次散花洲，有神鷄飛立檣竿，卽遇便風，晡時抵岸，青蛇箭激而來，至舟尾不見。是夕檣泊，明日賽神，其前大樓七間，尤偉壯。郡守周少隱采東坡詞語，扁爲

卷雪子。永作詩云云。初題梁間，本云英威，凜然如有人掣其肘，乃改爲忠氣。

王 亘

亘字伯通，福州人。淳熙間知南恩州。

十洲圖

山川如幻閣長秋。一疊飛來伴九洲。不礙漁樵雙槳過。何妨羅綺四時遊。雲疑泰華分張去。水憶蓬瀛散漫浮。禁苑未知湖海樂。生繪寫取獻中州。延祐四明志

次胡澹菴題挹翠軒韻

西山排闥來周遭自環翠俗眼少見之一覽忘世味平生三徑心盍早賦歸計縱落塵土居不與草木敝公餘事幽尋清風拂衣袂最喜軒中人所挹多爽氣蓬蒿天地寬萬境發詩思白雲未能閑時出過窗几簷花聽夜雨池草生春媚山靈若相知好風爲裂皆餘光雖力挽回次那得致肇慶府志

韓彥古

彥古字子師延安人蘄王世忠之子淳熙中知平江府終敷文閣待制戶部尚書

大智院明月巢在富陽縣

清風去無塵白雲來無心一笑玉溪上落花流水深杭州府志

黃敏德

敏德號存菴淳熙中句容令

入洞霄九鎖路開

綠蘿垂地白日暗落葉滿徑行人稀青童走入報迎客驚罷先生一局棋

舞翠亭觀泉

坐來毛骨覺蕭然百尺飛流下碧天杯酒未終身世換盡移三峽到尊前以上洞霄詩集

程九萬

九萬字鵬飛。池州人。淳熙閒知武康縣。有賢名。慶元中守歷陽。有集。  
重建東堂前令毛滂建

宦游偶落雲水鄉。恥以貪墨爲吏商。三年寄傲南窗月。一瓣爲炷東堂香。翛然清風揖佳客。好古博雅真揚揚。舊題湔祓古寺壁。濁酒呼索鄰家牆。淋漓醉墨鸞鳳舞。警語峭厲凌冰霜。大碑小碣共檢校。次第安置堂中央。竭來弦歌有餘暇。逸興贋欲希韓湘。

證道寺追和毛澤民韻

二載塵勞薄宦身。雙峯幾憶舊家鄰。甫能再上陽城考。更有一年孤負春。以上武康縣志

葛 鄭

鄂立方長子。淳熙中以朝奉郎判鎮江。

留友人

良友久閒闊。春事遽如許。勞君下鷗沙。一葉繫春渚。昨夢墮前山。再見欣欲舞。聊呼花底杯。酒面點紅雨。狂歌謝貫珠。清論雜揮麈。驪駒未可歌。妙句須君吐。韻語陽秋

杜 旗

旗字伯高。金華人。嘗登呂成公之門。淳熙開禧閒。兩以制科薦。有橋齋集。

白頭吟

長安春風萬楊柳。新人妖妍舊人醜。貧賤相從富貴移。舊時犢鼻今存否。長門作賦價千金。不知家有白頭吟。金華雜識

句

君勿笑新亭相對泣。卻勝蘭亭暮春集。

題蘭亭序 後村詩話

劉孝韙

孝韙字正夫。乾淳閒以門蔭仕。累官直祕閣。提舉兩浙常平。除直徽猷閣。

題余山宣妙寺

水定浮春岫。鴉盤落遠林。上方鐘送夕。隱几興何深。松江府志

吳億

億字大年。蘄春人。仕至靜江倅。有溪園集。

磨崖中興頌

借問江頭人釣魚。爲言靈武事何如。磨崖豈是當時意。兩字噫嘻金鏡書。浯溪集

錢聞詩

聞詩字子言。成都人。淳熙中知南康軍。有廬山雜著。

題米元暉瀟湘圖

太湖水入霅溪寒。疊嶂連山幾萬般。此景古今無盡藏。總歸嬾拙一毫端。郁氏書畫題跋記

錢聞禮

聞禮、嘉興人、第進士。

簡寂觀

先生舊隱在廬山。幽谷千年竹萬竿。偃松拂盡煎茶石。苦笱撐開禮斗壇。方輿勝覽。  
章甫

甫字冠之。鄱陽人居真州。有易足居士自鳴集。

貴耳集。冠之多從于湖交游。飄蕩不受拘羈。淳熙間淮  
有三士。舒之張用晦和之。張進卿真之。章甫冠之也。

寄荆南故人

餘生自拚一虛舟。未害尋詩慰客愁。梅欲飄零猶醞藉。柳纔依約已風流。關心弟妹無黃犬。入夢江湖有白鷗。別後故人相念否。東風應憶仲宣樓。貴耳集

湖上吟

誰家短笛吹楊柳。何處扁舟唱采菱。湖水欲平風作惡。秋雲太薄雨無憑。近人白鷺塵方去。隔岸青山喚不磨。好景滿前難著語。夜歸茅屋望疎燈。前賢小集拾遺

林升

升淳熙時士人。

題臨安邸

山外青山樓外樓。西湖歌舞幾時休。暖風熏得遊人醉。直把杭州作汴州。西湖餘志

俞國寶

國寶、臨川人。淳熙太學生。有醒菴遺珠集。

武林舊事淳熙間德壽三殿遊幸湖山一日御舟經斷橋旁有小酒肆頗雅潔中飾素屏書風入松一詞于上光堯駐目稱賞久之宣問何人所作乃太學生俞國寶醉筆也其詞云一春長費賞花錢日日醉湖邊玉聰慣識西湖路驕嘶過沽酒樓前紅杏香中歌舞綠楊影裏鞦韆東風十里麗人天花壓鬢雲偏畫船載取春歸去餘情在湖水湖烟明日再攜殘酒來尋陌上花鉢上笑曰此調甚好但末句未免儒酸因爲改定云明日重扶殘醉則迥不同矣卽日命解褐

山茶

花近東溪居士家。好攜樽酒款攜茶。玉皇收拾還天上。便恐筠陽無此花。全芳備祖

許尙

尙華亭人號和光老人。生淳熙閒有華亭百詠。

華亭百詠存十首

陸機葺在谷水東吳陸遜生二孫常于此遊獵今名桑陸又名吳王獵場

二陸爲童日馳驅屢忘歸至今桑柘響禽鳥尙驚飛

三女岡

三殮知無有。香魂計已銷。頻來吟楚此。歲久若爲招。

征北將軍墓。即陸禕墓，在崑山有碑。村人疲于官吏征索，遂碎其碑。

崎嶇尋古隧。衰草隱寒原。欲讀將軍事。豐碑祇半存。

### 顧亭林

旦暮潮流急。東西徑路斜。無從質疑字。共屬野王家。

白龍洞。在橫雲山頂下通澱山湖。每風雨夜，有龍出入洞中。

呼吸湖中水。山椒寄此身。洞門風雨夜。電火逐霜鱗。

愈塘。府東五里。往來之舟皆可揚帆。諺云：雖有珠千斛，不賣愈塘北。

延袤三鄉外。東流與海通。河神屢加惠。帆借往來風。

普照寺。晉陸機捨宅爲寺。

高門收畫戟。卽此見精藍。施予恩雖在。緇流絕不談。

陸瑁養魚池。卽西湖也。今爲放生池。

誰得陶朱術。修治一水寬。皇恩浹魚鼈。不復敢垂竿。

唳鶴灘。湖之東南隅。

養鶴人何在。湖邊水尙清。喚回中夜夢。灘上戛然聲。

湖光亭風月堂之西。

日暮蝦鬚卷亭中雅燕開微風起蘋末波影動尊罍以上華亭百詠

陳善

善字敬甫號秋塘淳熙閒豪士有雪篷夜話

句

不知筋力衰多少但覺新來嬾上樓吹劍錄

春風一日歸深院巫峽千山鎖暮雲書貴家扇聞說平生輔漢卿武夷山下啜殘羹送輔漢卿過考亭以上貴耳錄

童敏德

敏德臨川人生乾淳閒不仕

湖州題顏魯公祠堂

挂帆一縱疾于烏長興夜發吳興曉杖藜上訪魯公祠一見目明心皦皦未說邦人懷使君且爲前古惜忠臣德宗更用盧杞相出當斯位誠艱辛生逆龍鱗死虎口要與乃兄同不朽狂童希烈何足罪姦邪嫉忠奸渠手乃知成仁或殺身保身不必皆哲人此公安得世復有洗空凡馬須騏麟

容齋三筆云

語意超拔

許玠

玠，字介之。襄邑人。有東溪詩稾。自註按劉後村云：端平以來，與江西曾無疑、金華杜叔高、九華葉子真同聘召之士。有衡陽許介之。蓋介之南渡寓家衡陽，晚年始被召也。

### 染絲上春機

錦江之水來蜀西。女紅染絲上春機。可憐欲織未織時。思君意緒如亂絲。亂絲尙可理。妾愁渺無際。寒窗輒千萬梭。斷魂隨梭暗來去。蕩子醉花月。妾幸鸞鏡妝。寒螢只解趣機杼。爭卻情如刀劍傷。織成回紋詩。寄與白玉郎。願郎勿棄置。上有雙鴛鴦。覲看雙鴛鴦。忍教孤妾守空房。梅磾詩話。

### 漢宮春夜

虛輪絢采千門外。窗眼滲光金箔碎。渴烏滴水續銅壺。簷馬呼風搖玉佩。宮車聲斷翠箔幽。珠簾閑卻珊瑚鉤。眉山兩點亦何有。中鎖萬斛相思愁。蜀羅蜜炬光明滅。紅淚難濺守宮血。遙夜春寒聽曉鐘。角聲滿地梨花雪。詩家鼎臯

趙希弁讀書附志云：周益公嘗親寫許介之漢宮春夜朱陵洞詞古離別出塞曲四篇而跋之。

### 吳琚

琚字居父。號雲壑。汴人。憲聖太后之姪。太寧郡王益之子。歷尚書郎。部使者直學士。慶元閒以鎮安節度使留守建康。遷少保。卒謚忠惠。有雲壑集。

佩楚軒客談。吳琚節使  
善雷琴。號九霄環佩。

書史會要吳居父太寧郡王益之子世稱吳七郡王性真嗜好日臨古帖以自娛字畫類米芾以詞翰被遇孝宗大字極工

續光宗詠安榴

細疊輕綃色倍釀晚霞猶在綠陰中光宗春歸百卉今無幾獨立清微殿閣風瑤

四朝聞見錄孝宗崇憲聖母弟恩故稱瑤兄弟曰哥光宗體孝宗之意故稱瑤兄弟曰舅瑤尤被聖眷後苑安榴盛開光皇以黃團扇自題聖作二句命瑤足成上稱歎久之

劉光祖

光祖字德修號後溪簡州陽安人登進士第寧宗朝遷起居郎右文殿修撰終顯謨閣直學士提舉嵩山崇福宮謚文節有鶴林集

鶴林寺

竹院逢僧話山門掃地迎英雄猶有迹般若太無情玉樹春陰密琅玕晚暑清半年來往屢只合送行旌

鶴林寺志

張準

荅知江陰軍

題天慶觀碧玉堂張安國書扁

清曉叩元關冕時簪已斑何如閑道士隔竹看君山咸淳毗陵志

任璡

璡字國器黃巖人淳熙中上舍釋褐授校書郎

山居歲暮

讀龍羲文先後天蕭然一室裏寒烟山中歲月那知得但見梅花又一年

黃巖英氣

何坦

坦東陽人淳熙閒官沿海制置司幹辦公事

乞蜂兒榧于郭德誼二首

味甘宣郡蜂雛蜜韻勝雍城駱乳酥一點生春流齒頰十年飛夢繞江湖  
銀甲彈開香粉墜金盤堆起乳花圓乞君東閣長生供壽我北堂難老仙

乞釀于郭伯瞻

洗醕試邀從事釀臥轡忽報步兵廚良辰不與清樽共今夜儻羞明日無未論一缸分雪乳已拚千日醉  
雲腴宜黃漫尉今狂甚聽我酣歌入五湖

以上石洞遺芳集

吳有定

九鯉湖

昔聞九仙靈今登九仙地裊裊一爐香寥寥千載事九鯉湖志

葉時

時字秀發仁和人晚居嘉興淳熙中進士官終龍圖閣學士有竹埜詩集  
還桑澤卿蘭亭考

書法光芒晉永和後來摹寫不勝多考論又得桑夫子蘭渚風流轉不磨

攢李詩繫

傅子平

子平淳熙中鳳州守

絕句

珍珠不見小槽紅遐想柔荑剥嫩葱唯有萬條羅帶綠年年依舊舞春風

鳳縣志鳳之爲州當秦蜀之衝以手柳酒三絕名世風塵一  
起號爲邊鄙者四十餘年淳熙初鳳州守傅子平詩云云

# 宋詩紀事卷五十七

錢唐厲鶚輯  
錢唐金京勘定

張栻

栻字敬夫廣漢人浚子以蔭補官孝宗朝歷左司員外郎除祕閣修撰歷知江陵府荆湖北路安撫使卒嘉定中謚曰宣從祀大成殿有南軒集

謁陶唐帝廟詞

宋淳熙四年靜江守臣張某旣新陶唐帝祠以二月甲子率官屬祇謁祠下再拜稽首退而歌曰  
溪交流兮谷幽山作屏兮曾丘木偃蹇兮枝相樛皇胡爲兮于此留藹冠佩兮充庭潔芳馨兮載陳純衣兮在御東風吹兮物爲春皇之仁兮其天四時序兮何言出門兮四顧渺宇宙兮茫然

胡文定公碧泉書堂

在崇安縣籍溪

入門認碧溪循流識深源念我昔此來及今七寒暄人事經幾變寒花故猶存堂堂武夷公道義世所尊永袖霖雨手琴書賁丘園當時經行地尙想笑語溫愛此亭下水炯若玻瓈盆晴看浪花湧靜見潛鱗翻朝昏遞日月俯仰信乾坤因之發深感倚檻更無言

三月七日城南書院偶成

宋詩紀事

卷五十七

一四六三

積雨欣始霽。清和在茲時。林葉旣敷榮。禽聲亦融怡。鳴泉永不窮。湖風起淪漪。西山卷餘雲。逾覺秀色滋。層層叢綠閒。愛彼松柏姿。青青初不改。似與幽人期。坐久還起來。隄邊足逶迤。游魚傍我行。野鶴向我飛。敢忘昔賢志。亦復詠而歸。寄言山中友。和平詩。

朱子跋云：久聞敬夫城南景物之勝，常恨未得往游其間。今讀此詩，便覺風篁水月去人不遠。

題榕溪閣  
昔山谷南遷，維舟榕下，後人爲作榕溪閣。

寒溪澹容與。老木枝相樛。其誰合二美。名此景物幽。太史昔南驚。於焉曾少休。想當下榻時。請與耳目謀。品題信要領。亦有翰墨留。我來訪遺址。密竹鳴鉤輞。稍令舊觀復。還與佳客遊。樹影散香篆。水光泛茶甌。市聲不到耳。永日風颼颼。所忻簿書隙。有此足夷猶。平生丘壑願。如痼不可瘳。雖知等喧寂。終覺靜裏優。更思濯滄浪。榕根浮小舟。

故太子詹事王公挽詩十朋

大節元無玷。中心本不欺。排姦力扛鼎。憂國鬢成絲。方喜三旌召。俄興一鑑悲。西風吹淚眼。吾豈哭吾私。睿主龍飛日。如公舊學臣。忠言關國計。清節映廷紳。歲月身多外。江湖澤在民。當年遺直歎。千古更如新。  
題城南曰：盛按此首本集不載。

城頭望西山。秋意已如許。雲影度江來。霏霏半空雨。

東渚

團團凌風桂宛在水之東月色穿林影卻下碧波中

麗澤

長哦伐木篇佇立以望子日暮飛鳥歸門前長春水

濯清亭

芙蓉豈不好濯濯清漣漪采去不盈把悵惆暮忘飢

西嶼

繫舟西岸邊幅巾自來去島嶼花木深蟬鳴不知處

采菱舟

散策下亭阿水清魚可數卻上采菱舟乘風過南浦

以上南軒集

鶴林玉露云六詩平  
淡簡遠德人之言也

馬上口占

向來一雪壓霾昏曉跨征鞍傍水村七十二峯皆玉立巍然更覺祝融尊

方廣寺睡覺

僧舍孤衾寄此情莊生夢破梵鐘聲浮漚蹤跡原無定惆悵西風一夜清

十六日下山各賦二篇

存一

歸袂隨雲起。籃輿趁雪明。山僧可留客。世故卻關情。小倚枯藤杖。聊聽絕澗聲。如何山下客。一笑已來迎。

以上南岳倡酬集

書花光墨梅

一枝已清妍。交枝更媚嫵。見之已愁絕。那復隔烟雨。錢唐千頃春。想見西津渡。他日到南屏。莫忘孤山意。

題王介甫遊鍾山圖後

林影溪光靜自如。蕭疎短鬢獨騎驢。可能胸次都無事。擬向山中更著書。以上聲畫集

劉芮

芮字子駒。東平人。官永州決曹掾。有順寧集。

敬夫寄斜川詩敍往年之約殊不知芮今病矣非如昔時獨心心不忘耳勉和一章以敍謝意  
病著不任事淹臥心自休。經時不出門。況復斜川遊。每覩節物換。悅驚時序流。少年喜追逐。聚散水上鷗。  
沈舟枯木畔。風帆春樹丘。我病正爾許。懷念老朋儔。有酒不能飲。徒有獻與酬。故人酌佳日。亦復我念否。  
佳章寫懷抱。一讀寬百憂。吾君念遠民。歸計未易求。式古堂書考

薛季宣

季宣字士龍。永嘉人。起荆南帥辟書薦爲大理寺主簿。歷大理正。出知常州。有浪語集。

遊竹陵善權洞

萬古英臺面。雲泉響佩環。練衣歸洞府。澗水倒流入水洞中。香雨落人間。蝶舞疑山魄。花開想玉顏。幾如禪

觀適遊鯪戲澄灣寺故祝英臺宅唐昭義帥李蠻嘗見白龍出水洞而爲雷雨今小水洞存鱣魚四足。

左右蝸蟹戰晨昏燕蝠爭九星寧曲照三洞獨何營世事嗟興喪人情見死生阿誰能種玉還爾石田耕山有三洞九斗壇故更寺觀者不一再有李後主斷還僧寺批札石記語極可笑大水洞有石田數十町奇絕

### 觀岳侯石像

萬死何如獄吏尊威名蓋世古難存二桃豈是功高賜一舸不容身退論幾爲飲江思道濟謬因圖像削王敦沈碑千古蛟川恨留與無窮客斷魂以上浪語集

王彥和

彥和崇德人

### 題扇

天邊一線征鴻沒山色淺深墨未勻別浦漁舟待歸去夕陽渡口兩三人

嘉興府志彥和書此于中貴人扇上  
光堯見之稱賞令盡進所作賜金帛

### 游次公

次公字子明建安人號西池定夫諸孫禮部侍郎操之子范石湖帥桂林日參內幕有唱酬詩卷

漁父

竹裏茅茨竹外溪粼粼白石護漁磯想應日日來垂釣石上蓑衣不帶歸詩人玉屑

宋詩紀事

卷五十七

一四六七

畫虎圖

平生射虎裴將軍。馬獰如龍弓百鈞。手撚白羽旁無人。注虎使虎不敢奔。須臾叢薄爛斑出。人馬不知俱辟易。矢如蓬蒿弓減力。將軍得歸幾敗績。徐行爪牙無不露。耽耽垂頭若微顧。尾翦霜風林葉飛。倏忽山頭日光暮。包家畫出眞於菟。我尙不敢編其鬚。昔人作詩譏畫圖。吁嗟畫圖今亦無。合璧事類別集。

未陽道中

山頭磴石危梯險。山下荒田野草悲。更著秋風吹兩鬢。不消幾日盡成絲。詩家鼎鑿

潘時

時字德卿。良貴之兄子。李莊簡光之壻也。孝宗朝官至尙書左司郎中。

嚴先生祠

古屋巔巖上。荒祠落葉中。乞靈無俗駕。垂世有高風。鳥語谷相答。魚游溪若空。徘徊欲忘去。船背夕陽紅。

鈞臺集

張鎡

鎡字功甫。號約齋。西秦人居臨安。循王諸孫官奉議郎直祕閣。有南湖集。

誠齋詩話。功甫詩斷橋斜取路。古寺未關門。絕似晚唐人。詠金林檎花云。梨花風骨杏花妝。寫物之工如此。予歸自金陵。功父送末章云。何時重來桂隱軒。爲我醉倒春風前。看人喚作詩中仙。看人喚作飲中仙。此詩超然矣。

楊誠齋贊功甫像云香火齋祓伊蒲文物一何佛也襟帶詩書步武璫瑤又何儒也門有朱履坐有桃李一何佳公子也冰茹雪食凋辭月魄又何窮詩客也約齋子方內歟方外歟風流歟窮愁歟老夫不知君其間之白鶲

### 謝李仁父送茯苓

岷峨山中千歲松枝蚪幹直摩青空。雪霜剥落中不槁。膏液下與靈泉通。龜跼鳬伏自磊砢。金堅玉凍仍豐融。篝燈夜取喜得雋。煮鼎朝聽如吟風。杵成坐上香霏雪。更和乳酪收全功。當知至味本無味。子若服之壽無窮。巽巖脊梁硬如鐵。冠峩切雲佩明月。百好都隨春夢空。大業獨傳鴻寶訣。中宵咀嚼不搖頭。玉池生肥咽不輟。憐我百慮形早衰。裹贈扶持意何切。丹砂著根謾爾傳。脂澤釀黍計已拙。由來妙道初不煩。此法莫從兒輩說。徑思舉袂揖浮丘。下視塵世真一喎。朱顏留得亦何爲。追逐同堅歲寒節。全芳備祖

### 游九鎖山

九鎖非凡境。烟雲路不分。山寒長帶雨。洞古不收雲。夜宿聽林鶴。晨炊摘野芹。黃冠皆好事。添炷石爐熏。涼蟬亂叫。朝暮雨獨鶴不迷。前後山芎葉煮湯勝茗椀。栗花然火照松闌。洞霄詩集

### 釣臺

絳衣騎日扶桑上。三精九縣開靈貺。趙梁雍代跡俱空。馮吳寇鄧勳相望。客星何處潛光芒。雙臺疊巘摩穹蒼。釣絲千丈捲烟雨。俯瞰一碧玻璃江。羊裘坐穩無心動。蒲輪纏幣知何用。故人聊爲小周旋。君房謬欲相推送。寥寥歲月今幾秋。山寒松吹多颶颶。春來日暖花氣發。極浦浪轉魚龍遊。先生有臺人共高虛庭。忍見生蓬蒿。斷碑敗壁蠶荒蘚。灌木野鳥捐枯巢。一朝鐘梵交雲際。簷楹改觀輝杉桂。非關好事取時

名此中恥但稱能吏。卻經祠下羅清樽。試歌此詩當招魂。先生出兮佩蘭蓀。明璣耀旛駕瑤璠。黃麟道前翠蚪奔。先生去兮山雲屯。玉妃金童從。纊紛吹簫鼓瑟聲冥冥。目斷暮靄棲遙林。釣臺集

宿吳江塔院

宿雲蔽空溪冥濛。我船曉繫紅蓼叢。破程約涉一舍外。遠目未快千山供。岸旁小店換馬去。檀裘障冷披蒙茸。須臾巾蓋不容展。莽莽暗霧逢。逢風偕行客。輿屢掀簸。適值官騎來。憧憧弓刀負。帶競硯硯。驅驅駢駒驅。驄爭前迭進。步殊窘。迫暮始望橋。垂虹石塘百丈捍。駭浪閒有灘磧。紛漁筒。鴉羣黑白混。鷗起颯影亂。點還波中。筆牀茶竈住此地。得句未必慚龜蒙。浮圖老屋且投宿。解擔正聽黃昏鐘。紗籠炙燈照佛古。蘭席布榻便吾慵。悅驚足履未游地。逸興恐失難重逢。案邊紙盡莫翻寫。不覺紅日看生東。百城烟水

句

燕子初歸曾識面。牡丹未放已知名。桐江續集一櫂徑穿花十里。滿城無此好風光。玉照堂觀梅 齊東野語

曾覲

覲字純甫號海野老農。汴人。紹興中以寄班祇候與龍大淵同爲建王內知客。孝宗受禪以潛邸舊人除權知閣門事。淳熙中除開府儀同三司加少保體泉觀使。

老學卷筆記。曾覲字純甫。偶歸正官蕭鵠巴來謁。既退復一客至其所狎也。因問曰。蕭鵠巴可對何人。客曰。正可對曾覲肺覲。以爲嫚已。大怒與之絕。

玉環山 在太平縣西南楚門港中原名木榴山避錢王諱改焉。

天寶風塵暗兩京。禍從妃子笑中生。玉環兩字真堪惜。好與青山改別名。台州府志

題楊補之雪梅卷

筆端造化出天巧。寫出江南雪壓枝。誰道春歸無覓處。橫斜全似越溪時。式古堂畫考

龍大淵

大淵紹興中與曾覲同爲建王內知客。孝宗受禪自左武大夫除樞密副都承旨。知閣門事。出爲江東總管。

齊東野語。思陵妙悟八法。留神古雅。當干戈俶擾之際。訪求法書名畫不遺餘力。又于榷場購北方遺失之物。故紹興內府所藏不減宣政。惜乎鑒定諸人如曹勛。龍大淵。張儉。鄭藻。平琰。黃冕。魏茂實。任源等人品不高。目力苦短。凡經前輩品題者。盡皆拆去。故今御府所藏多無題識。其源委授受歲月考訂。邈不可求。爲可恨耳。

遊九鎮

峯巒九鎮路。纏盤翠色靄。衣作晚寒日。暮神仙歸洞府。雨餘星斗下天壇。人生何用千鍾貴。老去須求一室安。會得谷神元不死。世間何事可相干。洞霄詩集

彭九萬

九萬字好古。崇安人。淳熙閒國學立禮齋長。

凌波辭

歲芳兮婉冉悲江空兮蘭柂歸人嬋媛兮胡來遲憺風魂兮佩誰思素衣兮儼黃裏玉襦兮蒙翠被明波渟渟兮渺愁予含香懷春兮中心苦昔遺襍兮今契闊佇佳期兮宵脩絕幻塵緣兮譽中憂時既晏兮不可留汎雲輶兮水裔糲予瑟兮難理人奚歸兮路蒼茫湘有臯兮春綠起萬姓統譜

楊炎正

炎正字濟翁廬陵人鶴按炎正工詞有西樵語業一卷毛氏汲古閣刊本誤作楊炎號止濟翁予見舊鈔本作楊炎正濟翁是炎正其名濟翁其字也今考武林舊事有楊炎正詩全芳備祖有楊濟翁詩即是一人毛氏之誤可見矣

錢唐迎酒歌

錢唐妓女顏如玉一一紅妝新結束問渠結束何所爲八月皇都酒新熟酒新熟浮蛆香十三庫中誰最強臨安大尹索酒嘗舊有故事須迎將翠翹金鳳烏雲髻彫鞍玉勒三千騎金鞭爭道萬人看香塵冉冉沙河市琉璃杯深琥珀濃新翻曲調聲摩空使君一笑賜金帛今年酒賽真珠紅畫樓突兀臨官道處處繡旗誇酒好五陵年少事豪華一斗十千誰復校黃公壚下謾徜徉何曾見此大隄倡惜無顏公三十萬往醉金釵十二行

武林舊事行都官酒庫每歲清明前開貳中秋前賣新先期諸庫呈樣點檢所以呈府既中擇日開沽以白布三丈餘揭竹竿頂題曰某庫選到酒匠某人醸造上等釀辣無比高酒三五人扶之而行以鼓樂妓女雜技前導聯鑼穿市觀者如堵酒匠

則紫衣新巾乘馬從之以府中所賞綵帛錢會銀椀駄賀馬前謂之迎酒楊炎正詩云云

桂花

翠圍侍女擁紅幢。霞臉調朱笑額黃。共醉東君千日酒。更翻西母九霞觴。人間天上高低影。月下風前自在香。輸與廣寒宮裏客。年年綠鬢賞秋光。全芳備祖。

蘧老寄龍涎香

瘴海驪龍供素沫。蠻村茉莉挹清滋。微參鼻觀猶疑似。全在爐烟未發時。翰墨大全。

龐謙孺

謙孺字佑甫。籍之曾孫。南渡居吳興。有白蘋集。

奉使過汴京作

蒼龍觀闕東風外。黃道星辰北斗邊。月照九衢平似水。胡兒吹笛內門前。詩人玉屑。

郊居九日

樹夾門方正谿侵岸欲墮。水搖雲影動。風抑鳥聲回。籬缺舟常過。庭空客不來。故人經歲月。又見菊花開。  
前賢小集拾遺

時瀾

瀾號南堂。從學呂成公之門。

從先生明哲道中呈伯廣炳道

燕子楊花各自飛。雨乾溪路綠初肥。無人會得風零意。可是千年瑟竟希。濂洛風雅。

王子俊

子俊字才臣號格齋廬陵人周益公楊誠齋之客以薦官成都帥幕有三松集

代漕使讌賀帥平蠻轉官樂語

紫橐仙人雲錦裳碧油幢下受降羌三邊外掃烟塵靜一札中含雨露香天上卽歸扶日轂尊前莫惜醉霞觴主賓情分今如許飲罷相攜入帝鄉三松集

賀彥澤新得子

君不見白居易五十八歲方得嗣當時立名曰阿崔香綳繡襦胎髮膩又不見元微之五十八歲方生兒當時立名曰道保可望成家得力時西隣有親曰彥澤天與明珠堪愛惜今年年方四十三甲庚少似唐元白葛仙溪前燕子樓燕子未老人風流一年一度作湯餅但願年年逢麥秋翰墨大全

句

大兒阻飢頗廢書小兒忍寒粟生膚婦縱有裨無一襦不敢緣此相庸奴題貧樂圖和徐思叔韻鵝林玉露

來梓

梓字子儀

四朝聞見錄來子儀與周洪道實布衣交洪道爲樞使子儀入都訪洪道館于嘉會門外表忠觀置酒極歡示以近詩子儀盡卷笑曰周樞使詩也非周洪道詩也洪道問所以子儀曰昔徐師川少工詩晚爲樞府詩寢不逮昔人以爲向來徐師川詩後

自是徐樞使詩。  
洪道笑而容之。

子猷訪戴圖

四山搖玉夜光浮。一舸玻璃凝不流。若使過門相見了。千年風致一時休。

杜甫遊春

典盡春衣不肯歸。熊兒扶道瀼溪西。傷時懷抱深于海。掠眼風光醉似泥。以上前賢小集拾遺。

沈約之

挽張于湖

氣概凌雲孰敢先。中興事業冠英躔。朝廷議論一言定。翰墨風流四海傳。恰跨鼈頭升紫闕。忽騎箕尾上青天。竹林笑傲今陳迹。撫櫻江臯涕泫然。錦繡萬花谷

施士衡

士衡字德求。湖州人。嘗爲宣州簽幕。有同庵集。

挽張于湖

十年帥鉞倦馳驅。適意方謀一擊居。賈誼有才終太傅。薛收無壽處中書。傷心風月江山在。過隙光陰夢幻虛。紅紫飄零春色盡。後凋松柏獨蕭疎。錦繡萬花谷

姜特立

宋詩紀事

卷五十七

一四七五

特立，字邦傑，麗水人。靖康中，父綬死難，補承信郎。孝宗召爲太子春坊。光宗卽位，除知閣門事。累官浙東馬步軍副總管、慶遠軍節度使。有梅山彙續稿。

和陸放翁見寄

遙知三徑長荒苔。解組東歸亦快哉。津岸紛紛羣吏去。船頭衰衰好山來。平時佳客應相過。勝日清尊想屢開。若許詩篇數還往。直須共挽古風回。

和陸郎中放翁

午庭風雨撼高槐。一洗城頭十丈埃。老子坐閒尋句好。故人門外寄詩來。勁鋒久服穿楊妙。鈍思深慚擊鉢催。清佩左符君未可。要聽吟思發春雷。

寄汪尙書

大猷

五十年閒歎闊疎。相忘兩地復江湖。書來筆底驚強健。詩去吟邊想步趨。好對青山看歌舞。莫嫌紅粉笑  
懿鬚。鳳毛已有哦松韻。尙記金華舊範模。

冬夜不寐

宵柝迢迢警睡魔。靜思廿分老林坡。忍胞向有嵇康嬾。扣角曾無寧戚歌。不起妄心思世事。祇將閑意養天和。時人休說長生術。學著長生事轉多。

李仲永墨梅

寫竹如草書。患俗不患清。畫梅如相馬。以骨不以形。墨君曩有文夫子。蟬腹蛇跗具生意。當時一派屬蘇

公雨葉風枝略相似花光道人執天機信手掃出孤山姿陳元幻卻西施面此妙俗人那能知近時賞愛楊補之補之嫵媚不足奇李生于梅卻有得高處自與前人敵倒暈疎花出苦心暝雲暗谷藏春色我一見之三歎息意足不暇形模索君若欲求之點畫胡不去看江頭千樹白

漁舍新成

旋規漁舍傍溪山山轉溪迴翠竹閒閑看羽觴行詰曲戲拈竿線弄潺湲浮家不入分風浦歸棹休轉落照灣漫說五湖烟浪好幾人險處得心閑以上梅山續稿

方孝能

孝能福州司理

福唐元夕

街頭如畫火山紅酒面生鱗錦障風佳客醉醒春色裏新妝歌舞月明中  
薄薄春衫新縷金樽前風細怯輕陰酒香隱約生紅粉正與桃花共淺深  
燈外風搖沾酒旆月中人數買花錢少年心緒如飛絮爭逐遺香拾墜鉏

淳熙三山志

張履信

履信字思順號遊初鄱陽人侍郎南仲之子嘗監京口鎮官至連江守

飛來峯

飛來何處峯木杪夜千尺愁猿喚不磨月色同一白

冷泉亭

水石一闌干。僧歸四山靜。攜琴譜淵泉。月浸夜深冷。

翠微亭

朝朝烏北出。夜夜烏南歸。所謀在一食。所息在一枝。人生竟何得。與烏同此機。身世忽過慮。泉石良自怡。月上飛來峯。更誰登翠微。以上咸淳臨安志

訪丹陽玉乳泉已變昏黑因賦詩

淳熙十三年

觀音寺裏泉經品。今日唯存玉乳名。定是年來無陸子。甘香收入柳枝餅。

游宦紀聞

徐逸

逸字無競。號抱獨子。天台人。

仇遠碑史。徐抱獨少與朱文公爲友。公提舉浙東。日過其家。然燈夜話。至鐘鳴而別。公嘗托無競作謝恩表。書云可放筆力稍低。使人見之。無假手之議也。其推獎如此。

晝眠治平寺在西湖北山

頻年游覽不暫寢。野艇往來無水程。雨休最好是鷗浴。風靜更清聞鶴聲。酒家新熟欠前債。僧榻借眠餘宿醒。崧高泰華未挂眼。鬢影蕭颯難爲情。咸淳臨安志

孤山

咸平處士風流遠。招得梅花枝上魂。疎影暗香如昨日。不知人世幾黃昏。全芳備祖。

蔡開

開，字子明。崇德人。淳熙閒進士。官至漕憲。弟闢，字子正。慶元閒進士。官至國子祭酒。  
題資福院平綠軒

瞰水地仍敞。開窗望不迷。良疇連遠近。秀野混高低。曉起烟千樹。春耕雨一犁。道人深樂此。壞衲且幽棲。

至元嘉禾志。觀音資福院在崇德院西南一里。西廡有軒瞰流扁平綠陳炳退菴齋開畏齋武林莫若拙輔廣濟齋王用亨釣臺江表祖張掞敬齋長樂王益祥南豐曾揆茗水莫柯陸德輿魯齋皆有詩。

李安期

安期，字泰伯。邵武人。以詩游江湖間。一日謁四川茶馬使王淮。淮將以賢良薦。因奕爭道。遂拂衣而去。

賦白鷺

漁父家風不設罇。錦鱗爲飯。水爲羹。銀袍祇當蓑衣著。自在江湖過一生。邵武府志。

盧蹈

蹈，字衷父。青社人。寓犍爲郡夾江縣佳士也。

絕句

客懷耿耿自難寬。老傍京塵更鮮歡。遠夢已回窗不曉。杏花同度五更寒。放翁題跋。

應廓

廊閩縣令。

七夕

烏鵲成橋架碧空。人間天上此歡同。  
仙查逐浪浮銀漢。青鳥傳音到帝宮。  
牛女佳期情不斷。古今遺恨意難窮。  
淳熙三山志綵樓乞巧知多少。直至更闌漏欲終。

王佐才

佐才字呂輔崇安人少游邑庠范汝爲叛總義兵禦賊建陽以功補承信郎後爲吉州水軍統領與賊魁殊死戰中流舟壞而沒吉人廟祀之

荅秦兵部求墨竹

夜到茅亭近竹籬影隨寒月下苔墀吟餘未憊蕭疎興曾寫離披一兩枝。

贈徐子虛畫魚

我嘗放意游江湖喜從釣叟觀真魚有時臨溪行復坐秋水無風魚自如鮮鱗滑鬚隨上下回旋戲躍形皆殊兩兩相逢若對語聚頭戢戢搖雙鬚忽然散漫背游去一半掉尾潛菰蒲往來得所弄晴色員波觸動生浮珠困依垂楊看不足盡日忘歸誰與俱自從北走塵土窟十年不復瞻尊鱸憑誰畫出江湖趣東海今聞徐子虛毫端奪得生時意京師好事爭傳摹寫成雙幅輒遺我展舒活動驚堂隅窮搜前古少奇筆此本祇恐人閒無任教涸轍強濡沫對面相忘千里書以上聲畫集

陳國材

國材、廬陵人。

句

紅日晚天三四雁。碧波春水一雙鷗。

鶴林玉露云周益

公楊誠齋盛稱之。

周  
廻

廻吳江縣尉見陸游入蜀記。

三高亭懷范石湖

蓴脆鱠肥酒細傾。浩歌悲壯欲誰聽。沈迷簿領頭將白。彈壓江山眼自青。魚躍紫鱗衝葦岸。鷗翻白雪下沙汀。西風散髮危亭上。醉倚豐碑照日星。百城煙水

邵經國

經國、永嘉人。

上樓參政

聞道先生欲挂冠。先生幾日出長安。去時莫待淋頭雨。歸日須防徹骨寒。已遂平生多少志。莫令末路去留難。二疏畢竟成何事。留取他年作畫看。

吹劍錄。樓攻媿既參大政。屢欲丐閑。  
至繪二疏以見意。邵經國作詩云云。

傅大詢

大詢、字公謀。宜春人。

鶴林玉露。傅公謀尤工作酸文。嘗作無遮榜語云。紅旗  
渡口。淒涼芳草夕陽天。白紙山頭。慘淡落花寒食節。

賀雨爲分宜宰許及之作。

獅子關前半篆烟。二龍飛下卓筭泉。銀河掣電連宵雨。綠野翻雲四月天。便覺春生花一縣。會看秋熟米  
三錢。何時卓魯登黃閣。都與寰區作有年。袁州府志。

劉鄂

鄂、字國相。

讀許右丞翰所作陳少陽先生哀詞

并州更作桑乾客。道逢舍者來爭席。掀髯對坐有鉅人。開口劇談如舊識。試問客子從何方。興言扼腕微  
有傷。吾祖昔遑卹。緯計屢以直論干君王。讒諛弄國賢者避禍福。相乘呼吸異懸知。必有代庖責被髮。纓  
冠赴東市。大明旣爭日月光。眞與天地同久長。嗟予之生後長者。卻識前輩奚其詳。大臣罔上擅行戮。揚  
以浮言蓋私曲。誅姦發德示後世。右丞之文端可復。中興名門凡幾門。聖朝報稱非少恩。芄蘭袖出承命

帖猶幸及識公之孫春秋愛賢許之宥十世已往未爲厚況今公議方大明叩天大叫君無後故人夢想規大賢仰止高山思執鞭典刑方及見故物倏爾長別良依然土田未足爲君勸官爵未足酬君願行矣志意勿倦遊歸而視之有家傳盡忠錄附

楊輔世

輔世字昌英廬陵人誠齋之族

南溪

碧玉寒塘瑩不流紅蕖影裏立沙鷗便教不作南溪看當得西湖十里秋詩人玉屑

游開

開字子蒙建安人定夫從孫

和劉叔通

昨夜劉郎叩角歌朔雲寒雪滿山阿文章無用乃如此富貴不來爭奈何邴鄭向嘗依北海晁張今復事東坡吹噓合有飛騰便未用溪頭買釣蓑

朱子語類云詩須不費力方好  
此等詩使蘇黃見之定當賞音

丁世昌

世昌字少明號竹坡黃巖人

次虞仲房司馬送秋韻

自入秋光能幾時。無端又賦別秋詩。夜長月冷蟲鳴急。天闊風高雁過遲。三徑黃花存舊節。半欄紅葉墮殘枝。往來畢竟乘除法。何用年年宋玉悲黃巖英氣。

聞人滋

滋字茂德嘉興人嘗爲勅局刪定官

陸游老學菴筆記嘉興人茂德老儒也喜留客食不過蔬豆而已郡人求館客者多就謀之多蓄書喜借人自言作門客牙充書籍行開豆腐羹店予少時嘗與之同在勅局爲刪定官談經義哀哀不倦發明尤多尤邃於小學云

早秋游靈巖

凭闌山翠溼濛濛佛閣依然水殿風欲採蓮花何處所。年年金井落梧桐。構李詩繫。

王用亨

用亨字子安自開封徙崇德淳熙閒進士分教襄陽

平綠軒在資福院

禪窗虛敞瞰西南野色溪光接畫簷雲去碧天無間斷一眉依約見山尖。構李詩繫。

# 宋詩紀事卷五十八

錢唐厲鶚緝  
德清徐以坤勘定

劉宰

宰字平國金壇人紹熙元年進士調江寧尉真州司法寧宗朝韓侂胄枋國不復仕自號漫塘病叟寶慶初除將作少監進直敷文閣知寧國府不拜卒謚文清有漫塘集

北固山望揚州懷古

北固城高萬象秋煙竿一縷認揚州試乘綠漲三篙水要見珠簾十里樓淚溼宮衣朝霧重愁薰寒草夕陽浮隋隄舊事無人問兩兩垂楊繫客舟

秋懷

一抹紅綃日腳霞千林暮靄納歸鴉西風捲盡梧桐葉乞與中庭散月華

雲邊阻雨

薔薇籬落送春闌筍蕘園林早夏閑牛背牧兒酣午夢不知風雨過前山以上漫塘集

張嗣古

嗣古宜春人紹熙元年進士歷起居舍人中奉大夫直龍圖閣

宋詩紀事

卷五十八

一四八五

仰山龍湫

崎嶇鳥道開烟蘿。長空偃蹇聲蕩摩。白龍怒吼挂絕壁。蒼兕離立迎清波。枯竹拄破青苔色。雷雨收功神  
斂迹。窮源不得空歸來。掬雪搏珠三歎息。

登妙高亭

雨餘山石洗孱顏。臥虎蹲羊各自閑。杖屢貪穿秋色好。不知衣惹蘚痕斑。以上袁州府志

聶子述

子述字善之。建昌軍南城人。紹熙元年進士。嘉定中。四川制置使曾以顯謨閣學士使金。卒謚文  
定。

曾公道夫出示先世手澤斂衽拜觀之餘敬題二小詩嘉定壬午下元日

香瓣平生滿意熏。更參曲阜問關津。祇宜黃閣官尊貴。不敢近前丞相噴。  
一門翰墨森圭璧。諸老題評粲錦花。珍重雲仍好收拾。夜虹貫月定君家。鐵網珊瑚

李臺

臺字季永。震次子。紹熙元年進士。理宗朝歷官同知樞密事。四川宣撫使。有悅齋集。

離巫山晚泊棹石灘下

黃昏風雨阻江濱。翠綰羣峯暮色勻。一夜子規啼到曉。孤舟愁殺未歸人。  
上已從史巫山祓飲江臯

風沙一夕卷冥冥。曉色曈曨上翠屏。薄宦驅人成老大。佳時得酒慰飄零。紅餘晚樹迷幽谷。綠漲晴波失遠汀。卻是崇山兼峻嶺。看來渾不減蘭亭。以上全蜀藝文志

詹 義

義都昌人。紹熙元年進士。

登科後解嘲

讀盡詩書五六擔。老來方得一青衫。佳人問我年多少。五十年前二十三。清夜錄

詹 義

遊武夷

石廩巖前繫小舟。娟娟明月照清秋。仙人一夜吹長笛。三十六峯雲盡收。武夷詩集

滕 岑

岑字元秀。嚴州建德人。紹興乙卯領鄉薦。屢上南宮不第。紹熙元年庚戌特奏名。仕爲溫州平陽縣丞。有無所可用集。

方萬里序。回至郡。讀釣臺集。見有曰。月色搖江如永走。又有所謂七里風煙萬里寬者。心異之。細視則郡人龍嶺老樵滕公作也。

嚴州府志。元秀平生苦吟。與陳墳相倡和。佳處自謂高視大歷十才子。詩凡三千首。趙汝歷知郡日。借其集不還。故傳者甚少。大抵皆江西體也。後宋景濂序睦州詩派。岑實與焉。

秋晚

槭槭霜風勁。駿駿物象雕。屢遷憐蟋蟀。一敗笑芭蕉。林葉疎逾響。山雲薄易消。雖無遠行役。對此亦何聊。

瀛奎律髓

句

斷橋測水露半影。野渡獨泥留亂痕。拄杖送僧。嚴州府志。

鄭興裔

興裔字光錫。顯肅皇后外戚也。紹熙初知揚州。

瓊花

春晚驅車到古祠。看花復誦舊題詩。少年嘗記六七月。大暑曾開三五枝。醉酒輒來思往事。凭闌欲去立多時。八仙鬍鬚休疑似。相隔仙凡只一絲。瓊花譜

董道輔

道輔武陵人。于湖張孝祥門人。

紹熙庚戌中秋後三日拜于湖先生墓

曉出自白下門。瘦馬踏秋色。鍾山度蒼翠。慰我遠游客。暮投清果寺。花草獻幽寂。長廊靜無人。落日照東壁。平生張子湖。萬里去一息。翩然九州外。汗漫跨鯨脊。乾坤能幾時。安用較顏跖。文章失津梁。所念斯道厄。夜闌耿不寐。搔首聽蕭瑟。懷人感西風。翁仲守孤柏。景定建康志

張 泛

云字聲父吳興人紹熙二年發解。

詠苔梅

老龍全身著艾蘗不耐久蟄潛擎空爪頭撥動陽春信香在霜痕雪點中。

題黃巖酒肆

東風吹雨水平沙下卻籃輿訪酒家行役不知春早晚牆頭紅杏欲飛花以上梅磬詩話

歐陽謙之

謙之字希遜廬陵人學于朱子。

題睢陽五老圖款題紹熙王子

厚德良多積善根賢才他日在兒孫當知相里非凡婿豈有陳平久席門五老繪圖千載譽羣公詩禮百年存憑君挾取傳家學青史賢良有後昆鐵網珊瑚

韓 楠

楨蘄王世忠孫紹熙初官直祕閣知真州

游洞霄宮

雲去山空鶴自來天壇石室已蒼苔洞前石鼓叩卽應巖上仙真挽不回明月照人山霧合東風吹湖野蘭開高眠百尺長松下閑看飛花落酒杯洞霄詩集

韓

松

松挺弟。

游棲真洞

黃冠具竹輿，邀我游棲真。  
山家雜水樹，野徑橫荆榛。  
長松臥蒼蛟，亂石錯紫鱗。  
委曲至洞府，積雪開雙門。  
結頂寶蓋高，下可容百人。  
神仙獨何之，基局今猶存。  
翠子拂不落，衣袖生清芬。  
山門局未終，浮世三千春。  
洞霄詩集

陸

淞

淞字子逸，號雲溪山陰人。官辰州守，放翁雁行也。

書舊續聞。陸辰州子逸，左丞佃之孫。晚以疾廢，卜築于秀野，越之佳山  
水也。放傲世閒，不復有營念。對客則終日清談不倦，尤好語前輩事。

鄉校頌并序

鄉校海鹽縣大夫能教育人材而成之也。

維鄉有校，示民有知。教始豫遜，迪于訓繩。維風化是裨，  
維校在鄉，示民有防。入孝出悌，爲忠爲良。斯邦家之光，  
鄉校有基。如德弗虧，劉侯遷之。魏侯新之，李侯能成之。  
其遷者初，其新者中。肄業傳道，有師有宗。繄李侯之功，

樂只君子孰後孰先顯有嘉聞於斯萬年維大夫之賢

鄉校五章章五句

海鹽縣圖經李直養字無害維揚人正民之孫紹熙中爲海鹽令與學校修大成殿置書籍祭器兼設小學擇師教之陸淞有詩

陳亮

亮字同父婺州永康人淳熙中詣闕上書光宗紹熙四年策進士擢第一授簽書建康府判官廳公事未至而卒端平初謚文毅有龍川集

及第謝恩和御製詩韻

雲漢昭回倬錦章爛然衣被九天光已將德雨平分布更把仁風與奉揚治道修明當正寧皇威震疊到遐方復讐自是平生志勿謂儒臣鬢髮蒼龍川集

梅花

疎枝橫玉瘦小萼點珠光一朵忽先變百花皆後香欲傳春信息不怕雪埋藏玉笛休三弄東君正主張全芳備祀

崔與之

與之字正子廣州增城人紹熙四年進士理宗朝累除廣東安撫使拜參知政事右丞相致仕卒累封南海郡開國公謚清獻有菊坡集

送鹽門丁帥赴召

議論方前席。功名早上坡。去帆瓜蔓水。遺愛竹枝歌。同志星辰少。孤愁暮雨多。倚風窮望眼。碧色淼平莎。

峽山飛來寺

萬里星槎海上旋。名山今喜得攀緣。獨揮孫恪千年淚。月照維摩半夜禪。磴長荒苔人跡少。厓攢古樹鵠巢懸。江流上溯曹溪水。時送鐘聲到洞前。以上菊坡集

孫伯溫

伯溫、字南叟豐城人。紹熙四年進士。知臨湘縣。

游麻姑山瀑布泉

九官守不嚴。失卻兩玉龍。塵世著不得。忽來此山中。雷電白日閒。冰雪詩人胸。天公不汝尤。爲人作年豐。

娛書堂詩話：麻姑山瀑布，分作兩派而下灌漑，甚廣。豐城孫南叟嘗賦古風云云，甚有西江體。

馮多福

多福、常州人。紹熙四年進士。寶慶中以直寶謨閣出守鎮江。

鶴林寺

春郊躬勸相。稅駕擬禪關。院古深藏竹。堂虛淨對山。日曛農父醉。雲伴老僧閒。暇日還攜茗。同來渝虎班。  
鶴林寺志

喬行簡

行簡字壽朋，婺州東陽人。紹熙四年進士。理宗朝拜左丞相平章軍國事。封肅國公。及請老加少保。保寧軍節度使。醴泉觀使。封魯國公。卒贈太師。謚文惠。有孔山集。

池荷

萱草軒窗處處幽。酒中不著客中愁。芭蕉葉上無多雨。分與池荷一半秋。全芳備祖。

游三丘山在東陽縣南。晉義熙閒殷仲文爲東陽守。嘗登此山。後人思之。若襄陽之羊祜。故又名峴山。

疑是乘風到九天。不知身在此山巔。萬家攢簇炊煙底。一水繁紆去鳥邊。便覺塵緣輕似羽。何妨詩思湧如泉。停杯更待林梢月。歸去家僮想未眠。東陽縣志

程珌

珌字懷古。休寧人。先世本洺州。自號洺水遺民。紹熙四年進士。理宗朝累官禮部尚書翰林學士。知制誥。歷端明殿學士致仕。卒贈少師。有洺水集。

流觴西湖用范左史韻

畫船同載若登仙。卻笑泥轎馬不前。要識冷烟催穀雨。須知澹日養花天。千條翠柳隨風舞。一樹夭桃照水妍。始信人生行樂耳。虛名那用世閒傳。

出南郊清甚

春風吹屣到南園。著酒塗酥花正繁。更喜滿前無俗物。橫塘疎竹渭南村。以上洺水集。

句

黃麻方草罷。紅藥正花翻。省試紅藥當階翻詩 吹劍錄

許景透

景透舊名闕。山陰人。紹熙癸丑進士。有野雪吟橐。

詠虞美人草

合歡枝葉想腰身。不共長安草木春。若聽楚歌能楚舞。未央空有戚夫人。全芳備祖

詠菱

翠葉森森劍有棱。柔條鬆甚比輕冰。江湖若借秋風便。好與蓴鱸伴季鷺。蘇州府志

句

野店青窓戶。春船綠漲篙。梅磵詩話

周 煉

燉，字昭禮，邦之子，樞密麟之之族姪。南渡寓居臨安府之清波門，著清波雜志。曰琯按今刊本清波雜志作燉，舊本有紹熙四年張貴謨序書中俱作燉，宜從之。

句

掩簾試約東君問。花信風來第幾番。春詞 清波雜志

尹德鄰

德鄰字直卿永豐人紹熙中太學生

問寢龍樓曉

父母人皆有儀刑自冕旒問安趨燕寢拂曉過龍樓鶴駕嚴晨衛雞人徹夜籌慈闡天語接飛棟月華收萬姓齊歌舞三宮款獻酬小儒憂國切幾白九分頭

鶴林玉露光宗以疾不能過宮德鄰初參太學簾引詩題出問寢龍樓曉詩成學官擊節人皆傳誦

周震

震紹熙中知泉州惠安縣

春月勸農至華林寺

飛廉怒見海天明十里籃輿出勸耕隴麥低頭須雨意林花仰面笑春晴熙察連轡勤因事父老傳杯識至情及物無功慚竊廩豐年有願是忠誠

泉州府志

馮椅

椅字奇之都昌人紹熙四年進士充江西運司幹辦公事攝上高令

詠歸亭任筠州上高縣

弓轉寒溪月一灣下臨虎豹踞爛斑林烟闊處飛層閣雲影窮頭護遠山衿佩光陰弦誦裏丹青人物畫圖閒紅塵堆案那能到只有漁船自往還

瑞州府志

俞灝

灝字商卿。世居杭。紹熙四年進士。歷麾節皆有聲。寶慶二年致仕。築室九里松。自號青松居士。有集。

武康道中

竹窓聽雨自安眠。不道驚湍近屋前。省得去年桃葉渡。水痕秌到樹旁邊。前賢小集拾遺

湖隄晚行

暝色俄從草色生。管弦羅綺盡歸城。不應閑卻孤山路。我自扶藜月下行。咸淳臨安志

孫惟信

惟信字季蕃。號花翁。開封人居婺州。光宗時棄官隱西湖。有集。

文獻通考陳氏曰。花翁在江湖頗有標致。

多見前輩多聞舊事。善雅談。長短句尤工。

劉後村花翁墓誌。季蕃貫開封。少受祖澤調監。當不樂棄去。始昏于婺。後去婺游。留蘇杭最久。一榻之外無長物。躬爨而食。書無乞米之帖。文無逐貧之賦。終其身如此。名重江浙。公卿間聞花翁至。爭倒屣所談非山水風月。一不挂口。長身縕袍。意度疎曠。見者疑爲俠客異人。其倚聲度曲。公瑾之妙。散髮橫笛。野王之逸。奮袖起舞。越石之壯也。

賦女冠還俗

疊卻霞綃上釀衣。女童鬢髻綠楊垂。重調螺黛爲眉淺。再試弓鞬舉步遲。紫府烟花鶯喚醒。丹房雲雨鵠通知。簾低紅杏春風暖。清夢應曾見舊師。詩人玉屑

### 垂絲海棠

嫋嫋垂絲不自持。更禁日炙與風吹。仙家見慣渾閑事。乞與人間看一枝。後村千家詩

禪寂之所有賣花聲出廊廡閒清婉動耳

曲巷深房憶帝州。賣花庭宇最風流。窗紗破曉斜開扇。簾繡籠陰半上鉤。少日喜拈春在手。暮年羞戴雪盈頭。泉南寺裏蕭蕭雨。婉婉一聲無限愁。詩家鼎臘

### 劉過

過字改之。號龍洲道人。吉州太和人。嘗伏闕上書。請光宗過宮。復以書抵時宰陳恢復方略。不報。放浪湖海間。有龍洲集。

### 多景樓開禧乙丑作

金焦兩山相對起。不盡中流大江水。一樓坐斷天中央。收拾淮南數千里。西風把酒閑來游。木葉漸脫人聞秋。關河景物異南北。神京不見雙淚流。君不見王勃詞華能蓋世。當時未遇庸人耳。翩然落托豫章游。滕王閣中悲帝子。又不見李白才思眞天人。時人不省爲謫仙。一朝放跡金陵去。鳳凰臺上望長安。我今四海游。將徧東歷蘇杭。西漢沔。第一江山最上頭。天地無人獨登覽。樓高意遠愁緒多。樓平樓平柰爾何。安得李白與王勃。名與此樓長突兀。

題謝耕道一犁春雨圖

阿耘無田食破硯。養親日糴供朝飯。凝塵壁上挂瓶罌。寒日窗前照藜覓。汝父訓汝汝當知。有田無田未可期。有田不耕汝嬾病。無田說田真畫餅。畫田之外更畫牛。捕風捉影何時休。頭上安頭又詩軸。全家不應猶食粥。

寄湖州趙侍郎

桑柘村村烟樹濃。新秧刺水麥梳風。舟行苕霅雙溪上。人在蘇杭兩郡中。鼓角麗聲喧旦暮。旌旗小隊閒青紅。主人夙有神仙骨。合住水晶天上宮。以上龍洲集

賦羊腰腎羹

拔毫已付管城子。爛胃曾封關內侯。死後不知身外物。也隨樽俎伴風流。

挽張魏公

背水未成韓信陣。明星已隕武侯軍。平生一點不平氣。化作祝融峯上雲。

山房隨筆。辛稼軒帥浙東時。晦菴南軒任倉憲使。劉改之欲見辛。不納。二公爲之地云。某日公宴。至後筵便坐。君可來。門者不納。但喧呼之。必可入。既而改之如所教。門下果諱譁。辛問故。門者以告。辛怒甚。二公因言改之豪傑也。善賦詩。可試納之。改之至長揖。公問能詩乎。曰能。時方進羊腰羹。辛命賦之。改之對甚寒。願乞巵酒。酒罷乞韻。時飲酒手顫。餘瀝流于懷。因以流字爲韻。卽吟云。云辛大喜。命共嘗此羹。終席而去。厚餽焉。席散。南軒邀至公廨。置酒語之。曰。先君魏公。一生公忠爲國。功厄于命。來挽者竟無一章。得此意。願君有意。爲發幽潛。改之卽賦一絃云。云南軒爲之墮淚。今龍洲集中不見此二詩。豈遺珠耶。

朱晞顏

晞顏字子因新安人慶元中廣西漕使

慶元改元寒食日陪都運寺丞遊白龍洞時牡丹盛開小酌巖下夕陽西度並轡而歸

小溪漱碧響潺潺路入龍宮杳靄閒佳節漫添新白髮故人賴有舊青山花朝幾共湘南醉萍迹何年嶺北還歸路聯鑣紅日晚多慚龍臥白雲閒

粵西詩載

白嶽寄懷

林閒留我住多時似與烟霞夙有期野老烹茶來獻客巖猱偷果去呼兒靜思世上千年事不值山中一局棋欲說行藏舒卷意洞天惟有白雲知

齊雲山志

鄒應龍

應龍字景初邵武軍太寧人慶元元年進士第一理宗朝累官端明殿學士簽書樞密院事知慶元府兼沿海制置使

遊寶蓋巖

夙有斯巖約今朝喜踐盟路從支澗入人在半空行六月如霜候四時長雨聲願求容膝地著我過浮生

邵武府志

林士表

句

宋詩紀事

卷五十八

一四九九

有書來進御。無語不關農。進農書。

陳伯震

修眉濃淡裏。寸碧有無間。開簾出遠山。

鄧伯秀

句

在我時舒卷。從他自去留。鉤簾宿鶯起。

朱縉

句

冰玉詞新吐。塵埃氣不留。清文媲皇猷。

陳瑄

句

似嫌秦閣小。欲際楚天浮。風幔不依樓。

吹劍錄。省題詩雖場屋末技。閒有以此見長。如林士表諸人句皆主司所刮目。

鵝按以上皆南宋中葉人不可詳其次第姑附于此

羅椿

椿字永年自號就齋廬陵人楊誠齋高弟

寄楊誠齋慶元初誠齋與朱文公同召誠齋力辭

不愁風月祇憂時髮爲君王寸寸絲司馬要爲元祐起西樞政坐壽皇知苦辭君命驚凡子清對梅花更與誰夢繞師門三稽首起敲冰硯訴相思

送永豐汪令

錦纜梅花浦江南作縣歸新來薦鶴牘驚動衰龍衣歲晚情難別心親事卻違恐君天上去扶病出烟霏

句

露溼看花腳鶯啼欲曉山春消千嶂雪清逼五湖秋以上鵝林玉露

林亦之

亦之字學可號月漁福清人林光朝嘗講學莆之紅泉及卒學者請亦之繼其席趙汝愚帥閩嘗以亦之行業上于朝未幾卒學者稱網山先生景定閒諡文介贈迪功郎有集曰鵝按明王應山云縣志贈官不言賜謚三山續志稱文介先生蓋私謚也

劉後村跋網山律詩

高妙者絕類唐人

題林稚春菊花枕子歌

故人所說菊花枕似把冰丸月下飲秋水一雙明炯炯數在青囊第一品狂風江上吹蒹葭往往得之嵇阮家閉門讀書二十載眼睛損盡生空花建陽小作箸頭書殘更燈火亂蟲魚石渠文字大如斗場屋歲月又不偶郤來南山青草邊東西盡爲菊花田手提長筐向山曲一下收拾三百斛昨者昏迷才起來解把蠅頭小字讀乃知妙物通羣仙一切藥裏應棄捐

丁亥九月十六夜偕李監倉宿龍臥山中聽雨看月同時事也所謂魚與熊掌兼得之賦詩一篇以紀其事

相喚此山來狂風吹我衣把酒桂花下山雲片段飛掩門雨初滴開門月還上倚門看月明半山聞雨響人間有佳景詩句頗發越何曾似今夕聽雨還看月

九日下水口

黃花時候苦思鄉急水還家一日強不道南風打頭上客船搖櫓作重陽  
寄表弟章由之爲理曲堆屋廬

苦來爲客竟何爲宅舍荒村誰與治別墅雖無輞川畫生涯堪入杜陵詩身如燕子年年去家似漁舟處移丹井西頭曲堆下更煩歲晚定疎籬

輓光澤朱君諱賛字師賢

諸老蕭蕭似卷塵不堪再見素旌新白頭縣尉答答浦夜雨寒窗是舊人以上網山集

曾從龍

從龍字君錫晉江人公亮四世從孫慶元五年進士第一累官知樞密院事兼參知政事卒贈少師

題衢州順溪館

紅照西沈暫解鞍偶然假館豈求安新豐獨酌誰爲侶坐對窗前竹一竿  
娛書堂詩話曾參預從龍赴省時餽于衢之順溪題一絕云云  
識者已踰之矣是年竟至大魁致身政府至今其館扁爲狀元

魏了翁

了翁字華父號鶴山邛州蒲江人慶元五年進士理宗朝累官簽書樞密院事改資政殿學士福州安撫使卒贈太師謚文靖有鶴山集

題謝耕道一犁春雨圖

牀頭夜雨滴到明村南村北春水生老婦携兒出門去老翁赤脚呵牛耕一雙不借挂木杪半破夫須衝曉行耕罷洗泥枕犢鼻臥看人閒蠻觸爭

題上亭驛

紅錦繃盛河北賊紫金盞酌壽王妃弄成晚歲郎當曲正是三郎快活時原注俗所謂快活三郎者卽明皇也

十二月九日雪融夜起達旦

遠鐘入枕報新晴。衾鐵衣棱夢不成。起傍梅花讀周易。一窗明月四簷聲。

梅礪詩話後二句寄  
與高遠人所傳誦

紫宸殿御筵卽事

峨眉班捲戴花回。遙望君王玉色開。畫楯諸班謝茶酒。尻高首下一聲雷。以上鶴山集

題米南宮雲山圖

漠漠雲林小小山。誰家茅屋隱松閒。石橋雨過天台遠。采藥仙人去未還。式古堂畫考

盧祖臯

祖臯字申之。又字次夔。號蒲江。永嘉人。樓攻媿甥。慶元五年進士。嘉定中爲軍器少監。權直學士院。

貴耳集。蒲江貌宇修整。作小詞纖雅。詩如舟中獨酌云。山川似舊客。

懷老天地何言。春事深及玉堂有感。松江別詩。余領先生詞外之旨。

黃玉林云。蒲江乃趙紫芝翁靈舒諸賢之詩友。其詞甚工。字字可入律呂。浙東西皆歌之。

玉堂有感

兩山風雨故留寒。九陌香泥苦未乾。開到海棠春爛漫。擔頭時得數枝看。

松江別詩

明月垂虹幾度秋。短篷長是繫人愁。暮烟疎雨分攜地。更上松江百尺樓。以上貴耳集。

廟山道中

粉黃蛱蝶遶疎籬。山崦人家挂酒旗。細雨嫩寒衫袖薄。客中知是菊花時。梅磗詩話。

酴醿

雪榦雲條一架春。酒中風度夢中聞。春風不是無顏色。過了梅花便是君。全芳備祖。

讀書

細字燈前老不便。小齋新冷夜無眠。數聲牆竹蕭蕭雨。一縷銅爐淡淡煙。

種橘

小擘枝頭滿袖香。纍纍秋實正宜霜。每來長是移時去。爲爾風流似故鄉。以上僧居簡北磗集附。

雨後得月小飲懷趙天樂

梅花此夜稀。嘉月弄光輝。不飲強呼酒。欲眠重啓扉。語高驚鶴睡。坐久見烏飛。想見湖居友。扁舟不肯歸。

東甌詩集

周師成

師成，字宗聖，號雉山，長興人。慶元五年進士。

貴耳集宗聖少年秀麗讀書善記議論古今落落可聽有詩高遠愛作選格仕不得志晚年若有所遇如遊仙散聖之徒

梅

采采芳梅枝。瑣碎白雲姿。在山千花怨。出山百鳥啼。操持思所寄。轉趾述所思。清披太始風。寒應太虛月。一日拂人衣。三歲香不歇。貴耳集

敖陶孫

陶孫字器之長樂人慶元五年進士官泉州簽判有臞翁集

次韻馮孔武雪中簡聞人簿乞炭

君不見朱門煌煌多近臣。豹胎煮糜蠟爲薪。庭中盛設激寒戲。炙手欲近還嗔人。誰知曝背茅簷下。欲獻要是山林真兒童。抑搔皮肉輒日輪過中方欠伸。懸鶴結駟兩相笑。百年俱成一窖塵。先生自是冷官樣。要看入火紅麒麟。燃鬚自作詠雪句。祕思早與相如親。蒲團擁裘結僧坐。別有絲綿君南鄰。願迴六龍照后土。施與萬國無邊春。屑瓊鏤玉入肺腑。拍手一笑吾未貧。

奉寄旌德尉劉申之

諸劉兄弟賢。一一無可選。竹林銳頭郎。風味吾小阮。平生天機深。善閉得內楗。邇來卿何曹。不辨折腰本。稍傳詩語東。朝日照蘭畹。伊余戰紛華。心旆凡幾偃。劃逢君家語。雋永初一憐。識遺飽新得。友勝悟夙損。緬懷歌商地。蕭瑟松淵遠。陰陰蕪菁花。碧蝶相與晚。是中著高士。物意自偃蹇。向來白衣宰。雲壑論補袞。

優游濟艱難。如以禹代鯀。劉郎秀眉宇。秋隼立高巘。端能謝師匠。萬卷自鉏鑿。時須閱世諦。一及城門鍊。功名頭上簪。日月風中幟。何時會吳下。春動長洲苑。以上臘翁集

題三元樓壁

左手旋乾右轉坤。如何羣小恣流言。狼胡無地居姬旦。魚腹終天弔屈原。一死固知公所欠。孤忠幸有史長存。九泉若遇韓忠獻。休道如今有末孫。

四朝聞見錄。慶元初。韓侂胄既逐趙忠定。太學諸生放陶孫賦詩于三元樓云。方書于樓之木壁。壁已不復存。陶孫知捕者至。急更行酒者衣。持煖酒具下。捕者與交臂。問放上舍在否。對以若問太學秀才耶。飲方酣。陶孫亟亡命歸走閩。後登乙丑第。

西樓

紙有西樓日日登。闌干東角每深凭。一層已是愁無奈。想見仙人十二層。後村千家詩

蘇大璋

大璋字顥之。古田人。慶元五年進士。官著作佐郎。出知吉州。

鳳翀峯在古田縣五花石

早起聯鑣上翠微。瞰虛歷級步嶽峩。昔聞華頂蓮生藕。今見南山菊滿籬。縱眼橫看天地闊。壯懷唯有鬼神知。安期引我丹霄路。十里雲烟特地披。福州府志

真德秀

德秀字希元。浦城人。慶元五年進士。中詞科。紹定中。拜參知政事。進資政殿直學士。提舉萬壽觀。

卒謚文忠學者稱西山先生有集

挹仙亭

漢宮葦篋兒呱呱濟南梓柱陰扶疎富平家人正媿樂安昌帝師工獻訣子真東南一尉耳黃綬淒涼百僚底手持短疏叩天闕義激丹衷淚橫皆翩然一朝徑拂衣愛君無路空依依人傳九江已仙去吳門再見是邪非神仙茫茫那可測上帝從來賞忠直天上果有驟鸞人合領羣真朝北極自從舉手謝世閒千年白鶴何時還玉簫聲斷杉檜冷祇餘丹竈留空山谷口之孫古膚使亭斲青冥挹仙袂耿耿應懷貫日忠飄飄那羨凌雲氣我來快讀華星篇清徹毛骨風泠然何當結屋最高項一榻容我分雲烟

會長沙十二縣宰作

從來守令與斯民都是同胞一體親豈有脂膏供爾祿不思痛癢切吾身此邦祇以唐時古我輩當如漢吏循今日湘潭一卮酒直須散作滿懷春

蓉塘詩話西山

先生帥潭時作

皇后閣端午帖子

記得當年夢月符浴蘭節後恰旬餘欲知天錫無疆壽認取仙蜍頷下書  
瑤池十丈藕花香清賞尤便水殿涼聞說內家多樂事前星親自捧霞觴

贈張童子

虎頭燕額及鳶肩。自笑都無一事全。惟有數條瓜樣骨。尙堪山澤作臞仙。如瓜骨出人倫畫。  
聞君早號張童子。顧我初非韓退之。可惜浪拋洙泗業。祇看風鑑學希夷。以上西山集。

易 祜

祓字彥章。潭州人。第進士。開禧官左司諫。

活溪中興頌

湘江東西直活溪。上有十丈中興碑。誰鑿豐碑鎮山曲。溪邊美人美如玉。想當歌頌大業時。胸蟠星斗光  
陸離。蠶頭蠅尾更清勁。凜凜襟懷冰雪瑩。水部之文魯公書。兩翁寥寂千載餘。後來更有黃太史。健筆題  
詩起翁死。一派溪流徹底清。溪邊鏡石堅而明。我思古人不可見。水石猶作瓊瑰聲。偶來真仙訪遺跡。烟  
雨淒迷山路溼。野叟蒙頭看打碑。君其問諸水邊石。活溪集

葉秀發

秀發字茂叔。金華人。慶元進士。知休寧縣。

題龍吟寺

曉色愁征轡。疎鐘忽斷林。荒溪窮虎跡。古寺到龍吟。竹影殘燈暗。苔痕落葉深。客懷無共說。敲枕聽霜砧。  
黃山志

吳 豐

豐官韶州經幹。

贈胡彥忠

古羊人物舜風餘。子姓傳來祇舊廬。爲愛一門能守義。相承五世不分居。

廣東通志。胡彥忠。曲江人。五世同居。慶元己未。經幹吳豐。

假宿其家。深加獎歎。爲言于臺闈。列上其事。旌表其門。

俞成

成字元德。東陽人。著螢雪叢說。慶元庚申自爲序。

題釣臺

千古英風想子陵。釣臺緣此幾人登。誰知避諱更嚴氏。灘與州名總誤稱。

螢雪叢說。嚴子陵本姓莊。避顯宗諱。遂稱嚴氏。若釣臺若七里灘。亦皆以嚴命名。無非循習之訛。而莫知其非也。宣和閒方臘寇江浙。改睦州爲嚴州。蓋本于此。至如范蔚宗操東漢之史筆。初不究其姓氏之由。遽曰嚴光而傳之。無乃以千秋爲車千

乎。秋

黃元夫

句

葦村風下鴉千點。麥隴天垂月一梳。螢雪叢說。

王廉清

廉清、字仲信。汝陰人。雪溪先生銓長子。問學該博。與弟明清齊名。著有京都歲時記。廣古今同姓名錄。補定水陸章句。新乾曜真形圖。

題玉霄亭在台州子城上。曾守敬父建。敬父廉清之舅氏也。

憶昔新亭敞玉霄。使君髯舅意飄飄。春風激灑黃金錢。明月參差紫玉簫。歌吹舊蹤空草木。風流閑話屬漁樵。凭欄無限淒涼意。寂寞寒江落暮潮。赤城志。

王明清

明清、字仲言。汝陰人。雪溪先生銓之次子。慶元閒。寓居嘉禾官泰州倅。著有揮麈三錄。玉照新志。投轄錄。清林詩話。

句

淒清寶鉢初分處。愁絕清光欲破時。

玉照新志。紹興閒乙卯。張安國爲右史。明清與仲信兄鄭舉善。郭世禎。李大正。李泳。多館于安國家。春日同游西湖至普安寺。于窗戶間得玉鉢半股。青蚨半文。想是游人歡洽所分授。偶遺之者。各賦詩以紀其事。明清云云。

葉

樾

樾。慶元初。監海鹽澉浦鎮稅。

三里塘梅

扶疎不耐繁華意。足自然清絕。壁閒幻出橫斜。祇欠紗窗明月。澉水志。

孔夢斗

追詠鄒道鄉所植揚州學四柏

道鄉採芹暇，手植四株柏。相對有真味，愛此歲寒格。忠言賈奇禍，幾削諫臣跡。柏亦助道鄉，每號風雨夕。  
柏死公不死，大名日皦白。後人補種之，存棠思召伯。亭亭儼相持，撐雲空百尺。是柏出雖晚，風致猶古昔。  
我來跋遺芳，清坐假一席。徘徊意難捨，猛把闌干拍。寄語景行人，用意謹勿窄。維揚志。

倪 垝

廩淮南節度判官。

追詠鄒道鄉所植揚州學四柏次前韻。

斯文以道重，所取不但柏。借彼剛特姿，昂然見標格。歲華閑如流，蒼鬚尙陳跡。田晝亦奇士，三歎子革夕。  
人生運窮達，敢愛母頭白。泠泠清風閒，媿死幾侯伯。誰歟繼遺響，高臥樓百尺。袖攜萬斛珠，一笑俯今昔。  
知心古槐樹，交蔭上簾席。大開多士鑪，韶竽辨節拍。所養貴所用，量廣滄海窄。維揚志。

薛 真

真，字持志，明州昌國人。慶元五年進士。調衡陽簿。

洩潭瀑布

秋高水壯雪飛濤，巖木招風怒竅號。不是玉虹低澗飲，白龍拖雨下山腰。大德昌國州志。

# 宋詩紀事卷五十九

錢唐厲鶚輯

錢唐金肇鑾勘定

鄭域

域字中卿號松窗三山人慶元中曾隨張貴謨使金著燕谷剽聞二卷官幹辦行在諸軍糧料院

玉蘂花

維揚后土廟瓊花安業唐昌宮玉蘂判然二物本不同喚作一般良未是瓊花雪白輕壓枝大率形模八仙耳山谿野路多見之樵斧摧殘如獮薤比之玉蘂似實非金粟冰絲那有此花鬚中有碧膽瓶別出玲瓏高半指清馨靜夜衝九天招隱瑤臺女仙子乘風躍馬汗漫遊偷折繁香分月姊紫莖柘葉荼蘼條少到尋常人眼底翰林內苑集賢閣雨露承天近咫尺後人不識天上花又把山礬輕比擬葉酸而澀供染黃不著霜縑偏入紙江鄉老少知此名鄭槎楊音無正字方言土諺隨舌訛烏馬成焉固應爾

山丹

園樂絳蘂發枝閒鉛鼎成丹七返還乞與幽人伴幽壑不妨相對兩朱顏以上全芳備祖

黃楊巖

暮秋訪幽隱謝屐凌崩空行到山根門還與平地同舉手抉層雲下視無高峯竦藤挂赤蚪枯苔繆青苔

回首三神山。縹渺滄海東。指點笑語高。吹聲半天中。安得大鵬背。載我遊無窮。延平府志

林 嶼

嶼、三山人。右科首選慶元中。以閤門舍人守潮州。

題觀稼亭在潮州西北一里湖山下。唐貞元閒御史中丞李宿建。

咫尺移文喚卽磨。此亭便可配韓亭。溪流橫過一灣碧。山色平分兩岸青。落日鐘聲鳴遠樹。半空塔影倒寒汀。雲烟滿目皆親種。留與邦人作畫屏。廣東通志

呂祖儉

祖儉字子約。成公弟。用父蔭入官。爲太府丞。疏論韓侂胄安置韶州。改吉州。量移筠州。卒。理宗朝。

賜謚曰忠。有大愚叟集。

泛舟至竹洲沈煥叔晦所居。

朝光拍天浮竹洲。隱然一面城之幽。中有高士披素裘。我欲從之恐淹留。探囊百金辦扁舟。又煩我友著意修微風。一動生波頭。飛棹來往倦則休。兀兀坐曹如繫囚。吏餘祇有萬斛愁。一生安坐無幾求。今日棲遲如置郵。脫帽露頂固狂流。俯首折腰亦可羞。誓將入海登之罘。棄置人間繞指柔。蒼然暮色下。羊牛出處語默兩悠悠。九原可起柳柳州。燕坐相與未始遊。至正四明續志

題史子仁碧沚

相家小有四明山。更葺桃源渺莽閒。四面樓臺相映發。一川烟水自灣環。

中川壘石勢嵯峨。城外遙岑聳翠螺。舊說夕陽無限好。此中更得夕陽多。

寧波府志。子仁名守之。心非叔父彌遠所爲著。昇聞錄以寓規諫。避勢遠嫌。退處月湖與慈湖諸公講肄爲樂靈宗御書碧沚字賜之。

呂祖异

祖异東萊人。

呈洞霄孫元素

匹馬先來破曉雲。千章喬木翠繽紛。山圍道院窗。窗見泉出丹池處。處處分酒好。便能澆碗磊。飯香何必御  
鞍。明朝又踏紅塵去。多羨烟霞總屬君。洞霄詩集

張震

震字東父。號無隱居士。蜀之益寧人。慶元中知湖州。除福建提刑。

遂寧府作

春苗半沒脰。社酒期滿腹。肩輿太守醉。燈火歸騎趣。唯有漢月明。依然照山曲。方輿勝覽

錢鑒

鑒。慶元閒衡州守。趙忠定汝愚謫永州。至衡道病。鑒窘之。暴薨。天下聞而冤之。

次袁尚書巫山十二峯二十五韻

文昌仙伯天人姿。愛山尋勝如書癡。忽摩台符歷參井。麾幢泝峽春遲遲。山林川后總效職。萬壑千巖俱

獻奇就中巫山絕雄勝。插天紫翠相參差。神妃來下佩聲遠。駐此名地相安之。峯旋地轉自前後。屹立萬馬如追隨。兩山有川幻天巧。禹功到此神應疲。仰天照眼如正練。舟行掣電翻雲旗。迅帆競惜峯巒過。艅艎望眼裳褰帷。懸崖下有欲落石。古木上有參天枝。龍登鶴聚仙旣集。雲昇雨暗天如低。從來三峽號至險。高牙穩泛相遊嬉。揚旌一覽天下勝。詞源倒峽知優爲。嘗聞奇觀天亦惜。遇賢輒與因其時。少陵寓此雖窮寂。妙語驚人多在茲。彫鑄萬象發天闕。衙官屈宋聲爭馳。公今曳履星辰上。調元妙手行將施。天教來作東道主。歡聲和氣生江湄。公來頓覺雪山重。青城增氣連峨眉。首驅巫陽入新句。一洗前作堪解頤。英詞從此偏蜀道。迴出塵表無纖縉。嘗憂此地難久駐。轉首絕景成嗟嘻。直欲使拂素練圖翠嶽。寫松巒起雲之狀。模翠屏栖鳳之帽。終朝誦公有聲畫。卻來看此無聲詩。全蜀藝文志。

趙 蕃

蕃字昌父。暘之曾孫。其先鄭州人。南渡寓信州之玉山。用蔭入仕。監衡州安仁贍軍酒庫。理宗立。

除太社令。不拜。轉承議郎。直祕閣。致仕。卒。謚文節。有章泉集。

劉漫塘志墓云。先生在太和。便座有齋榜曰思隱。蓋當筮仕之初。已有山林之思。在官清苦。唯以賦詠自娛。以是受知于吉之鄉。先生楊公萬里贈詩有云。西昌主簿如禪僧。日淡秋菊嚼春冰。又云。勸渠未要思舊隱。且與西昌作好春。又贊云。貌恭氣和。

無日下推敲之勢。神清骨聳非山。頭瘦苦之容。一笑詩成萬象春風。

劉後村跋云。近歲詩人。唯趙章泉五言有陶阮意。

挽趙丞相汝愚

五王不解去三思石顯端能殺望之。未到浯溪讀唐頌。已留衡嶽伴湘纍。生前免見焚書禍。死後重刊黨籍碑。滿地蒺藜誰敢哭。漫留楚些作哀辭。方輿勝覽。

荅施榮甫

昨韻村中好客希。今吟臨水送將歸。笑談未了風吹斷。何日重來款竹扉。詩家鼎鑊上已

朝來一雨快陰晴。東郊百鳥閒關鳴。受風柳條不自惜。蘸水桃花可憐生。不見山陰蘭亭集。況乃長安麗人行。東西南北俱爲客。且送江頭返照明。灑奎律髓

哭蔡西山

鵠叫春林復遞詩。雁回霜月忽傳悲。蘭枯蕙死迷三楚。雨暗雲昏礙九疑。早歲力辭公府檄。暮年名與黨人碑。嗚呼季子延陵墓。不待鏹辭行可知。

柳溪詩話。朱晦菴書西山墓碣云：嗚呼有宋蔡李通父之墓，效夫子之書延陵墓也。當時哭詩推此篇爲首。

句

青雲道遠龍媒老。白雪詞高鬼膽寒。贈阮梅峯

桐江文集

韓 潺

灝字仲止元吉之子有高節從仕不久卽歸信上嘉定中卒有澗泉集

書姜白石昔遊詩後

平生未踏洞庭野亦不會登南嶽峯因君談舊游恍如常相從江淮歷歷轉湘浦裘馬意氣傳邊烽吾嘗汎大江祇見匡廬松乘風醉臥帆影底高浪直濺嵐光濃日暮泊船時是時方嚴冬雪花壓船船背重纜搖柁鼓聲如鐘當年意淺語不到無句可寫波濤春君詩乃如許景物不易供盡歸一毫端狀□□飛龍人閒勝處貴著眼雖有此興無由逢錢唐山水亦自好柰何薄宦難從容南高北高一千丈潮頭日夜鳴靈蹤應有隱者爲識賞青轡布韁扶杖筇君無詫彼我媿此急還詩卷心徒忪白石道人詩集附

懷古

近城人語雜深山人語少重露滴烟嵐野水見魚鳥稻粱豐稔外耕鑿願溫飽所以桃源人不與外人道少壯既奚爲老矣復難強紫芝未必仙采之亦可餉耆耄八九十道可無俯仰所以商山人辭漢寧獨往

戴石屏哭澗泉詩云雅志不同俗休官二十年隱居溪上宅清酌澗中泉慷慨商時事淒涼絕筆三篇遺稿在當並史書傳自注聞時事驚心得疾而死作所以桃源人所以商山人所以鹿門人三詩蓋絕筆也

七月

水石雲山裏歸來已九秋隔城如淺近鄰寺始深幽慧遠逢修靜文淵說少游徑荒殊不埽風葉上牽牛

雨多極涼冷

焉知三伏雨已作九秋風木葉涼應脫禾苗潤必豐地偏山吐月橋斷水浮空雞犬鄰家外魚蝦小市中

晚雨可愛

燈火涼秋夜。空山雨到簷。吹聲初甚少。落勢近頻添。  
離菊叢叢潤。畦蔬種種霑。沈思仍靜聽。香鼎伴書籤。  
以上瀛奎律髓

余 儒

儒字季倫。號癡齋。鄱陽人。有蛙吹集。

題韓仲止壁

謁入久不出。兀坐如枯荄。蒼頭前致詞。問我何因來。  
士節久凋喪。人情易嫌猜。本無性命憂。不去安待哉。

游官紀聞。余癡齋。吾鄉詩人也。章泉雅愛之。作書使訪韓仲止。及門候謁甚久。猶未出。余題詩壁間。拂袖去。仲止見詩。使人追之不返。

范 模

模字叔范。豐城人。有竹林類橐。

哭趙忠定

日月開黃道。乾坤奠渾儀。斯人今已矣。吾道竟何之。  
玉鉉憂思苦。金縢感慨遲。仆碑今復立。恨不見封彝。  
壘董青冥上。夔龍紫極邊。五龍方夾日。九虎已當天。  
夷險丹心直。安危白髮卷。弔湘人不去。何用解膠弦。  
南昌府志

姜 變

宋 詩 紀 事 卷五十九

夔，字堯章。鄱陽人。蕭東夫識之于年少，客游妻以兄子，因寓居吳興之武康。與白石洞天爲鄰。自號白石道人。慶元中，曾上書乞正太常雅樂得免解訖，不第而卒。有白石詩集。

題嚴州烏石寺

諸老凋零極可哀，尙留名姓壓崔嵬。  
劉郎可是疎文墨，幾點胭脂涴綠苔。

鶴林玉露：嚴州烏石寺在高山之上，有岳武穆飛張衡王俊劉

太尉光世題名，劉不能書，令侍兒意真代書。姜堯章詩云云。

姑蘇懷古

夜暗歸雲繞柁牙，江涵星影鶩眠沙。  
行人悵望蘇臺柳，曾與吳王埽落花。

送朝天續集歸誠齋時在金陵

翰墨場中老斲輪，真能一筆埽千軍。  
年年花月無閑處，處處江山怕見君。  
箭在的中非爾力，風行水上自成文。  
先生祇可三千首，回施江東日暮雲。

鶴林玉露：姜堯章學詩于蕭千巖，琢句精工，有姑蘇懷古詩云云。楊誠齋喜誦之，嘗以詩送江東集歸誠齋云云。誠齋大稱賞。謂其家嗣伯子曰：吾與汝勿如姜堯章也。報之以詩云：尤蕭范陸四詩翁。此後誰當第一功？新拜南湖爲上將，近差白石作先鋒。可憐公等皆寢絕，不見詞人到老窮。謝遣管城僕已晚，酒泉端欲乞疏封。南湖謂張功父也。

除夜自石湖歸苕溪

細草穿沙雪半銷。吳宮烟冷水迢迢。梅花竹裏無人見。一夜吹香過石橋。  
美人臺上昔歡娛。今日臺空望五湖。殘雪未融青草死。苦無麋鹿過姑蘇。  
黃帽傳呼睡不成。投篙細細激流冰。分明舊泊江南岸。舟尾春風颭客燈。  
千門列炬散林鴉。兒女相思未到家。應是不眠非守歲。小窗春色入燈花。  
三生定是陸天隨。只向吳淞作客歸。已拚新年舟上過。倩人和雪洗征衣。  
沙尾風回一櫂寒。椒花今夕不登盤。百年草草都如此。自琢春詞翦燭看。  
笠澤茫茫雁影微。玉峯重疊護雲衣。長橋寂寞春寒夜。祇有詩人一舸歸。  
桑閒篝火卻宜蠶。風土相傳我未諳。但得明年少行役。祇裁白苧作春衫。  
少小知名翰墨場。十年心事祇淒涼。舊時曾作梅花賦。研墨于今亦自香。  
環玦隨波冷未銷。古苔留雪臥牆腰。誰家玉笛吹春怨。看見鵝黃上柳條。

文獻通考直齊陳氏曰楊誠齋賞此十絕以爲有裁雲縫月之妙思敲金戛玉之奇聲

### 過垂虹

自作新詞韻最嬌。小紅低唱我吹簫。曲終過盡松陵路。回首烟波十四橋。以上白石詩集

硯北雜志小紅順陽公青衣也有色藝順陽公之請老姜堯章詣之一日授簡徵新聲堯章製暗香疏影二曲公使二妓習之音節清婉公尋以小紅贈之其夕大雪過垂虹賦詩云云順陽公卽范西湖

嘉泰壬戌上元日訪全老子淨林廣福院觀沈傳師碑隆茂宗畫贈詩  
深衣跨羸驂杏杏春山路入寺君未知閑看移桂樹  
沈碑含秀潤隆畫出神奇道人那得此老子乃耽之

龍井

年時六月海揚塵遙見青山起白雲聞有高僧來誦咒巖前拋瓊問龍君以上咸淳臨安志

燈詞

燈已闌珊月氣寒舞兒往往夜深還祇應不盡婆娑意更向街心弄影看  
南陌東城盡舞兒畫金刺繡滿羅衣也知愛惜春游夜舞落銀蟾不肯歸

武林舊事都城自舊歲冬孟駕回已有乘肩小女鼓吹舞綰者數十隊以供貴邸豪家幕次之覩而天街茶肆漸已羅列燈籠等求售謂之燈市三橋等處客邸最盛舞者往來最多每夕樓燈初上則簫鼓已紛然自獻于下酒邊一笑所費殊不多往往

至四鼓乃還姜

白石有詩云云

沙河雲合無行處惆悵來遊路已迷卻入靜坊燈火空門門相似列蛾眉  
遊人歸後天街靜坊陌人家未閉門簾裏垂燈照樽俎坐中嬉笑覺春溫

武林舊事邸第好事者如清河張府蔣御藥家閒設雅戲烟火花邊水際燈燭燦然游人士女縱觀則迎門  
酌酒而去又有幽坊靜巷好事之家多設琉璃五色泡燈更自雅潔靚妝笑語望之如神仙白石詩云云

珠絡琉璃到地垂。鳳頭銜帶玉交枝。君王不賞無人進。天竺堂深夜雨時。

武林舊事西湖諸寺惟三竺張燈最盛往往有宮禁所賜貴瑞所遺者都人好奇亦往觀焉白石詩云云

貴客鉤簾看御街。市中珍品一時來。簾前花架無行路。不得金錢不肯回。

武林舊事元夕節物婦人皆戴珠翠鬧蛾玉梅雪柳菩提葉燈毬銷金合蟬貂袖項帕而衣多尙白蓋月下所宜也節食所尙則乳糖圓子餽餠料斗粉豉湯水晶膾韭餅及南北珍果并阜兒糕宜利少澄沙欄子滴酥鮑螺酪麵玉消膏琥珀鴨輕鷄生熟灌藕諸色龍纏蜜煎蜜果糖瓜羹煎七寶薑豉十般糖之類皆用鏤鎔裝花盤架車兒族插飛蛾紅燈綵盞歌叫喧闐幕次往往使之吟叫倍酬其直白石亦有詩云云

自題畫像

鶴氅如烟羽扇風賦情芳草綠陰中黑頭辦了人閒事來看凌霜數點紅硯北雜志  
小山不能雲大山半爲天

瞿佑歸田詩話姜

堯章句造語奇特

屋角紅梅樹花前白石生

愛日齋叢鈔姜堯章居苦溪上與白石洞天爲鄰潘德久字之曰白石道人有句云云白石生見神仙傳中黃丈人弟子也歲貢白石爲糧時號白石生堯章用此三字蓋有據

蘇石

石慶元中溧陽令。

句

所幸小紅方嫁了。不然啼損馬塍花。

硯北雜志。堯章每喜自度曲吹洞簫。小紅輒歌而和之。堯章後以疾歿。故蘇石挽之云云。宋時花藥皆出東西馬塍。西馬塍皆名人葬處。白石歿後葬此。

葛天民

天民字無懷。山陰人。有小集。

癸辛雜識。葛無懷初爲僧。名義鉢。字朴翁。其後返初服。居

西湖上。一時所交皆勝士。有二侍姬。一曰如夢。一曰如幻。

絕句

夜雨漲波高二尺。失卻擣衣平正石。天明水落石依然。老夫一夜空相憶。

看山

我本田夫作比丘。也知騎馬勝騎牛。如今馬上看山色。不似騎牛得自由。

訪端叔提幹

月趁潮頭上。山隨柁尾行。大江中夜滿。雙櫓半空鳴。雁冷來無幾。鷗清睡不成。平生師友地。此夕最關情。

西湖泛舟入靈隱山

晴嵐漠漠水溶溶落葉遮船翠蓋重秋色盡爲漁者占山光多向道人濃雲連合抱前村樹閒繞飛來小  
朵峯送罷夕陽迎素月樓臺高下自鳴鐘

孤山後寫望

凭高每歎昔人非空有峯峯礙落暉大雅風流誰舉似長安秋草又衰微寒花負約開猶嬾幽鳥忘機趁  
不飛來往半生堪記處西村燈火夜船歸

卽事

寒食少逢天氣佳十日九日雨如麻新巢初見燕生子小巷已無人賣花

六月一日與堯章泛湖

六月西湖帶雨山小舟終日傍鷗閑風烟如許關情久賓主相推下語難幾點送君歸大雅一涼今夜滿  
長安江湖遠思知多少歸去風前各倚闌

荷葉浦中

急雨捎荷分外奇珠璣狼藉錦紛披下塘六月關心處西塞扁舟入手時卻傍青蘆深處宿還思白石去  
年詩平生浩蕩烟波趣月淡風微祇自知

正月二十七日雨中過蘇隄

一隄楊柳占春風柳外羣山細雨中人苦未晴渾不到祇宜老眼看空濛

清明訪白石不值

花薺懸燈柳插簷。老懷那復似餳甜。畫船已載先生去。燕子無人自入簾。以上無懷小集  
絕句

二十四友金谷宴。千三百里錦帆遊。人間無此春風樂。樂極人間無此愁。

貴耳集云。  
朴翁絕唱。

嘗北梨

每到邊頭感物華。新梨嘗到野人家。甘酸尚帶中原味。腸斷春前不見花。山家清供。

船子釣灘

澤國茫茫水接天。孰云無法與人傳。見成風月難迴避。盡在華亭一釣船。松江府志。

周文璞

文璞字晉仙。號方泉。又號野齋。又號山楹。陽穀人。有方泉先生集。

貴耳集。野齊周晉仙嘗語余曰。花閒集祇有五字絕佳。細雨溼流光。  
景意俱微妙。野齊灌口二郎歌聽歐陽琴行金銅塔歌不減賀白。

姜堯章金銅佛塔歌

白石招我入書齋。使我速禮金塗塔。我疑此塔非世有。白石云是錢王禁中物。上作如來捨身相。飢膺餓

虎紛相向拈起靈山受記時。龍天帝釋應惆悵。形模遠自流沙至。鑄出今回更精緻。錢王納土歸京師。流落多在西湖寺。錢王本是英雄人。白蓮花現國主身。蛇鄉虎落狗腳朕。何如紅袍玉帶稱功臣。天封坼開卽退聽兩浙。不聞笳鼓競歸來。佛子作護持。太師尙父尙書令。一枚傳到白石生生今。但有能詩聲同袍。秦外銛師兄。哦詩禮塔作佛事。同喫地爐山芋羹。何曾薰陸綺牀供。但見相輪銅綠明。哦詩禮塔猶未畢。蘆葉低飛山雨溼。

南華陽洞

稽首游名山。駕言入華陽。南洞極祕怪。松草泉水香。曲几妙隸畫。殘碣刊靈章。俯首試一窺。冷風襲綃裳。守菴敬愛客。暖我紫朮湯。遺我鵝眼錢。云是洞所藏。往有尋幽徒。入見黃金牆。侈心或已起。幾受奇鬼戕。身儻獲會遇。敢恨飛蓬霜。更丐一片土。小築安閑房。朝披神芝圖。暮試飢飯方。

金牛洞

凌兢下危梯。俛僵入深穴。回身避雲霧。假面眎日月。藥苗護飴竹。節截辭攀安。知幽蹊下。有此大奇絕。金牛鏟光景。仙譟尚可閱。岡頭春已半。枸杞如點血。便恐顛風興。橫吹石崖裂。

道中望茅山有感

危亭對名岳。畢景扶鉤闌。白鶯伺察過。低昂若弓彎。去歲負笈遊。最佳元符閒。櫟林帶脩竹。派流清珊瑚。離留叫晝靜。洞天生春寒。偉哉老宗師。作屋雲雨端。竟爲殺蟲蟻。不活升龍鸞。遺體但解蛻。故宮亦燒殘。今瓶已半舊。萬柱扶元壇。遂以兩不借。一筇履巒巔。入宅問玉斧。采芝投金環。墨沼篆結字。丹臺氣成盤。

將謂便隱遁，遽亦羅閒關。夷甫塵尾墮，荀令香爐閑。再拜望奇秀，恍然神觀遠。如見大仙伯，初髮綠映山。兩君控鶴從俱著，漢小冠俗累當復馳。煮藥鼎欲翻。

吳中秋日

郊原落葉已離離，尚有孤花鬪短離。小醉不成憐病後，苦吟未了說愁時。鬪雞走狗袁絲喜，臨水登山宋玉悲。豆角已收無別事，待同野老赴襟期。

歸憩仁王寺

重到招提未覺遲，鉢單初副拾衣時。僧房齋院門門閉，梅子枇杷樹樹垂。蟻陰經牀求託化，龍纏佛座學慈悲。長年無事閑來此，坐對空山諷小詩。

山居書事

荼蕘架倒無人架，全似老夫狂醉時。昨夜一番溪雨橫，又漂苔蘚到花枝。

歐陽琴歌

嗚呼箇是文忠琴，嗚呼此琴今尙存。堂中圖書散失盡，留得七弦傳子孫。六字自書書在腹，古錦梅花留不得。嗣孫賢者能忍貧，不向豪家博珠玉。初鼓如撼昭陵松，羣原流水青溶溶。三宗龍袞在帝左，留把鈎天賜與公。再鼓似播清潁水，祇將漱流肯洗耳。曾蘇兩生招不來，自寫新聲付兒子。堯囚山，舜放野。自此以下不平苦，與君所得歸女謗。此日一洗清萬古，小儒昔誦五季傳。頗訝春秋體微變，今來再聽七弦琴。南薰遺製喜復見，浮雲流盡白日逃。何用廣陵與離騷，譜成祇度歐公曲。秋聲賦共廬山高。琴有公題

晨起

閉門不與俗人交。元晏春秋日日抄。清曉偶然隨鶴出。野風吹折白櫻桃。

訪梅

幽花墜在石根傍。幾欲攜將近草堂。草草一尊聊爾爾。跨驢歸去月荒涼。

山樂官

山樂官爾誰魂逃。河入海俱奔奔。伶倫梨園何可論。山樂官予欲爾兮無言。如有言爲予歌雲門。

大滌洞

嵌空纔入泉潏潏。隔凡倒懸若錐立。道士云是閻丘公。入向華陽便門出。

題鍾山

往往秦淮問六朝。江樓祇有女吹簫。昭陽太極無行路。幾處鵝黃上柳條。

壽星寺聞子規

莫向空山惱病僧。暮雲臺殿異鄉人。多時不識巴江路。守著濃花哭過春。以上方泉先生詩集

題洞霄宮

久知靈境無緣到。今被春風引得來。上帝殿頭聞雨過。仙人石面欠花開。便燒沈水禮三拜。快引流霞酌

一杯落日斷霞催去緊。掉巾祇等白鶲回。洞霄詩集

潘 樺

檉、字德久。永嘉人。舉進士不第。用父賞授右職。爲閤門舍人。福建兵鈐。有轉菴集。

葉水心序。德久十五六。詩律已就。永嘉言。

詩者皆本德久。讀書評文。得古人深處。

劉後村跋。元祐間最爲本朝文章盛時。惟賀方回、劉季孫不緣師友。頽頹其閒。雖坡谷亦深嘉屢歎。其後有劉翰武子潘檉德久尤爲項平菴、葉水心賞重。

### 送友人游金陵

酒盡談餘意轉新。北風一舸下寒津。遙知白下登樓處。正欠黃初著句人。往事生來多歲月。舊遊疎似曉星辰。半山斜日荒涼寺。更有殘碑待拂塵。

### 出郭

酣酒三入市。題詩十里塘。薄雲鷗外影。空翠馬頭香。出郭知無事。尋僧有底忙。終當成野逸。小築近滄浪。

白髮將朱顏。一去幾時返。懷哉不能寐。展轉復展轉。雀噪曉窗白。雞鳴芳歲晚。梅花眼中春。故情千里遠。  
歲暮懷舊  
還自錢塘道中

江上青山落照邊。江頭歸客木蘭船。春鷗自共潮回去。一點飛來是柳綿。

### 自滁陽回至烏衣鎮

行人元不恨長途。下馬旗亭酒可沽。回首琅邪山不見。西風吹起豆田烏。以上前賢小集拾遺

姜堯章自號白石道人贈之以詩

世閒官職似撈蒲采到枯松亦大夫白石道人新拜號斷無繳駁任稱呼。

書姜白石昔游詩後

我行半天下未能到瀟湘君詩如圖畫歷歷記所嘗起我遠游興其如鬢已霜何以舒此懷轉軫彈清商  
以上白石道人集附

鶯

銀潢何限鵲查查看得橋成度寶車如許風標無用處年年分占水蓀花詩家鼎贊

麗春花

梁苑花銷去黃臺早自薰不同鶯子粟別是石榴裙婀娜纔勝掌參差莫夢雲王郎尋水竹駐履幾殷勤  
合璧事類別集

題釣臺

蟬冠未必似羊裘出處當時已熟籌但得諸公依日月不妨老子臥林丘英雄陳迹千年在香火空山萬木秋自笑黃塵吹鬢客愛來祠下繫孤舟

上龜山寺

菜花開處認遺基荒屋殘僧未忍離寺付丙丁應有數岸分南北最堪悲金鈴塔上如相語鐵佛風前亦皺眉野匠不知行客意競磨濃墨打殘碑以上瀛奎律髓

遇舊有感

人聞百寒暑，正似須臾期。當年同袍子，一見雪滿頤。不惟形容改，亦復聲音移。坐定問姓字，始省從師時。見此發永歎，勞生果何爲。不如多飲酒，滿腹同鴟夷。

客舍

急雨鳴空壁，輕寒上薄幃。愁多空被酒，夢短不成歸。暗想桃花落，遙憐燕子飛。偷兒欺客寢，夜靜卷春衣。

雪上簡婁舜章

雞頭旋煮蓮新拗族，鳳排花鮆更鮮清。夜故人忻客到，小船載酒大船邊。

平江道中

不載圖書載酒杯，姑蘇臺下小徘徊。東風不識人心老，擺柳吹花一併來。以上東甌詩集

沈繼祖

繼祖，富川人。慶元中御史。有樞林集。

寄題新昌簿廳綠陰亭

洛下追收黃耳信，林閒聞聞瓶綠陰亭。千章古樹虛簾接，四月清風羽扇停。兄弟頭顱時感歎，江湖歲月久飄零。對牀夜話知他日，幽賞何如得細聽。瑞州府志

王 遂

遂字去非，一字穎叔。金壇人。嘉泰二年進士。理宗朝歷江西安撫使、權工部尚書。卒謚正肅。

題蘇端明書天慶觀乳泉賦後陵陽李心傳云此軸蓋蘇公元符北歸所書

天一生兮上浮羽人唉兮丹丘遡儻耳兮東注夾崑崙兮倒流式古堂書考

曹 續

縉字西士號東畊溫州瑞安人嘉泰二年進士擢祕書丞倉部郎累遷知福州寶章閣待制致仕卒謚文恭

暮春

門外無人問落花綠陰冉冉徧天涯林鶯啼到無聲處春草池塘獨聽蛙後村千家詩

題括蒼馮公嶺二首

平蕪千里綠迢迢水宿山行好耐勞最是愁人最奇崛馮公之巘浙江潮  
村南村北梧桐樹山後山前白菜花莫向杜鵑啼處宿楚鄉寒食客思家梅磬詩話

楊柳

春至風花各自榮就中楊柳最多情自從初學宮腰舞直至飄綿不老成詩林萬選

詠緣竿伎

又被鐣聲送上竿者番難似舊時難勸君著腳須教穩多少旁人冷眼看

齊東野語趙南仲以誅李全之功見于趙清臣史揆每左右之遂留于朝其後恢復事起遂分委以邊面赴鎮日朝紳置酒以餞適有呈緣竿伎者曹賦詩云云師果不競

劉鎮

鎮字叔安，南海人。嘉泰二年進士。學者稱隨如先生。有隨如百詠，刊于三山。

贈隱者

夫子生東野，經年不到城。愛吟無俗趣，貪畫得閑名。荒徑侵山影，虛堂出燕聲。我慙爲謫吏，泉石負幽情。

鄭鄧夢

鄧夢，建安人。

游洋州崇法院

曉色熹微，麥隴閒杖藜。徐步扣禪關，兩澆水足東西堰。一抹雲收南北山，世路飽諳驚歲晚。佛巖燕坐覺身閑，故園早辦歸來計。莫待星霜滿鬢斑。

陝西通志載此詩跋云：建安先生得句法于石湖范公，早以文章名世。今觀是詩，如藍田之珍，荆山之璞，不假雕琢而自爲至寶。曾正顯刻之精藍，當山水清絕處，乃復著此澄澹簡潔之語，使讀之當有蕭然脫去世網之意者矣。嘉泰癸亥四月既望，洋

州教授

張績跋

龔頤正

顧正，本名敦頤。光宗受禪，改今名字。養正相之子。嘉泰中國史院檢討官。著芥隱筆記及元祐黨

籍列傳譜述續釋常談

泰伯廟迎享送神辭三章

翼翼兮新宮。蘭榓兮枅桂。氛總總兮高靈下隊。君視八紜兮昔何殊于棄屣。今復何有兮一席之墳。惠我吳人兮曷日以弭。吁嗟君來兮我心則喜。君來不來兮我忘食事。迎神享神。

登歌兮堂上。屢舞兮堂下。君來享兮清酤。溪毛陸離兮筐筥。鯽鱸芳鮮兮亦有肥羶。君不來兮使我心苦。吳人兮無疾與患。千秋萬歲兮歌至德以何言。送神吳郡志。

張達明

達明、嘉泰中知吳江縣。

題吳江甘泉在石塘第四橋下。陸羽茶經品爲第四。張又新品爲東南第六。

橋下四榦水人閒六品泉。松陵無魯望山茗爲誰煎。吳江縣志

朱軾

軾、字叔止。翌之姪。嘉泰閒知南劍州。

題汪浮溪先生墓

名高從昔毀相隨。未免羣兒著力擠。一日狼心萌偃月。十年豹霧隱愚溪。不逢華旦開昌運。終抱沈埋返

宋詩紀事 卷五十九

一五三六

故棲已矣九原寧可作蕭蕭古木亂蟬嘶游宦紀聞。

# 宋詩紀事卷六十

錢唐厲鶚輯  
德清徐以坤勘定

黃順之

順之字佑甫邵武人開禧元年進士

聽悟師彈招隱

悟師手攜清風琴爲我再奏招隱吟九原靈均不可作後人遺恨空沈沈我今聽之淚霑襟楚山日落秋聲起古猿啼月空山裏千年愁思上青楓幽蘭無香桂花死吾道非耶何至此曲中歷歷分明道苦怨王孫負春草歲晚山中難久留憶君一夕令人老王孫王孫知不知琴心招君胡不歸下沿湘江之水流上逐湘山之雲飛一彈一招一太息水流雲飛朝復夕

送葉靖逸

山高積雪明歲序冉以逼佳人抱書去西湖失顏色清夜獨慨慷詩壇夢生棘我有雙鯉魚對之不敢食

初寓橫涇

十年泉石夢及此始依然野迥天垂地身閑日抵年稍欣聞見少漸與土風便分得漁樵席白雲相共眠

題九曲尼院

曾是霓裳第一人。曲終認得本來身。多年不作東風夢。閑卻薔薇一架春。

觀冷水峪桃花

石家步障久成塵。移作包山一段春。惆悵日斜原上路。年年紅雨打行人。以上前賢小集拾遺。

韜光菴

瘦筇拄到古韜光。分得山僧半榻涼。幽鳥一聲春夢斷。溼雲漠漠護殘香。咸淳臨安志。

李宗勉

宗勉字強父。富陽人。開禧元年進士。理宗朝拜參知政事。左丞相兼樞密使。卒贈太師。謚文清。

題六和塔

經從塔下幾春秋。每恨無因到上頭。今日始知高處險。不如歸去臥林丘。咸淳臨安志。

危和

和字祥仲。逢吉弟。號閑靖居士。又號蟾塘。開禧元年進士。知德興縣。有蟾塘集。

積翠樓

著我高遠堂。恍若非人世。一榻臥白雲。清寒不成寐。松竹四山秋。颺颺驚客耳。誰在隔窗中。朱弦寫流水。

撫州府志

陳垓

垓字漫翁。閩縣人。密學襄六世從孫。開禧元年進士。官至淮東提刑。

絕句

硯乾筆禿墨糊塗。半夜敲門送省符。擲得么么監獄廟。恰如輸了選官圖。

吹劍錄陳漫翁監轉般倉與鎮江守喬平章爭一事平章

乞回避漫翁得嶽祠吏持牒索回文漫翁就書一絕云云

華 岳

岳字子西貴池人爲武學生開禧元年上書請誅韓侂胄蘇師旦下大理鞠治編管建寧園土中侂胄誅放還登嘉定武科第一爲殿前司官以史彌遠當國謀去之事覺下臨安獄杖死東市有翠微南征錄

春暮

麥鬚豆莢雨生肥。閑綠園林粉蝶飛。曠寘好花安四壁。不教人道是春歸。

游溪西寺次府判湯丈韻

寺覺重遊好。僧期後會賒。青蟲雕病葉。白鳥篆平沙。水瘦石生齒。山寒梅未花。功名應有待。且謁惠公茶。別館卽事

十年客裏過春光。客裏逢春分外狂。半堵碧雲蝸路溼。一簾紅雨燕泥香。衡山西日辭香閣。拍岸春風趁夜航。莫向錢塘蘇小說。東吳新髻李紅娘。以上翠微南征錄

呂聲之

聲之，字大亨，新昌人。官宿松尉，徙平陽丞，終昭信軍節度推官。有沃洲雜咏。

賀葉司業兼中書舍人

英妙才華四十年，山林朝市姓名傳。  
何妨萬斛橫江上，不礙千帆過目前。我肯尾書千木紙，人饒首著祖生鞭。  
金鑾何日商風雅，伴直能呼孟浩然。

丹丘道中

夜宿溪頭十里村，數星魚火照籬門。  
鴈山峭絕經行處，猶帶煙霞入夢魂。以上四朝詩

嚴大猷

大猷，蒼溪人。特奏名。官隆慶府參軍。

句

笏未到身難擊泚，兵如入手易擒吳。

萬姓統譜吳曠留  
蜀大猷詩云云

王翥

翥，字一飛，成都人。篤學尚氣。吳曦謀反來請，翥陽病風瘡，潛往安丙謀誅曦。事定，匿巴中，爲農終身。

送張判官歸巴州

回首三巴曲。平生萬里橋。衣冠無賴客。花月可憐宵。

灌口秋漲

所向愁無地。窮源欲上天。蛟龍胡爾怒。鷗鷺更誰憐。萬里朝宗意。羣兇跋扈年。生涯秋色裏。獨立問漁船。

吳宣撫故宅

社稷疲奔命。乾坤服至誠。扶持三蜀在。出入兩朝榮。豕犬有遺恨。麒麟空復情。家聲墮已盡。國法用猶輕。成季翻無後。花卿浪得名。門庭黃鳥語。几杖綠苔生。威福何偏重。精神恐不平。庶幾蒙世立。凡百慎持盈。

憶舍弟

藥物吾仍病。花時汝未歸。不眠愁月落。獨立看雲飛。詩禮自持律。飢寒誰解圍。遙知理舟楫。西望涕沾衣。

以上答音

方信孺

信孺字孚若。興化軍人。以廕補官。開禧中假朝奉郎使金。三往返不詘。歷淮東轉運判官。知真州。至廣西漕。有好菴游戲詩境集。

劉後村序。公詩文操簡立。  
成宮羽協諧經緯麗密。

題龍隱巖

春波飽微綠。斗柄涵空明。方舟貫巖腹。鵝鶴相酬鳴。仰窺穹窿頂。宛轉百怪呈。僅餘鱗甲碎。不見頭角獰。

下闢清冷淵演迤萬頃澄但同魚鳥參勿遣蛟龍驚抉苔撫奇篆倚櫂看題名三將標殊勳自與山不傾誰歟贅小築政恐噴山靈南洞更幽絕仙佛依崕崿太虛可爲室豈復資纏楹乳泉助茗椀中有冰雪清何須驂鸞去此卽白玉京鼎來不速客抱琴忽遲迎愛此無弦曲巖溜同一聲爲我洗塵耳喚我詩魂醒祇愁白衣到好句無繇成

郴州黃潭舜祠

西風攬桂樹落日明楓林遊子懷歸期余悲渺登臨虞山一何高湘水一何深英皇僅枯冢寂寞南薰琴我欲奏古曲俗耳更哇淫古器不可見聊作相思吟相思長相思相思無古今一歌衆鳥聽再歌萬籟沈推手君勿歌有酒且孤斟落落此時意寥寥千載心五弦毋庸絕四海誰知音

重題龍隱巖

愛山那惜走千回生怕前驅後騎催石上參差鱗甲動眼中在處畫圖開驂鸞未辨乘風去浮鷁何妨載雨來人事百年俱變滅祇應題字不塵埃以上曹氏歷代詩選

游九言

九言字誠之建陽人父峕湖南安撫參議官九言筮仕古田尉開禧中知光化宰充荆鄂宣武參謀官卒端平中特贈直龍圖閣謚文靖有默齋遺稿

金陵野外廢寺

寒花窈嫋蔓頹牆古寺蒼苔盡掩房犬吠屋頭山杳杳蟲鳴塔隙草荒荒池塘淡日兼葭冷籬落西風橋

柚黃六代江山金碧地。斷碑留得管興亡。

聽鄭三彈雙韻子歌

寒窗積雪生虛明。玉壺風折層簷冰。朱霞秀色妙公子。理弦燈下高亭亭。遊絲兩兩挂孤月。雙聲應手無  
留停。月寒坏戶砌蟲泣。雲凍出浦邊鴻征。蒼蠅撲紙窗欲透。螺巖穴桑兒未成。琵琶寬詳雙韻切。含悽盡  
向弦中說。酒酣疏綺雜娛嬉。誰道壯夫心更折。一從虧毳被河山。學得聲容難辨別。鵝鳩金屋沸歌吹。鼠  
頭寶陌行轡轍。帕腰慢舞作彎弧。捉耳醻觴真折馘。眼前猶聽舊歌辭。鳳韶豈獨鏘虞時。罷彈三喟寂不  
熟。風定寒江靜夜悲。以上默齋遺集

美人倚樓圖

簷頭燕子說春寒。胡蝶悠悠午夢殘。睡起高樓多少恨。天涯小雨怯闌干。

溪上

烟開曉日照溪頭。溪上人家岸下舟。啼鳥不知春已老。數聲啼破碧巖幽。以上詩家鼎鑊

游儀

儀字伯莊。長平之勝士。早遊京師。自北方縱覽名山。已而浮洞庭歸。隱武溪之上。

黃鶴樓

長江巨浪拍天浮。城郭相望萬景收。漢水北吞雲夢入。蜀江西帶洞庭流。角聲交送千家月。帆影中分兩  
岸秋。黃鶴樓高人不見。卻隨鸚鵡過汀洲。

詩人玉屑。按柳溪呂炎近錄云。伯莊此詩險矣人口。  
游默齋嘗書寘南樓。游受齊漕湖北日復爲之刻石。

游

惆

惆字憲武。

金精山歌

皴帑蹙鳳金屈盤。秦釵□鬢香添寒。洞庭波橫嬌不起。舞娥拂桂棲孤鸞。寶□□色元宮闕。碧峽瑤草春  
漫漫。霜刀如泥割蒼玉。□紹閣綺白日閑。楣花紅飛洞雲溼。驚雷挾空老蚪泣。崖前紅落霞不流。縞衣丹  
使杓衡急。君不見石髮流漿翻柱礎。弱水液橫天上乳。西方七宿櫬槍熒。長沙地遠豐鐘鳴。金精風月

趙

廸一作雍

廸號竹潭忠簡後人。開禧間爲處州太守。

雪夜黃州城下

雪後人家早閉門。江寒水落見沙痕。黃州城下東坡路。月浸梅花正斷魂。詩林萬選

煙雨樓在處州

畫棟飛雲暮靄寒。樓臺城堞有無閒。煙收雨霽曾看否。見盡東南萬疊山。括蒼彙紀

高孝璣

孝璣字公純。臨邛人生。開禧中。魏了翁表叔。

臨安西湖

朱簾白舫亂湖光。隔岸龍舟橫夕陽。今日懽遊復明日。便將京洛看錢塘。魏鶴山題跋

李丙

丙字仲南官左修職郎監臨安府都鹽倉

夜夜曲

玉窗結怨歌幽獨。弦絕鸞膠幾時續。銅龍漏促春夜長。冷雨酸風亂心曲。閑熏翠被鬱金香。拂拭繡枕屏。山綠飛飛乳燕歸不歸。寂寞流蘇帳前燭。前賢小集拾遺

高翥

翥字九萬餘姚人有菊磵小集

過臨平

征帆一似白鷗輕。起揭篷船看曉晴。梅子著花霜壓岸。自披風帽過臨平。

春日湖上

清波門外放船時。盡日輕寒戀客衣。花下笑聲人共語。柳邊橋影燕交飛。曉風不定棠梨瘦。夜雨相連霽。麥肥最憶故山春。更好夜來先遣夢魂歸。

重午懷舊

獨守空庭日欲晡。滿斟濁酒不須沽。白頭兄弟三年別。青眼交游一字無。醉看葵榴懷舊事。饒思櫻筍夢。

吾廬向時癡絕今愁絕。自讀離騷些老夫。

初聞雷

二月寒猶在。春雲溼未開。灑窗終夜雨。發輒數聲雷。薺麥綠生腦。棠梨紅拆腮。西湖花事動。從此日徘徊。

無題

風竹蕭蕭淡月明。孤眠真箇可憐生。不知昨夜相思夢。去到伊行是幾更。

秋興

數聲新雁夜初長。曉起開門衣袂涼。籬菊褪黃秋興嬾。瓦溝才試一痕霜。

題二小姐扇

慶娘顰翠眉。春瘦怯羅衣。笑問采花蝶。如何成對飛。

湘湘未識羞。獨坐抱箜篌。貪學耆婆舞。擡身拜部頭。

恭跋思陵宸翰拓本卷後

淡黃越紙打殘碑。盡是先皇御賜詩。白髮內人和淚讀。爲曾親見寫詩時。

下塘二首

河水新添三尺高。河邊蘆葦有龜巢。波流夜夜飄魚箔。空點籃燈照樹梢。日出移船日又斜。蘆根時復見人家。水鄉占得秋多少。岸岸紅雲是蓼花。犧下酒市多祭二郎祠山神。

簫鼓喧天鬧酒行。二郎賽罷賽張王。愚民可煞多忘本。香火何曾到杜康。

過平原故相宅

拂曉官家簿錄時。未曾吹徹玉參差。旁人不忍聽鸚鵡。猶向雕籠喚太師。以上菊磵小集

齊東野語。韓侂胄久用事。欲立奇功以固位。首謀北伐。出師諸將相繼潰敗。金人渡淮圍楚州。遣方信孺奉使通謝。信孺回言。金人欲太師首級。侂胄怒。謀再用兵。楊后俾榮王入奏。復命史彌遠錢象祖衛涇王居安張鎡誅。侂胄時開禧三年十一月二日。侂胄愛姬三夫人號滿頭花者生辰。張鎡移庖府中。酣飲至五鼓。其夕周筠聞其事。遂以覆帖告變。侂胄已被酒叱曰。誰敢。遂升車而去。甫至六部橋。殿司夏震聲諾於道旁曰。有旨太師罷平章事。日下出國門。語未竟。建卒百餘人擁其輜。出至玉津閘夾牆內。搗殺之。

西湖暮歸

風荷百頃占漣漪。煙樹冥濛乳燕飛。買斷小舟休喚客。暗穿萍葉載詩歸。咸淳臨安志

感懷

漂泊南州又過年。恰如杜子客鄜川。酒堪度日難爲醉。詩怕傷時未可傳。店舍無煙兵火後。街坊有月試燈前。荒涼古驛聞吹笛。老淚縱橫落枕邊。

拜林和靖墓

玉函香骨老雲根。占斷孤山水月村。薦菊泉香涵竹影。種梅地冷帶苔痕。生前已自全名節。身後從誰問

子孫惟有年年寒食日遊人來與醉清尊

以上詩林萬選

春詞

鬪草歸來上玉塔香泥微汚合歡韁全籌贏得無人賞依舊春愁自滿懷貴耳集

李熙輔

題真空閣

括蒼山上雲山好雲亦好可憐山下僧看雲不知老赤城志

李迎

迎字彥將濟源人通判明州有濟溪老人遺稾

句

籍甚人言易已東

陳振孫書錄解題李迎彥將永嘉周浮沚先生之壻與先大父爲襟袂集中有送先君子赴戊子秋試詩首句云云蓋先君治易故也

朱鼐

鼐字子大

奉題周南仲正字所藏閣立本畫蘇李別

少卿昔在河梁別執手踟蹰不能發萬古初傳五字詩努力相期在明德子卿海上耗爲食故人竭來重

相覩不覺看羊度歲年。卻因射雁傳消息人間。此是長別離。少卿在虜子卿歸歸歟。尙握漢臣節。留者永衣胡人衣。天長地闊半尺絹。滿眼雲愁風景變。一人仰叫頭脫冠。一人橫涕裏著面。閻君國相稱畫師。未必想像能爾奇。前身恐是胡婦子。曾見兩公分袂時。前賢小集拾遺

陳炳

炳龍泉人官提轄文思院有退菴集

資福院平綠軒

水屋圍春綠。雲嵐送晚青。無心向朝市。信步到禪局。野境連天遠。疎鐘隔岸聽。杯行莫辭醉。簷月笑人醒。白髮流年迅。青春盡日閑。烟消漁舍出。風約櫓聲還。往事空搔首。微官祇強顏。漂零那對此。歸夢繞雲山。

至元嘉禾志

柯夢得

夢得字東海蒲陽人屢上春官不第後以特科入仕有抱甕集

陌上桑

朝采陌上桑暮采陌上桑一桑十日采不見薄情郎正是吳頭桑葉綠行人莫唱江南曲

見舊題壁

小遲點筆醉還嗔畫斷蕭梁古佛塵今日重來應抵掌十年分付未逢人

晚望

無數寒鴉來遠鐘物華心跡偶然同不知海北江南路更有愁人立晚風以上前賢小集拾遺

夢蟬

一覺千年一轉機覺來還是夢還非當時夢裏知爲蟬便好穿花傍水歸劉後村詩話

吳伯凱

伯凱字虞賓

夏夜書所見

吳牛見月喘引重不得休孤螢出露草意行凌九秋形大苦見役物微長自由世無漆園吏持問逍遙遊前賢小集拾遺

鮑  
璽

璽字份甫

仰止亭

昔年曾此戀青山幾度秋風入夢寒想得玉岑迴合處夕陽依舊滿朱闌前賢小集拾遺

李叔達

叔達字穎士

舟中聞木犀

地近孤城水合流天風吹下廣寒秋巖花似喜幽人至先遣清香到小舟前賢小集拾遺

馬

并

淮南人。

金庭觀

右軍學業隱林丘。世隔年餘景尙幽。苔鎖一泓殘墨沼。雲遮三級舊書樓。欣逢羽客開金闕。快覩仙童侍玉旒。自怪今朝脫肌骨。飛身得向洞天遊。刻錄

金嘉謨

魚簾

芒葦織簾箔。橫當湖水秋。寄言魚與蟹。機穿在中流。蟹略

蔣廷玉

廷玉、字太璞。

淨刹

碑上文難讀。開山失所傳。巖松秋落子。石井夜添泉。地曠常多月。廚寒不起烟。昔年曾有虎。來到寺門前。前賢小集拾遺

揚州

一馬揚州路。桃花幾樹花。春光無揀擇。淮地亦繁華。日沸長江水。風昏古壘沙。爭雄舊時事。君去莫思家。揚州府志

霍 洞

洞，字太清，武進人。崇寧大魁，端友從孫。居城東梅坡，自號筠寮。

宿田舍

北風吹晴屋滿霜，翁兒赤體悲無裳。閨中幼婦飢欲泣，忍飢取麻燈下績。一身豈暇私自憐，鳴機軋軋明窗前。織成五丈布，翁作欄，幫兒作袴。明朝官中催租急，依然赤體當風立。

歲饑太守春遊呈以絕句

朝來五馬去尋春，誰信家家飯有塵。枕藉道傍宜細問，恐非芳草醉眠人。以上咸淳毗陵志

朱 訾

嘗字介然。

采菊亭

霜降草木落，園菊發幽姿。風流賢史君，採掇訴忘疲。雅尚已千載，載詠閑居詩。佳處要領略，坐見花陰移。

張德象

寄沈菊山

八十乾淳老，生涯半子虛。久無朝士餽，空有故人書。詩道窮方進，塵緣老盡除。茫茫天壤闊，誰復是知子。翰墨大全

惠端方

端方，字敬之，迪之子，永嘉丞。

梅花

美人在空谷。抱志苦貞潔。素衣飄白雲。容色貶春雪。臨風一笑粲。皓齒何瑩徹。破鏡忽上天。寒影浸瑤闕。

前賢小集拾遺

張道元

金山行次梁必大韻

二山砥柱江流中。下有水府之幽宮。巨靈設此天險重。怒濤欲起兩伏龍。山光對面山淡濃。朝暮雲起相過從。鐘聲兩樣飄江風。撞驚大夢醒塵胸。海門茫茫直其東。江山第一麗且雄。六朝形勝留遺蹤。天荒地老代不同。登臨此地閱幾翁。公獨硬語盤高穹。長江滔滔去不已。千古名山占蕭寺。白髮印公心。水止嗟予勞。生竟何似人。閒平地風波起。誰能釣舟煙波裏。千年門限鐵臺址。不如流芳向文字。州縣之職徒勞耳。丈夫封侯待時至。以道事人直如矢。豈但弦歌化州里。人兮山兮有如此。我願學者梁夫子。金山志略

費震

次梁必大金焦行

太倉一米梁。魏中梵王坐處如天宮。碑礪瑪瑙珊瑚重。護法更有諸天龍。醍醐浮香甘露濃。我欲問訊當何從。惟有一席西津風快哉。八九雲夢胸。海門直指扶桑東。金鼇兩角爭豪雄。荪山房客送墨蹤妙。高千

偈佛印同衲衣玉帶知何在至今詩句撐蒼穹江山如畫人往已雲鐘浪打寺復寺華陽真逸曾至止鶴銘筆法蘭亭似老綸敗壁扶不起沙戶祈蠶脩竹裏處士蝸牛空舊址留得名山作焦字年來俗事怕到耳神尻氣興隨所至從渠烏兔走如矢白雲之鄉吾故里桑榆斥鵠安識此大鵬逍遙問莊子金山志略

金遁初

金山行次梁必大韻

江春淮水通吳中深有萬丈天吳宮珠樓貝闕知幾重魚身人面赤如龍紫雲赫奕青霞濃天帝下降百神從鯢鯨無端怒生風敕移三山填其胸日躔月緯分西東戴鼇方知策強雄馬塵轍跡絕遊蹤仙境直與蓬萊同千濤萬浪插兩峯屹然對拱摩層穹金山蜿蜒勢未已焦山繁迴藏古寺大覺仙聖所廬止人閒畫圖那得知鏡銅摩青鳥飛起浮圖倒影澄波裏六朝陵闕存故址百戰功名數行字相去清風半帆耳此身未遊心已至君詩到手破的矢我詩刻畫慚下里三分之句豈辦此舉杯一醉問蘇子金山志略

朱

渙  
字濟仲

蟻飲研槽歌

晴窗棐几風日舒呼童汲水供蟾蜍涓流入研元穎濡一蟻蠢蠢發來趨須臾十百與之俱前後有行不亂蹤宛若徒穴昇腐餘想應燥吻唇頰枯清夢思欲吞江湖搖尾羞作涸轍呼奮迅恰如東海魚物生天地小大殊飢食渴飲皆同途矧爾有靈非至愚大槐南柯名利區一夢而覺驚幻虛爾其聽我毋睢盱爾

既沃腹既腴歸安其藏勿浪逋階前羣兒正嬉娛以指劃土糜爾軀。

題徐禮部家歸去來圖

古木參天叫杜鵑春愁渾在夕陽邊看君此畫還三歎憶得西江上水船

以上前賢小集拾遺

項 読

詵字宜甫

便橋泊舟

身寄一葉舟擾擾又行役不知寒襲人但覺酒無力霜剝岸石裂風激水波逆望眼浩無涯遠山相對碧

前賢小集拾遺

李清叟

清叟縉雲人

金庭觀

山屬蓬壺第幾重奇峯翠岫繞靈宮雲藏毛竹深深洞煙起香爐裊裊風放鶴已歸天漢上養鵝無復小池中羽人盡得飛章法神與寥陽路暗通

刻錄

蔡 宰

宰字仲平

望洞陽

歲事今無幾。清霜苦見侵。寒深落雁渚。風急擣衣砧。翠縠紋秋水。斑綃纈霧林。洞陽棲隱地。樓觀白雲深。

前賢小集拾遺

李謙

謙字恭甫。

秋懷

西風入商管。衆木夜有聲。候蟲竟何爲。聒聒終夕鳴。彼亦有所思。感此歲月征。人生豈異適。長嘯一拊楹。敗壁鳴莎雞。涼月照虛堂。南鄰機杼聲。熠熠燈火光。遙聞誰家砧。已趣公子裳。佳人在何許。葉落山中霜。

前賢小集拾遺

郭從範

從範字世模。

烏衣啼

碧煙障樓天欲暮。飛鳥夜絕蕪城戍。雲外畢逋銜泥來。月明脣脰同枝語。樓中有人輟機杼。玉笙怨咽凝江霧。惆悵幽懷夜未闌。桂樹秋風蘭葉露。

前賢小集拾遺

歐陽光祖

和朱文公九曲櫂歌九首存一

玉女峯臨二曲流。剝心學道幾春秋。東風不信心如鐵。卻放石楠花滿頭。

武夷詩集

趙民則

題張家店壁

舍策投牀睡便濃。覺來涼葉動西風。驚秋念遠無窮意。客裏知誰此夜同。誠齋詩話

潘葛民

葛民字子尙

胡蝶花

風光白日長。胡蝶飛過牆。飛飛不停去何忙。牆外誰家菜花黃。出門不知南陌路。心隨胡蝶尋郎處。前賢小集拾遺

江朝宗

朝宗括蒼人有詩名。

梅花

小小人家短短籬。冷香溼雪兩三枝。寂寥竹外無窮思。正倚江天日暮時。刺錄

黃復之

復之字幼張。

過臨平

孤蹤逐浪萍。幾度過臨平。人語水相應。帆移山倒行。鷺飛秋嶼冷。虹飲晚川明。不是憑詩句。丹青寫不成。

題扇面六言

峽束天圍漸小林穿日脚微明竹居有徑誰埽水碓無人自鳴以上前賢小集拾遺

楊冠

上揚州太守

古人肉食無遠謀腰錢騎鶴向揚州春風十里珠簾捲但看竹西歌吹樓天朝選用詩書帥上策公言須  
自治屏翰堅持保障功江淮益壯金湯勢北騎不敢縱南牧關塞烟迷芳草綠健兒歌舞樂昇平一曲梅  
花細柳營揚州府志

李大方

大方字允蹈廩之孫

句

三百年來今幾秋天地自老江自流笛聲吹起白玉盤正照御前楊柳碧可憐一代經綸業不抵鍾  
山幾首詩後院落花人不到黃鸝飛下石榴陰

詩人玉屑楊誠齋云李方叔之孫大方字允蹈晚得一鶴冠今爲雜買場寄予詩一編多有警句

鄭天錫

天錫字景輔

江西宗派

西江一水活春茶。寒谷春燈夜撥花。人比建安多作者。詩從元祐總名家。宮商迭奏弦邊雁。鼓吹都慚井底蛙。身在天南心太史。幾番搔首夕陽斜。前賢小集拾遺



# 宋詩紀事卷六十一

錢唐厲鶚編

臨潼張四科勸定  
江都閔華

鄭性之

性之，字信之。初名自誠。福州人。嘉定元年進士第一。理宗朝累官寶章閣待制。知樞密院參知政事。出知福州。鶴按咸淳臨安志。自誠爲嘉定元年榜首。宋史作四年誤。四年榜首趙建大也。今訂正。

落梅

夜來幾陣隔窗風。便恐明朝已掃空。點在青苔真可惜。不如吹入酒杯中。後村千家詩

章樵

樵，號峒麓。昌化人。嘉定元年進士。歷官知涇海軍。授朝散郎。知處州卒。

伽溪

在昌化縣

試將生計問農家。兒大扶犁女漚麻。燒筍鬻葵供午餉。山中樂事自無涯。杭州府志

諸葛興

興，字仁叟。會稽人。嘉定元年進士。爲彭澤奉化兩丞。嘗作會稽九頤。有梅軒集。

曹娥祠

瞻靈祠兮江之湄。懷予心兮肅祇。表卓行兮尚之祀。垂妙辭兮淳之碑。嗟窈窕兮踐天性。一念烈兮萬古鏡。山眉兮蒼蒼。江練兮茫茫。江之水兮可竭。娥之靈兮不可滅。會稽續志

杜範

字成之。黃巖人。嘉定元年進士。端平中拜監察御史。累遷禮部尚書。淳祐二年拜右丞相。卒贈少傅。謚清獻。有集。

戊辰冬和湯南萬韻

春初走京華。秋杪歸舊廬。簡編廢已久。開卷澀且疎。誰能擊其蒙。石田或可腴。雁山有佳士。讀盡天下書。足跡半九州。不憚道里迂。陋邦何足臨。而亦來我居。相從一樽酒。未厭園中蔬。笑談欣有合。浩若縱壑魚。人生惟所適。所適各有途。胸中苟不迷。到處皆通衢。簾瓢有真樂。顏氏何其腥。沒沒嗟我生。未知終焉圖。論交須論心。所論在不渝。願君示一語。令我反三隅。君無金玉音。請誦一束芻。

良月遊水樂

久矣聞水樂。邂逅作此遊。林立攢萬石。曲徑穿深幽。沿欹衍開古洞。下有清淺流。惜哉非古音。噴薄皆人謀。流觴飲山淥。風鬢吹颺颺。欲歸興未盡。攜手湖上樓。斜陽獻萬狀。浩以雙目收。白鳥去復還。翩翩良自由。我本山林人。對此多慚憂。歲月不我與。宴閑其可偷。便作合歸計。老矣安所投。世事皆漫爾。政恐空白頭。

和澧州喜雨韻

秋色在何許。浮嵐疊翠閒。江清雙鳥渡。天闊片雲閑。雅量肩文舉。新詩壓子山。更深聽遠溜。哦詠答潺潺。

送湯仲熊國正以直去國

朔風翦木末，碩果懸孤危。  
邈矣冥飛鴻，異哉聞鳴鶴。  
莫雲結愁陰，送君江之湄。  
去者挽莫留，留者良自悲。

以上杜清獻公集

薛師點

師點、鄞人。嘉定元年進士。

酬答張安撫伯玉先生

寡交率天性，積疴攻妙藥。  
干祿念烝嘗，著書恣談謔。  
永矣離畏途，何況靡好爵。  
感子故人意，屏吏延鈴閣。  
時剖千秋心，兼訂三山約。  
風流張平子，文采謝康樂。  
潛魚媚幽潭，高鳥昵林薄。  
物類既參差，天地亦寥廓。  
但愁霜霰多，石出兼水落。  
甬上耆舊集

洪咨夔

咨夔字舜俞，於潛人。嘉定元年進士。理宗朝累官刑部尚書、翰林學士、知制誥。加端明殿學士提

舉萬壽觀卒，諡忠文。有平齋集。

鷁按咸淳臨安志有嘉定元年鄭自誠榜無二年榜宋史誤今訂正

仇遠碑史洪平齋新第後上衛王書自宰相至州縣無不措摭其短大概云昔之宰相端委廟堂進退百官今之宰相招權納賄倚勢作威而已凡及一職必如上式俱用而已二字時相怒十年不調洪有桃符云未得之乎一字力紙因而已十年閒

贈石室朱修行

響泉一派落天風，人在浮雲柳絮中。  
亭午柴扉猶未啟，碧玲瓏底拒霜紅。

直玉堂作

禁門深鎖寂無譁。濃墨淋漓兩相麻。唱徹五更天未曉。一池月浸紫薇花。

題東山在臨安縣西三里。相傳謝安石高臥之地。

金堂玉室舊相羊。被髮依然下大荒。風送嬋娟飛落葉。雲移縹緲溼疎篁。桓伊箏外深情酒。幼度棊邊定力香。萬事古今開闔眼。樓頭吹面水風涼。

天目山招隱歌

雲氣斂兮天目之巔。濤江線橫兮海門濺濺。扶桑子半兮陽烏翻。可俯而掬兮。嚙以天井無聲之泉。子其隱乎。吾與子兮拾荃。

正月十九日孟享從駕

黃繖中閒一點紅。繡雲函簿海棠風。鈞容聲出雲霄外。馬上誰憐有老聾。

壬辰小雪前奉親游道場何山

何山如幽人。道場如大家。穰穰衲子脚。刺刺騷翁牙。挾雋控寒飄。披光躡晨霞。危顛矯窣堵。平疇略汙邪。巖泉跑虎湧。徑松鬚龍擎。鐘梵破深寂。金碧開芬葩。修廊步履峻。傑閣望眼賒。山勢佩玦巒。湖光鏡匣舒。清節杳靄入。古弁空濛遮。列翠不可唾。羣籟無敢譁。坐我梅檀林。酌之檜旗茶。宇定岫出雲。語妙天雨花。邪老親八十健。閑儻二三佳。拍浮一葉渺。收覽萬景奢。富貴上蔡犬。貧賤東陵瓜。未須笑落鐸。誰能苦鱠沙。

候門占噪鵠。旋橈趁歸鴉。奇事恐沒沒。舉詩屬僧伽。

感王荊公事

君臣一德盛熙寧。厭故趨新用六經。但怪畫圖來鄭俠。何期奏議出唐坰。掌中大地山河舞。舌底中原草木腥。養就禍胎身始去。依然鍾阜向人青。以上平齋集

梅磗詩話。荊公行青苗免役等法。引用一等小人。天下受其苦。卒召六十年後靖康之禍。洪平齋有詩云云。按國史。俠嘗從安石學。坰乃安石所薦。皆以新法不便攻之。此詩乃五十六字史論。

都城火

九月丙戌夜未中。祝融漲焰通天紅。層樓傑觀舞燧象。綺峯繡陌奔燭龍。始從李博士橋起。三面分風十五里。崩摧洶洶海潮翻。填咽紛紛釜魚死。開禧回祿前未聞。今更五分多二分。大塗小撤噤不講。拱手坐視連宵焚。殿前將軍猛如虎。救得汾陽令。公府祖宗神靈飛上天。痛哉九廟成焦土。

梅磗詩話。紹定辛卯。臨安大火。九廟俱燬。獨丞相史彌遠賜第。以殿司軍救撲而存。洪平齋哭都城火詩云云。末意規諷時宰甚切。聞之者足以戒。

吳

泳

泳字叔永。號鶴林。潼川人。嘉定元年進士。理宗朝仕至起居舍人。兼直學士院。權刑部尙書。終寶章閣學士。知泉州。有鶴林集。

嘉熙丁酉七月上辭遊大滌題住山龔冲妙良泓軒

舊與清泉白石盟。身閑方作洞霄行。青山延客元無鎖。碧潮流花似有情。古洞欲隨仙隱去。高岡終待鳳來鳴。道人喚我松閒飲。坐拂寒雲月未生。洞霄詩集

沈大椿

大椿、嘉定中真州判官。

自維揚回真州

一官安敢問青氈。形影相看祇自憐。黃鵠已登青漢去。白鷗空占淺沙眠。杏花開徧揚州雨。柳色渾鋪瓜渚烟。老眼生疎堪自笑。浪驚風物向淮天。

青蒲短短柳斜斜。入眼新愁亂莫遮。雨潤固應宜筍蕨。風饗端不貸鶯花。春來止酒常因病。客裏逢人祇問家。安得扁舟下荆水。一歸老我舊生涯。維揚志

胡榘

榘字仲方。廬陵人。銓之孫。嘉定中官工部尙書。出知福州。

嘉定二年秋重遊洞霄

重尋九鎖躡丹梯。回首空驚歲月移。風虎守闢寧易到。冰龍候路卻先馳。松筠老去俱全節。猿鶴迎來盡故知。更拂棲真洞。閒石弟兄同記勝游時。

餘杭泉石欠幽探。淨拂衣塵入翠嵐。九鎖山門雲上下。一峯天柱殿西南。元封舊事無人記。德壽仙游有客談。痛飲丹泉臥磐石。松風滿耳夢初酣。洞霄詩集

句

自孤花底三更月。卻怨樓前一笛風。落梅 鶴林玉露。

呂 午

午字伯可。歙縣人。嘉定四年進士。歷官浙東提刑監察御使。遷起居史。院官卒。贈華文閣學士。有

竹坡類橐。

馬城花窠寓居臨安馬城作。

老子西城住。今踰十載期。栽花成茂樹。種柳長高枝。移接從渠巧。誇傳到處知。擔頭挑賣去。一一是趨時。  
竹坡類橐。

和岳王廟壁上韻

祁閩西一舍有菴曰東松。紹興初。岳鄂王提兵經吾郡西上。士卒秋毫無犯。卒宿入門外。足不敢一越限。

內嘗憩是菴留題。

當年唯說岳家軍。紀律森嚴孰與鄰。師過村村皆按堵。功成處處可鐫珉。威名千古更無敵。詞翰數行俱絕麗。擬取中原報明主。亦勞餘刃到黃巾。新安文獻志。

徐文卿

文卿字斯遠。號樟丘。玉山人。嘉定四年進士。與趙昌父、韓仲止、齊名。有蕭秋詩集。

葉水心序云。斯遠淹玩衆作。凌暴偃蹇。情瘦而意潤。貌枯而神澤。方于西江宗派。斯又過之。

游洞巖

跨馬絕風烟。夜與雲俱宿。彈琴向窗閒。微月挂森木。曉行巖上路。一溪緣淨綠。路窮入其中。溪流貫山腹。巖開類天設。石亂疑鬼伏。水從何自來。乃爾瑩心目。巖前野僧居。種桃滿空谷。惜已過芳時。不見花芬馥。平生青霞志。恥受紅塵辱。老我茅三間。茲山疑可卜。前賢小集拾遺

偶題

綠樹何稠疊。清風稍羨餘。枕繁雲片片。簾透雨疎疎。修寬通泉壑。殘碑出野鉏。丘陵知幾變。耕稼雜陶漁。

雨後到南山村家

衝雨入窮山。山民猶閉關。橘垂茅屋畔。梅映竹籬閒。奇石依林立。清泉繞舍灣。吾思隱茲地。凝立未知還。  
以上瀛奎律髓

周端朝

端朝字子靖。永嘉人。從朱晦菴武夷讀書。登嘉定四年進士。官至刑部侍郎。謚文忠。

三江口

吳門臺北竹樓隅。三日追陪漫叟居。曉夢驚辭赤壁鶴。夜棲看打武昌魚。橫洲遙激分燈影。落月斜河運斗車。回伏三江問漢口。陸離蘭葉響環琚。東甌詩集

程公許

公許字季與。一字希穎。號滄洲。敍州宣化人。嘉定四年進士。理宗朝累官中書舍人。禮部侍郎。進

權刑部尚書有塵缶集

牡丹

春工殫巧萬花叢。晚見昭儀擅漢宮。可惜芳時天不借。三更雨歇五更風。全芳備祖。

黃子信

子信長泰人。嘉定四年特奏名第二人。調新會鹽場有散翁集。

投楊帥

六年兩度拜宸旒。換得青衫白上頭。飛鵠祇因無樹繞。窮猿何暇擇林投。明知著腳當來誤。幾欲抽身不自由。安得有錢了官債。便無三徑也歸休。

歸時作

笑倩西風拂舊埃。歸時行李似初來。也知三載清貧好。博得一家強健回。

漳州府志。子信初調新會鹽場。楊長孺以其老榜爲監當。

心易之常指撫其簿書。子信將拂衣而去。因投以詩云云。

周假菴

題趙千里夜潮圖。款書嘉定庚午仲夏一日。

烟蒼蒼江茫茫。明月夜挂天中央。奔潮不盡當日恨。金波怒捲蚪龍長。浦口秋飛揚鷗雁不眠聲。周章風高沙漲望難到。羽翰但逐潮低昂。窗閒簾炷香。開卷有素商。何須八月上錢塘。對此秋濤生錦囊。珊瑚網

袁甫

甫字廣微，鄞人。嘉定七年進士第一。歷官吏部侍郎，兼國子祭酒，權兵部尙書。卒贈少傅，謚正肅。  
題陳和仲尊明亭

亭在山巔，氣象巍然。山從何來，蜿蜒蜒。我坐亭上，極目一望，羣峯畢朝。尊無與抗，我撫亭下，萬象難寫。  
一一分明入我醻肆。有時攜筇，偕我朋從。莫知我心，獨撫孤松。甫上耆舊集

徐清叟

清叟，字直翁，浦城人。嘉定七年進士。理宗朝，歷官廣東安撫使，權兵部尙書，拜端明殿學士，知樞密院事，兼參知政事。提舉佑神觀，出知泉州，卒贈少師，謚忠簡。

淨明院梅巖恭和高廟御製

偶因祀事訪丹霞寺，古山深石徑斜。衝凍細尋梅信息，枝頭喜見狀元花。咸淳臨安志

贈建寧妓唐玉

上國新行巧樣花，一枝聊插鬢雲斜。嬌羞未肯從郎意，故把芳容半面遮。豹隱紀談

陳耆卿

耆卿，字壽老，臨海人。嘉定七年進士，官至國子司業。著有質窗集，赤城志。

葉水心云：陳君之作，馳驟羣言，特立新意，險不流怪，巧不入浮。

艱食行

新穀未升除穀罄，窶人托麥以爲命。今年種麥如去年，去年滿屋今空田。吁嗟皇天母乃戾，去年浙右當死歲。湘中死寇淮死兵，留得東州僅旒綴。祇今艱食遽如斯，豈是造物有乘除。我無一語活四海，對之泣下徒霑裾。催租官吏如東溼里，正打門急復急。安得君眼如月長，灼破田家蓑與笠。全芳備祖

王伯大

伯大字幼學，號留耕。福州人。嘉定七年進士。理宗朝累官端明殿學士。拜參知政事。

贈戴石屏

詩老相過鬢已星。吟魂未減昔年清。揮毫不著塵埃語。盡把梅花巧琢成。梅磬詩話

丹青閣

傑閣岩堯倚碧蒼。菊花時節此持觴。市聲一段隔秋水。橋影半空橫夕陽。挺挺霜筠排壑立。涓涓石溜引山長。人言絕頂多奇觀。安得閑身宿上方。詩家鼎臚

郭磊卿

磊卿字子奇。仙居人。嘉定七年進士。端平初拜右正言。尋擢右史。以直言爲史嵩之所忌。除起居郎。卒謚正肅。有兌齋集。

偶題

更無清興在杯觴。不用蒲葵扇自涼。月色靜時山鶴叫。一庭清景藕花香。宋藝圃集

李劉

劉字公甫號梅亭崇仁人嘉定七年進士仕至中書舍人直學士院寶章閣待制卒有詩文類稾。孫雲翼李梅亭先生小傳劉嘗從真德秀游巧詞科文字留飲書室指竹夫人爲題曰蘄春縣君祝氏可衛國夫人劉援筆立成未聯云戲保抱攜持朕不忘乙夜之寢展轉反側爾尙形四方之風德秀擊節歎賞嘉熙己亥四月誕皇子告廟祝文劉以學士當筆以四柱作一聯云亥年己月無長蛇封豕之虞午日丑時有歸馬放牛之兆時方有蜀警人咸賞其中的有梅亭四六行世。

記夢

壯志已違黃鵠下老身合占白鷗前夜來耿耿江湖夢秋水長天一釣船前賢小集拾遺

聞笛

何處桓伊酒力雄分明嚼徵更含宮倚樓三弄西風急不覺梅花大半空

後村千家詩

項容孫

容孫字仲履號雲藪江陵人嘉定七年進士理宗朝官殿中侍御史

山中憶兄弟

鴻雁不成行飄零歲月長一身三處夢半夜九回腸積雪欺茅屋孤燈照錦囊何當聽夜雨卻話此淒涼

詩林萬選

吳昌裔

昌裔，字季永，號青蓮山人，中江人。嘉定七年進士，理宗朝歷官知婺州，加集英殿修撰，以寶章閣待制致仕，卒謚忠肅，有集。

攜客山行詠陶嘉月自雙徑來洞霄丹巖翠壑林立環擁神剜鬼刻不可名狀餐雲漱月偶得八吟

留之山中以紀幽踐嘉熙三年三月穀雨存三首

上界神仙住九華故留靈鎖護烟霞雲根欲斷溪回處流出山中幾片花九鎖山

鑿破千年渾沌心石楠當戶洞愔愔詩臞猶怯春寒在捫石梯雲不敢深棲真洞

誰鑿巖扉石竇開懸崖飛瀑轉風雷須臾白浪從天下野客不知何處來飛玉亭

洞霄詩集

吳淵

淵字道父，寧國人。嘉定七年進士，累官江東安撫使、行宮留守、兼屯田使、拜參知政事、封金陵侯。有退菴遺集。

登南城

江城一眺思悠悠平楚蒼然野水流衰草寒烟梅丈墓敗垣斜日謝公樓江山有恨英雄老天地無私草木秋萬古興亡俱是夢不知何者爲身謀

句

一帶天分南北限兩眉烟鎖古今愁蛾眉山以上退菴遺集

吳潛

潛字毅夫寧國人淵弟嘉定十年進士第一淳祐中歷官特進左丞相封許國公以沈炎論劾謫化州團練使循州安置有履齋遺集

睡起行北園

睡起卸冠簪園行獨自吟山昏知雨到樹密覺春深竹外童相報門前客見尋歸來卽敗意誰者是知心卽事

春陰漠漠護輕寒春晝無聊午夢閑幽鳥不知人意改銜花飛傍小闌干以上履齋遺集

聞同官會碧沚

碧沚堂前瞰水官祇應喚作玉壺看頗聞秩秩玳筵展莫遣恩恩銀燭殘酒付別腸寧怕窄詩由廣舌不憂乾老夫孤坐三更月欲往從之道路難萬頃湖光浩不收花汀竹嶼思悠悠黃公舊隱知何地賀監言歸乞此洲良夜最佳唯午夜今秋偏好是中秋舉杯酒露月同吸仰面青天可問不

占春亭卽事

桃花幾片隔牆飛獨自危樓徒倚時目送斷鴻雲外沒東風吹淚落天涯見他門戶插垂楊懊恨江南客子腸春夢誰云無準托連宵合眼是家鄉

題暗香疎影詞後用潘德久贈姜白石韻

人生浮脆若蘆蒲四十年前此丈夫擬向西湖醉孤魄想應風月易招呼以上開慶四明續志

和人賦琴魚

仙人藥苗化爲魚身雖纖細味豐腴士人涉溪如採珠以布爲網猶恐疎不比吳王耽嗜鮆松江千古留腥滓好似春茶槍與旗俯視銀條不足數人生所樂在家鄉何必定食河之魴琴高仙游不可躡自向崑崙朝玉皇玉皇一笑倚天末乞與五湖任囊括扁舟烟雨歸去來臥聽魚槎聲渺渺

吳禮部詩話宣城涇縣有琴高山有琴高溪俗傳控鯉而升之所每歲三月中有小魚數十萬一日來集亦傳以爲投藥滓所化至今人待此日盡網之曝以爲乾味甚美吳履齋嘗賦詩和人韻云云

絕句

編茅爲屋竹爲椽屋上青山屋下泉半掩柴門人不見老牛將犢傍籬眠

句

楊柳年年人老大江山處處客淒涼

以上全芳備祖

汪立中

立中四明人

甲戌廷對後到洞霄丙戌假守新安又得寄徑成詩紀游

憶昔尋幽興未終重來洞府訪仙翁十年塵土身將隱千里華陽路暗通山水祇如前日好松杉似與老人同明朝又入黃塵去回首青山一夢中

洞霄詩集

丘岳

岳號煦山丹徒人嘉定十年進士江淮制置使

自淮烟代歸領累偕親友游虎丘偶成影語以紀歲月淳祐庚戌七月二十五日

一目四蒼莽突然見林丘飛來靈鷲峯幻出蓬萊洲浮圖高崒嵂石徑通深幽生公講經臺曾聞石點頭劍池杳無底脩绠汲寒流千古詫異傳此事還是不我來秋向深良苗布平疇憂國願年豐一稔銷百憂

虎丘志

陳 墇

塤字和仲鄞人嘉定十年進士歷尚書吏部侍郎國子司業

曰琯按方氏瀛奎律髓注云陳塤字伯和號習

菴其先陽翟人寓居桐廬

分水道中

午困思茶無處煎溪橋側畔認炊烟松窗竹牖人家靜旋借沙瓶汲澗泉

前賢小集拾遺

山居次滕元秀韻

解組滄溟畔攜家紫翠閒地臨雙港勝天與兩年閑茅屋靜聞雨竹籬疎見山所慚鄰舍老句險不容攀瀛奎律髓

釣臺第十九泉

十年不泛釣臺船夢想高風日月邊今日偶來無住著再嘗灘下鬻茶泉

嚴州府志

遊虎丘

老龍挖雨過平川。曉影初開樹色鮮。有片白雲收不盡。日高猶在講臺邊。  
碧玉千尋劍影寒。夜深光怪逼危闌。句吳霸略成塵土。空有青山覆石壇。虎丘志。

王 邁

邁字實之。號臞軒居士。興化軍仙遊人。嘉定十年進士。調南外睦宗院教授。召試學士院。改通判漳州。應詔直言爲臺官所劾。削二秩。淳祐中。知邵武軍。予祠卒。贈司農少卿。

飛翼樓舊傳說范蠡故址

亭前一望海東流。更有雄樓在上頭。燕子飛來春漠漠。鷗夷仙去水悠悠。神交故國三千里。目斷中原四百州。日暮片雲棲古樹。昔人留與後人愁。詩家鼎鑿

除夕

憶昔都門值歲除。高樓張燭戲呼盧。久依淨社參尊宿。難向新豐認酒徒。天子未知工草賦。鄰人或倩寫桃符。寒宵別有窮生活。點勘離騷擁地爐。後村千家詩

賀林簿新娶

金華門外厭京塵。烏帽山前結帨巾。翁婿相看冰映玉。庭闈一笑頰生春。昔言爾爾嫌隨俗。今喚卿卿喜有人來歲夢蘭嘉兆。叶犀錢玉果出娛賓。翰墨大全

句

未知死所先期死。自笑狂生老更狂。

齊東野語王實之遇有文名落魄不羈爲正字日因輪對及故相擅權理宗宣諭曰姑置衛王之事邁即抗聲曰陛下一則曰衛王再則曰衛王何容保之至耶上怒不答徑轉御屏曰此狂生也邁歸鄉里自稱敕賜狂生嘗有詩云云

羅必元

必元字亨父號北谷隆興府進賢人嘉定十年進士度宗朝累官直寶章閣兼宗學博士

金陵作

六朝遺跡舊山川萬里長江當守邊一念易驕人事廢不關飛渡北來船

凭高懷古思悠悠遙想騎驢白下遊不是龍眠圖畫裏如今親到蔣山頭

景定建康志